

NATIONAL ASSEMBLY OF SEYCHELLES

Tuesday 6th July, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Onorab e bonzour tou telespektater e oditer ki pe swiv nou. Byenveni pou en nouvo sesyon travay. Nou a komans avek prezantasyon dokiman. Madanm Clerk. Antretan nou a met pare pou fer Minis ek son delegasyon antre ler nou fini. Madanm Clerk.

MADAM CLERK

Mersi Mr Speaker. Bonzour a tous. Bann papye ki pe ganny prezante *ce matin i comme swivan* ;

Report for the Year Ended 31st December, 2020 for The Public Service Appeal Board.

S.I.41 of 2021 Notification of the proposed reclamation at Cascade under section 6(2) and (3) of Cap 106.

S.I.42 of 2021 Transfer and Delegation of Statutory Functions (Land Reclamation Act) Order, 2021.

S.I.43 of 2021 International Bank for Reconstruction and Development (COVID-19 Crisis Response Emergency Development Policy Loan) Debt Order, 2021.

S.I.44 of 2021 Civil Code of Seychelles Act 2020 (Commencement) Notice, 2021

And finally,

S.I.45 of 2021 Revenue Administration (Conditions for remission of interest and additional tax) Regulations, 2021. Mersi Mr Speaker.

MR SPEAKER

Mersi Madanm Clerk. Nou a pas lo Sesyon Kestyon avek *Private Notice Question*. Byenveni dan Lasanble Minis Peggy Vidot, Minis pou Lasante e Dr Danny Louange, Sef Egzekitiv *Health Care Agency*. *Private Notice Question* par *Leader* Lopoziyon. Onorab Pillay.

HON SEBASTIEN PILLAY

Mersi Mr Speaker. Bonzour Mr Speaker, bonzour Minis e Dr Louange. Bonzour tou Koleg Onorab e bonzour tou dimoun ki a lekout. Mr Speaker, mon kestyon i lir koumsa ;

Prenon kont ki in annan bokou konsern eksprimen par

plizyer pasyan ki lo tretman spesyalize, oubyen bezwen war spesyalis pou bann kondisyon oubyen maladi serye e osi par manm fanmir bann pasyan ki dan sa kategori, eski Minis pou Lasante i kapab donn nou Lasanble detay lo:

1) Ki bann prosedir ki servis swen Lasante in met an plas pou asire ki bann pasyan ki bezwen swiv tretman spesyalize, i ganny sans swiv zot tretman e ki zot kapab fer sa an sekirite, san risk lenfeksyon *COVID-19* ki kapab agrav kondisyon lasante sa bann pasyan?

2) Ki Minister Lasante pe fer pou asire ki bann pasyan ki bezwen vwar spesyalis pou bann kondisyon oubyen maladi serye, i kapab fer li dan en dele letan rezonnab e ki kondisyon lasante sa bann pasyan ki bezwen swivi sirtou bann ki annan bann kondisyon kronik pa ganny agrave?

E dernyen kestyon.

3. Avek lefe ki bokou lanfaz pe ganny mete lo mitigasyon e kontrol bann risk ki *COVID-19* i poze, eski servis swen lasante in remark en logmantasyon dan lakantite lezot ka maladi serye e ki zot pe fer pou asiste bann pasyan avek

kondisyon lasante serye? Mersi Mr Speaker.

MR SPEAKER

Mersi Onorab. Minis ou ava adres kestyon silvouple.

MINISTER PEGGY VIDOT

Mersi Mr Speaker.

Mr Speaker,
Leader Zafer Gouvernman dan Lasanble Nasyonal,
Leader Lopozisyon,
 Manm Lasanble,
 Tou oditer a lekout, bonzour.

Mr Speaker, tretman spesyalize i ganny ofer isi Sesel par Lazans Swen Lasante osi byen ki aletranze kan sa i neserer. Tretman spesyalize isi Sesel i ganny fer kot Lopital Sesel e dan Klinik Anbilatwar kot *SOPD*.

I vre ki klinik spesyalize in ganny enteronpe aköz *COVID-19*. Sa in bezwen ganny fer pou plizyer rezon. In annan fakter kot resours imen in bezwen ganny anvoye, pou travay dan lot landrwa kot nou bezwen donn swen dimoun avek *COVID*.

Nou'n annan *staff* ki'n ganny afekte e ki'n bezwen al dan izolasyon ouswa dan karantenn pou proteksyon e osi pou proteksyon pasyan an menm tan ki *staff*.

Dan sirkonstans kot klinik spesyalize in bezwen enteronpe akoz COVID-19, i pa'n vedir ki pasyan ki ti bezwen swen servis spesyalize in ganny neglize. Nou prosedir ki an plas se ki nou bann spesyalis i fer li zot devwar e lobligasyon pou resevwar e egzamin bann let *referral*, ki sorti kot lezot Dokter ki demann zot en nouvo konsiltasyon pou zot pasyan.

Zot osi annan lobligasyon pou pas an revi bann dosye bann pasyan, ki ti pou vin vwar zot e kot i nesese zot fer sa bann aksyon swivan.

Zot refer en ordonnons oubyen en preskripsyon. Zot demann en tes laboratwar oubyen tes dyagnostik si sa i nesese.

Zot antre an konversasyon avek sa pasyan kan i nesese e kan i nesese zot demann pasyan pou vini pou zot fer en legzanmen fizik kan i nesese.

Bann *staff* dan klinik spesyalize, zot antre an kontak avek bann pasyan pou enform zot kan zot bezwen kolekte swa preskripsyon ki zot kapab ganny dan servis farmasi, swa pou vin kolekte *form* pou fer esantiyon disan ou si non lezot test tel ki dyagnostik.

Kot en pasyan i bezwen en legzanmen fizik, sa i osi ganny

kordonen avek bann pasyan par bann *staff* kot SOPD.

Malgre tou sa, nou annan serten klinik spesyalize, ki ankor pe fonksyonnen e sa i klinik pou bann tromatiz, bann dimoun ki annan bann problem lezot kase avek blesir.

Klinik kot i fer *colposcopy* pou bann madanm kan sa i nesese.

Klinik spesyal pou *urology*, kot nou donn latizann ki apel *Zoladex*. E klinik spesyalize pou bann zanfan.

Pou bann swivi e tretman an deor Lopital Sesel, dan bann sant lasante. Sa bann prosedir swivan i a operasyon. Dokter dan sant lasante i reviz dosye pasyan. Kan son ler in arive pou vwar spesyalis, savedir zour ki i ti annan son *appointment*, i annan en. Si sa pasyan i prezant avek en sentonm menm si i annan en problem kronik.

Sa Dokter i vwar li e selon sa Dokter ler in vwar dosye sa pasyan i kapab re fer en ordonans oubyen en preskripsyon. I kapab demann bann tes dyagnostik ankor e i koz avek spesyalis lo size sa pasyan pou en revi, ou si non i organize pou sa pasyan vwar spesyalis si sa i nesese.

Pou bann pasyan ki bezwen swen spesyalize, zot

kontinyen ganny zot latizann kot diferan dispanser dan bann sant.

Zot kontinyen ganny zot tes si disan, ouswa si non lezot esantiyon si zot bezwen. E Dokter dan bann klinik ler pasyan i raporte pou nenport ki rezon, zot kontinyen vwar sa pasyan lo zot bann maladi kronik.

An sa ki konsern servis dirzans, sa i reste ouver 24 lo 24, 7 zour lo 7 kot Lopital Sesel, Lopital Anse Royale, sant lasante Anse Boileau. Lopital Praslin ek Lopital La Digue.

Kot pasyan i ganny trete, zot ganny stabilize e kan i nesese zot ganny transfer kot Lopital Sesel.

Loperasyon par bann sirizyen, i fer pou tou ka irzan e kot pa tro irzan, i annan bann kriter ki'n ganny etabli pou swivi e programasyon loperasyon a en moman ki pou pli apropiye.

Mr Speaker, an sa ki konsern swivi ek tretman aletranze, prosedir i reste parey anliny avek Lalwa lo tretman aletranze ki Lasanble ti vote an 2018 e ki ankor an viger.

Difikilte ki nou'n gannyen se ler enn, oubyen plizyer pei aletranze i retarde pou pran nou pasyan aköz COVID, oubyen ler napa koneksyon

aryen aköz COVID, e la nou bezwen pe toultan travay ek tou nou bann misyon aletranze, ek tou bann Pei Zanmi, pou rod bann alternativ ki fezab san ki nou met lavi nou pasyan a risk e san ki an menm tan nou fer sir ki i annan en *safe corridor* pou zot vwayaz aköz COVID.

Fodre nou dir ki Lazans Swen Lasante in met an viger bann mezir lasante piblik dan tou sant lasante ek Lopital, pou protez tou pasyan avek *staff* travayer lasante.

Me nou konnen poudir nou esey redwir risk me nou pa kapab elimin bann risk. Alors sa i repons kestyon nimerò enn.

Mr Speaker, si mon pran kestyon nimerò 2 i annan en pe *overlap* ant repons ki mon'n donnen oparavan alor repons pou sa enn kestyon avek repons sa enn kestyon. Mon pa pou repet sa ki mon'n deza dir. Sepandan mon kapab dir ki i toultan nou Polisi, i toultan nou pratik pou fer servis lasante reste osi aksesib ki posib pou tou dimoun ki bezwen.

I pa ditou nou lentansyon pou esper kabri manz salad, epi pou nou reazir. Alors dan mezir ki sa i posib e pratik, tou problem lasante en pasyan i devret ganny adrese san gran dele letan, menm si i annan

COVID oubyen napa COVID dan nou pei.

Me byensir i toultan annan en pti dekalaz ant mezir e volonte, ant Polisi ek kapasite resours, enkli resours imen pou fer keksoz selon nou dezir ek nou volonte.

Avek sa sityasyon COVID-19 ki pa enfekte nou pei an antye, kot travayer lasante, ki i Dokter, ki i en ners, ki i en travayer laboratwar ou sinon travayer dan servis dyagnostik i ganny afekte, nou'n bezwen realize, ekspekte ki sa pou osi afekte en pti pe nou servis.

Minister Lasante i kontinyen demann kolaborasyon ek konprenezon tou dimoun. Nou dan en sityasyon difisil. Lemonn i dan en sityasyon difisil. I zis avek kolaborasyon ek konprenezon, zefor tou dimoun ki nou pei, nou sistenm Lasante pou kapab sirmont bann defi.

A sa pwen mon ti a kontan demann nou tou pou travay ansanm pou nou fer tou sa ki posibil, sa ki nou kapab fer pou nou pei sorti dan sa pandemi, pou ki nou a kapab anfen retourn dan en sityasyon en pe pli normal ki i ete la konmela.

Tou pasyan ki Dokter i panse i bezwen ganny en investigasyon pou en maladi grav, zot ganny vwar par bann

spesyalis dan en mwens dele letan posibil. Bann ki bezwen entervansyon sirizikal, sa i ganny fer.

Bann ki pe bezwen servis spesyalize parey kot *oncology*, sa i ganny vwar e osi nou kapab dir ki tou dimoun ki'n bezwen servis *oncology*, in ganny sans vwar *oncologist* e komans zot tretman o pli vit posibil kan i neserer.

Pou kekyon nimeron 3, Mr Speaker, Minister Lasante pa ankor remark okenn logmantasyon dan lakantite ka maladi serten ki'n anrezistre kot Lopital Sesel.

Si nou konpar bann ki'n ganny admet dan swen entansif Lopital koman en edikater bann ki'n vin ek kondisyon serye, Sesel pandan sa 4 dernyen mwan lannen 2019, 2020 ek 2021 nou vwar sa bann sif swivan.

An Zanvye 2019 nou ti vwar 27 dimoun admet dan swen entansif. An 1920 ti 29, an 1921 ti 19.

MR SPEAKER

2000.

MINISTER PEGGY VIDOT

2020 ek 2021 pou sa 3 lannen, sa premye 4 mwan dan lannen. *Sorry*, mon korize. 2019, 2020, 2021.

An Fevriye 2019 ti annan 24, 2020 ti annan 34 e 2021 ti annan 14.

An Mars, 2019 ti annan 26. An 2020 ti annan 23, an 2021 ti annan 27.

An Avril, 2019 ti annan 21,

2020 ti annan 14, 2021 ti annan 23. Alors Mr Speaker, si nou pran sa koman en endikater nou vwar poudir en kantite maladi grav ouswa serye ki'n antre dan sa Lopital, i pa'n ogmante. I annan varyasyon parey i annan dan en lannen a lot. Me selman lo gran kantite nou pa'n vwar sa logmantasyon. Mersi Mr Speaker.

MR SPEAKER

Mersi. Nou a komans avek kestyon siplemanter e nou a komans avek loter kestyon, Onorab Pillay.

HON SEBASTIEN PILLAY

Mersi Mr Speaker. Mr Speaker, mon'n ekout bann larepons Minis atantivman e, me selman mon bezwen dir avek Minis ki nou pe kontinyelman ganny bann konsern oubyen lekspresyon konsern sorti kot manm piblik, malgre sa bann larepons ki nou pe gannyen.

Mon pou servi 3 ka spesifik. Enn i en ka en madanm ki li i ganny kanser e ki in bezwen apre ki in demande pou li fer en *scan* isi, difikilte ki in gannyen in bezwen rod en *second opinion* . E ler in retournen apre son *second opinion* ki zot in aksepte pou li al fer *radio therapy*. *In the first place* zot pa ti aksepte.

Mon annan en lot ka en lot madanm ki ti annan son paran ki in anmenn kot Lopital, e in anmenn li dan 9er bomaten ki ti sipoze fer en *emergency MRI*, by 11er edmi *still* pa ankor fer sa *emergency MRI*, e nou pe koz en dimoun tre alaz.

E mon annan en lot case ankor ki en dimoun in met devan mwan, vizavi sityasyon kot i ti sipoze vwar en *ENT* e i sipoze vwar spesyalis an relasyon ek en kondisyon leker ki i ti'n deza al fer en loperasyon aletranze, me sa pa'n materyalize e in annan retar pou li kapab vwar en spesyalis. Zis i pe ganny sa bann latizann.

So, pa ki mon pe dout ki protokol i la, kestyon ki mon annan se eski nou pe kapab aplik protokol parye nou devret ? Ki nou bezwen fer, ki Minister Lasante i anvizaze fer pou zot kapab met an aplikasyon protokol, ki permet zot pou fer en swivi ek sa bann

pasyan ki bezwen sa bann swivi?

E mon ti a kontan ou klarifye *Minister*, i annan koze la deor ki in annan bokou anpitasyon. *Amputations* kot Lopital Sesel. Eski sa i en keksoz ki korek, eski zot in remark en logmantasyon par egzant dan kondisyon segonder parey *cellulites* ki anmenn ver *amputation*? Akoz sa i bann keksoz ki dimoun pe dir deor.

Sa ki nou pe sey fer se ki, pou nou konnen si Lopital pe met lanmen lo sa bann sitasyon ler zot pe arive. Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou bann, sa 3 ka konsern ki ou'n met devan. Parey ou'n dir, nou annan Polisi, nou annan prosedir ki nou'n met an plas. Si in arive, mon pa pe kapab koman lo sa 3 ka, akoz mon pa pe konnen lekel zot. Me si in arive nou ti a kontan konnen, nou ti a kontan vwar.

Nou konnen poudir i annan serten, par egzant si nou annan en sel *cardiology* e li i an karantenn akoz in an kontak swa avek en pasyan,

swa avek en koleg travay e li i al an karantenn.

Alors son servis pou en moman i ganny si ou le diminyen. Me nou annan prosedir ki si keksoz i grav ki i bezwen ganny fer.

Si *MRI* in ariv en problem, en dele 3er tan pou li ganny *MRI*, i tre probab ti annan en rezon pou sa. E si nou, nou konnen definitivman nou regard ladan, nou fer sir poudir i pa ariv ankor. Si i annan keksoz ki bezwen korize, nou fer sir ki i korize.

An term ou kestyon anpitasyon, si i annan en logmantasyon, mwan osi sa in vin kot mwan e mon'n demann Lazans Swen Lasante pou eklersi mwan lo la.

Me koman nou annan *CEO* la. Mr Speaker, si ou ti permet mwan mon a demann li donn bann sif e leklersisman lo sa pwen. Mersi bokou.

MR SPEAKER

Mersi. Wi *CEO*.

CEO DR DANNY LOUANGE

Mersi Mr Speaker. Mersi Minis, mersi Onorab pou ou kestyon. Wi, nou'n tande ki i annan konsern dan kominote ki i annan en ogmantasyon dan anpitasyon.

En ogmantasyon dan dimoun ki prezant avek sa ki nou dir *cellulitis*. I en lenfeksyon lipye, lazam e menm osi lebra avek lanmen. Letan nou'n reviz nou *statistics*, bann *statistics* ki nou kolekte.

E menm letan nou fer en *review* avek bann sirizyen, bann Dokter, bann *clinical staff*. Nou vwar ki loter *cellulites* i annan en pe lenfeksyon lazam, lebra, bann manm enferyer. Nou'n pa'n vwar okenn ogmantasyon.

Me parkont nou'n vwar ki nou'n ganny bann ka ki nou apel *acute limb ischemia*. Savedir sirkilasyon disan dan sa manm enferyer in ganny koupe oubyen in ganny redwir e pasyan i prezant avek en prezantasyon ki en pe similar sa ki nou apel *cellulitis*.

An kreol nou pou apel li *cellulites*. Nou'n vwar ki la resaman nou'n ganny 3 ka serye ki enkli manm enferyer lipye, lazam apre en ka ki nou'n vwar ki dan lebra.

E nou'n fer en revi, en analiz en pe bref ki apre i pou annan en pe plis lenvestigasyon ki nou pe fer. Me nou vwar ki i pa asosye avek okenn keksoz ki pe arive ek sa *crisis* ki nou ladan, avek *COVID*.

Nou pa vwar ki i asosye avek vaksen, nou pa pe vwar i

asosye avek lenfeksyon *COVID*. I parfwa, i nou pe obzerve. I parfwa i bann fenomenn ki nou vwar i arive dan Sesel.

Menm an se moman nou'n annan en zanfan ki'n ne avek bann diformite ki nou pa'n zanmen vwar pou en kantite lannen.

So, i bann fenomenn ki nou vwar dan Sesel e i pa pe asosye avek neglizans oubyen pas asosye avek servis ki'n ganny dirize plis pou sey *manage* sa *crisis* ki nou annan. Mersi Mr Speaker.

MR SPEAKER

Mersi. En pti klarifikasyon avan nou al lo lezot Onorab Pillay? wi.

HON SEBASTIEN PILLAY

Mersi Mr Speaker. Mr Speaker, baze lo sa dernyen larepons ki nou'n gannyen. Eski malgre ki zot in fer sa travay avek bann spesyalis pou gard bann kosalite sa sityasyon kot i annan bann dimoun ki pe *amputate* lebra, lipye eksetera, eski zot pe kontinyen fer en swivi pou vwar ki sa i pa relye petet avek swa pasyan ki sipoze ganny serten swivi pou en lot kondisyon, oubyen relye avek lezot maladi?

Me ki i kontinyen annan sa *monitoring* ki mon pa pe dir

ki sa ki bann spesyalis pe dir pe dir avek Lotorite Swen Lasante i pa korek.

Me selman *given* sa konsern ki piblik pe eksprimen, i kree en problemm avek konfidans ki dimoun i annan pou zot al kot Lopital, e tou dimoun pe rod loportinite pou zot sey *seek second* opinion e zot met en kantite presyon.

So eski servi swen lasante pe met an plas en sistenm *monitoring*, pou asire an se ki konsern tou bann kondisyon ki bezwen vwar en servis spesyalize, zot pe kapab *follow-up* e asire ki sa bann dimoun pe ganny sa swen ki zot bezwen? Mersi Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mr Speaker, pwen ki Onorab in fer, pe demann nou si nou annan en sistenm kot nou fer sir ki nou revi, ki nou *monitor* sa bann kalite *cases*. Wi, nou annan en sistenm kot nou regarde.

Nou annan en sistenm kot nou fer *review* sa bann *cases*. Par egzanp si nou vwar sa pe arive, i pa zis nou vwar, nou regarde apre nou les ale. Nou annan en sistenm ki nou bezwen swiv e si parey *CEO* in

dir, i en fenomenn ki nou pe arive an se moman. Nou bezwen pe swiv pou regarde ki zistans i pe ale.

E parey ou'n dir, eski nou pe regarde si i annan keksoz ki sa dimoun ti merit gannyen avan. Nou fer *case review* e nou regard li son *case* depi komansman, depi pli avan menm i ganny sa problemm lasante pou regarde ki sa ki'n kapab *lead up* tou sa.

So, nou asire poudir nou pe fer sa bann *review* nesaser. Mersi Mr Speaker.

MR SPEAKER

Mersi Minis. Nou a pran en pe kestyon lezot Manm, pou letan ki nou annan disponib. Mon a komans avek Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker, bonzour Minis ek ou delegasyon. Bonzour tou Manm Onorab.

Minis an vi ki i vre ki nou pe ganny bokou konplent lo sa size tretman spesyalize espesyalman pandan sa letan *COVID* Ki nou pe pas ladan.

Bokou dimoun ozordi pe vwar zot dan bann sityasyon kot zot bezwen swen. Kot i konsern dantis ou swen pou lize.

Kestyon i eski Gouvernman ek Minister Lasante i annan okenn plan a lavenir pou permet serten klinik lizye prive tel parey nou kapab met *Vision Care*, ki deza annan en klinik spesyalize e byen ekipe. Ki ti a travay akote Gouvernman e ed donn zwen spesyalize e fer bann pti loperasyon pou dimoun ki pare libreman pou zot pey zot larzan dan ka kot Lopital Sesel i pa pe kapab donn sa tretman atan, me ki pou zot i en ka irzan? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab. Wi letan nou pe remarke, nou realize poudir lizye avek dantis i de servis ki ou prezant proksimite tre pre avek pasyan, e pou sa rezon sa in redwir en pe aköz posibilite lenfeksyon, swa sorti kot travay lasante pou al kot pasyan.

Ou si nou sorti kot pasyan pou vin kot sa travayer lasante. Alors sa in redwir e nou pe fer tou bann ki neser. Parey ou dir, si i irzan i ganny vwar e si i pa tro irzan i ganny anvoye pou en lapwentman pli tar.

Si konmela Minister Lasante in mazine pou les

lezot akter dan sa servis fer zot loperasyon, nou, nou ankouraz dimoun ki oule fer zot servis prive pou fer zot servis prive. Zis nou fer sir ki bann standar ki nou'n mete i ganny respekte e i ganny aplik e a toultan.

Me sa ki nou kapab asire. Si en bezwen i esansyel, si en bezwen i irzan sa i kapab ganny adrese par servis swen lasante. Mersi.

MR SPEAKER

Mersi Minis. Onorab Lemiel. E apre sa mon a pran Onorab Letourdie, so si ou kapab met ou pare pou al lo *podium*. Onorab Lemiel.

HON SYLVANNE LEMIEL

Mersi Mr Speaker. Bonzour Minis avek Dr Louange e tou Manm Onorab. Tou dimoun ki pe ekout nou. Minis aparaman i annan serten dimoun ki mwan mon'n *come across* e serten dan mon distrik osi ki annan petet kanser lapo.

Zot ti abitye brile zot. Petet i bril tou le Zedi or en keksoz koumsa zot randevou. Me aktyelman sa pa pe ganny fer e aparaman *issue* la i lo kote latizann. I annan en serten lakrenm ki serten sa bann pasyan kanser lapo i servi *fluorouracil*.

E mon konpran napa lo kote Minister Lasante e mon pa konnen si zot pe fer laranzman pou fer vini. Me i paret ti annan serten *request* ki ti'n ganny fer *but it's been over 2 or 3 months* ki sa latizann pa ankor antre.

E sa pasyan, sa bann pasyan zot bezwen war zot depans preski R900 en ti pti tib kot Jivan, ki li i pa menm non. I apel *efudix* i apel kot Jivan. Sa enn.

E pasyan pe sey demande, konmsi zot deza lo en lasistans dezabilite zot pe gannyen, zot pa kapab *afford* pou zot kapab aste 2 sa, i servi petet dan en mwan zot bezwen 3.

So, ki Minister Lasante petet zot, zot pe mazin fer dan sa letan *COVID* la, sa bann pasyan pa pe ganny brile lapo, ki zot pe mazin fer pou kapab fer vini sa bann latizann pou *ease* en pti pe depans lo sa bann pasyan?

E dezyenmman i annan bann dimoun ki pe soufer avek *lumbar scoliosis* e sa bann problem mon pe ganny dir ki agrave. I annan dimoun pli ale pa pe kapab asize, zot ganny lezot problem e zenn dimoun. So, mon konpran ki spesyalis i tou letan anvoy zot bann randevou. I annan ki annan

preski lan e zot soufrans i kontinyen agrave.

Petet lo sa kote osi ki Minister Lasante pe mazin fer pou sa bann serten pasyan dan sa 2 kategori. Mersi Mr Speaker.

MR SPEAKER

Mersi Onorab.

MINISTER PEGGY VIDOT

Mersi Mr Speaker. Mersi Onorab pou ou kestyon. An vi ki tou lede ou kestyon i konsern *scoliosis* ki i spesyalis Dr Louange e osi lo si latizann i annan ou si non napa, koman *CEO swen* Lasante, mon a demann li Mr Speaker si i kapab reponn.

MR SPEAKER

Wi, Dr Louange.

CEO DR JUDE LOUANGE

Mersi Mr Speaker. Mersi Onorab pou ou kestyon e mersi Minis pou pas laparol. Wi, mon pou komans avek kestyon *scoliosis*. Wi nou remarke ki nou, nou remarke ki nou'n met en *pause* lo transfer bann pasyan ki bezwen entervansyon sirizikal pou *scoliosis*.

Nou annan, nou pe *monitor* lalis tre pre e pour lemoman nou pa kapab anvoy pasyan dan Lenn aköz zot

sityasyon *COVID* dan Lenn. E pli enportan i transportasyon aryen sorti Sesel pou al dan Lenn. I difisil an se moman.

Menm, mon'n fek ganny dir ki *MRH* osi ki ti'n komans entrodwi zot *flight*, zot in *cancel flight to India*. So, i fer ki i difisil pou nou transfer sa bann pasyan *scoliosis* to sa sant ki nou afilye avek pou tret zot.

Me *scoliosis* i en kondisyon ki nou pa tret li koman irzan, pou tretman akoz son bann manifestasyon. Akoz *scoliosis* rezon ki nou oper *scoliosis*. I pou anpes progresyon, i pa pou anpes douler.

Scoliosis dan li menm pa donnen douler. Douler i vin avek ou kondisyon fizik, douler i vin avek ou balans ou misk e ou bann *ligament* dan ou kolon vertebral.

Si ou annan douler e ou pa'n rektifye ou douler avan ou loperasyon, en gran posibilite ki ou pou ganny douler menm apre loperasyon.

So, mwan mon pou ankouraz bann dimoun ki annan *scoliosis*, sirtou i plis bann adolesan ki nou annan ki annan *scoliosis* e bann mezir ki mon donnen zot, bann *advise* ki mon donn zot i pou travay pre avek zot *physiotherapy*. Akoz nou ankor annan servis

physiotherapy pou bann ka spesyal.

So travay pre avek zot *physiotherapies* e aprann ki bann legzersis ki zot kapab fer, ki bann *posture* ki zot kapab *maintain* pou zot kapab rektifye sa sentonm enportan pou zot ki douler. E pou nou, lo nou kote.

O moman ki nou kapab anvoy zot dan Lenn, sa sant ki bor ki nou anvoy nou bann pasyan *scoliosis*, nou pou anvoy zot o pli vit posibil. Me pour lemoman nou demann zot korperasyon, apros zot *physiotherapies*, ganny bann *advise* ki mannyer zot pou kapab rektifye sa bann douler ki zot pe gannyen. Ki vre pou zot, zot pe ganny douler.

Lo kote medikaman, i en pwen ki ou'n fer sorti ki mon pa okouran. I pa lo en lalis ki'n *catch* mon latansyon. I pa'n ganny monte dan mon latansyon.

E menm lo kote klinik, mon krwar i enportan ki nou *maintain*. Parey pou *oncology*, nou pe *maintain* en klinik *oncology* e nou vwar menm nou bann *statistic* i *maintain* pou *oncology* e sa *oncology*, menm nou servis in *down scale*, nou kontinyen fer sir ki *oncology* i en tretman ki nou pe priyorite.

Nou met *emphasis* ki i kontinyen.

E pou sa *skin cancer* pou kanser lapo, nou ava pran kontak avek nou tim, pou fer sir ki si in arete nou pou re pran li.

Pou *urology*, klinik ki nou'n *maintain* i en klinik kanser pou *urology*. So, i annan rezon akoz nou pou aret klinik kanser lapo. Mersi Onorab. Mersi Speaker.

MR SPEAKER

Mersi Dokter. Onorab Letourdie

HON JANY LETOURDIE

Mersi Mr Speaker. Bonzour tou dimoun. Mr Speaker, mwan mon ti a vreman kontan aport mon sipor pou sa kestyon Onorab *LOTO*, akoz mon vwar li i vreman annan en gran merit. I vreman i vre i annan sa bann konsern deor.

Mr Speaker, me osi mon ti a kontan dir avek nou popilasyon osi, annou pran nou responsabilite byen akoz *let alone* bann dezas natirel ki vini pou nou met bokou lenpak lo nou sistenm lasante.

Me nou dimoun annou fer sir ki nou fer, akoz nou deza vwar poudir nou annan en gran kriz, nou annan *COVID* ki pe enpakte par lo la nou annan

lezot konsern ankor ki parey kestyon.

E alors annou pran nou responsabilite koman Seselwa, annou pa al rod keksoz an plis, pou al met bonm, pou al fer plis dimoun soufer, pou al met plis keksoz lo Minister Lasante.

(APPLAUSE)

MR SPEAKER

Onorab.

HON JANY LETOURDIE

Mr Speaker, i en pou enpakte lo nou sistenm Lasante.

MR SPEAKER

Pas lo ou kestyon. Pas lo ou kestyon silvouple.

HON JANY LETOURDIE

Ok, wi Mr Speaker. Selman an pasan mon pe dir sa koz i vre i pou fer en gran lefe.

Mr Speaker, ou'n dir ki. Minis ou'n dir ki petet la a sa moman bann tes spesyalize parey kot *city scan*, *MRI*, i pa pou ganny fer *unless* sa dimoun i vreman irzan, irzan.

Me selman Minis, mon ti ava met a ou latansyon, akoz i annan kliyan petet ki li i pe santi son douler tanzantan. Dizon par egzanp tanzantan mon pe santi en douler later tanzantan. Konmsi mon anvi

ganny en lopinyon pou gravite mon problem, alors ki rekour ou kapab dir li.

Dezyenm kestyon mon ti ava kontan atraver ou Mr Speaker, adres li pou Dr Louange, eski ou ti a kapab a ou avi Dokter, sey dir petet kwa ki pe koz sa rise dan sa zafer *amputation*, e ki bann prekosyon petet ki ou ti ava *advise* dimoun ki zot bezwen pran? Mersi, Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Onorab koman ou'n dir poudir i annan gran konsern, dimoun i santi poudir zot swen pa pe ganny donnen parey zot, zot ti ava kontan.

E mon konnen poudir lasante i en keksoz ki sansib. Ler nou annan en mo, nou tou nou ti a kontan konnen ki sa mo e ki mannyer pou fer arete.

E nou pe fer nou mye e nou ava revwar ankor nou bann servis e revwar koman nou kapab si ou le entrodwi sa ki fodre re entrodwi tout an fer sir ki bann resours ki nou bezwen i a nou laporte.

E nou konpran, nou realize poudir pa tou servis ki

kapab ganny donnen aköz nou dan sa kriz. E sa kriz malerezman i afekte nou en kantite, aköz nou bezwen donn swen bann dimoun ki ganny afekte par *COVID*.

Alors nou demann zot konprenezon me nou kapab asir zot poudir nou ava fer nou mye pou revwar kote ki annan posibilite ogmante, ogmant servis nou ava fer li.

Ou lot kestyon i pou Dr Louange. I ava reponn si Mr Speaker, i permet. Mersi.

MR SPEAKER

Dr Louange, wi.

CEO DR DANNY LOUANGE

Mersi Mr Speaker. Mersi Onorab pou kestyon, mersi Minis pou pas laparol. Pou komanse, mon pa pou dir ki i annan en logmantasyon dan anpitasyon. E i vre ki nou'n vwar 3 ka resaman e nou pe kontinyen *monitor*. Si i annan en logmantasyon nou ava fer piblik konnen, nou a fer zot konnen.

Lo kote kwa ki en dimoun i kapab fer pou evite ganny sa. Sa ki mon'n mansyonnen, bann blokaz sirkilasyon oubyen bann redwir, sirkilasyon ki ganny redwir dan ou manm enferyer, ou manm siperyer.

I plis pou fer avek ou bann arter. So, i blokaz dan bann aret, dan bann *artery* e sa i annan en kantite faktor. Faktor ki pli komen i bann problem parey tansyon, dyabet. E si, *advice* ki mon pou donnen se fer sir ki zot kontrol, ou kontrol lo ou dyabet, ou kontrol ou tansyon. Sa i premye keksoz, entervansyon ki ou kapab fer ou menm.

Ki mannyer ou kontrol ou tansyon. Ou kontrol ou dyabet. I par dan bann keksoz parey legzersis, ou ladyet e tretman. E fer sir ki ou annan ou tretman, fer sir ki ou pe pran ou tretman byen. E fer sir ou konnen kalite legzersis ki ou fer. E nou annan tou, nou'n deza annan bann *leaflet*, bann *advice* ki nou'n donnen oparavan e ladyet e mon krwar nou'n ganny en kantite *advice* lo ladyet.

E si i annan dimoun ki byen, zot kapab apros zot sant lasante, demann plis *advice* lo ladyet avek legzersis.

E si zot napa tretman, fer sir ki zot retourn. Menm la ozordi, demen, sa semenn. Al kot zot sant lasante, fer sir ki zot annan, zot pran zot tretman, zot pran zot latizann e zot pran zot tretman parey in ganny dir.

Si ou pous li en pe plis ankor. Si ou annan dyabet, ou annan tansyon. E ou anvi konnen si i kontrole. Ou koz avek ou sant lasante, i ava ed ou ki mannyer pou ou kapab konnen si pe byen kontrole oubyen non. Me sa bann *advice* ki mon kapab donnen pour lemoman. Mersi.

MR SPEAKER

Mersi Dokter. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour Minis avek tou Manm Lasanble, tou dimoun ki pe ekoute. Minis anmezir nou pe koze la, 3 *text* i antre lo telefonn. Enn konsernan en zenn fiy 14an ki annan problem lezot e i annan apwentman spesyalis, pa'n kapab vwar spesyalis e pa konnen kan pou vwar spesyalis.

I annan lezot pe konplent problem klinik, i annan problem tansyon, konplent klinik. Pa kapab al zot apwentman e i annan lezot ka ankor Minis ki'n antre.

Le pwen ki mon oule fer sorti Minis, se ki nou sistenm lasante pe ganny konpromi, sirtou sistenm spesyalis, lefe ki sa sityasyon *COVID* Ki nou ladan ozordi e zesyon sityasyon *COVID* ozordi, Mr Speaker.

Minis, dan Sizyenm Lasanble Onorab Ramkalawan ti dir si en glob pa alimen lo poto, Minis pou bezwen *resign*.

Minis mon kestyon, eski ou'n ganny demande pou *resign*, ouswa eski ou pe mazin *resign* akoz sa sityasyon ki nou ladan ozordi ? Mersi bokou, Mr Speaker.

MR SPEAKER

Onorab Cosgrow, mon a fer ou remarke ki ou kestyon i al an deor *scope* kestyon ki'n demande. Mersi. Minis, mon permet ou laparol pou adres porsyon kot Onorab Cosgrow ki ou konsider i relevan avek ou kestyon.

MINISTER PEGGY VIDOT

Mersi Speaker. Onorab mersi pou ou premye bokou kestyon. Selman ou dezyenm kestyon i pa mon lentansyon.

(APPLAUSE)

MINISTER PEGGY VIDOT

Ou premye kestyon, si i annan dimoun ki pa'n ganny en *appointment*, tou le Zedi ler i fer *press conference*, Dr Louange i koz ek dimoun pou dir si zot annan en *appointment* ki zot pa'n gannyen, ki fodre zot fer.

Si, i annan en dimoun ki pa'n ganny son apwentman i

kapab *call* son sant lasante, vwar e si i bezwen ganny vwar spesyalis irzan i pou ganny fer. E si son Dokter i bezwen ganny en diskisyon avek son spesyalis i pou ganny fer. Alors i annan en sistenm an plas e nou demann dimoun pou swiv sa sistenm.

An menm tan realize poudir dan tou pei, i pa zis isi, dan tou pei ki'n ganny afekte par *COVID*. Servis swen lasante in diminyen. E alors Sesel pa en eksepsyon.

E dan tou pei kot in annan Minis Lasante, zot pe zer zot *COVID* sityasyon lafason ki zotpanse avek resours ki zot annan. E sa i pe kontinyen e mon annan lentansyon kontinyen. Mersi.

(APPLAUSE)

MR SPEAKER

Mersi. Mon a rapel bann Manm, gard zot kestyon lo size kestyon orizinal ki'n demande silvouple e evit bann remark ki retard nou. Onorab Woodcock.

HON WAVEL WOODCOCK

Mersi Mr Speaker. Mon kontan ki Minis Cosgrow pa ti *resign* ler i ti Minis, pandan letan ki i ti ...

(laughter)

MR SPEAKER

Onorab Woodcock demann ou kestyon. Demann ou kestyon.

HON WAVEL WOODCOCK

Wi, wi. Mon kestyon Mr Speaker. I annan konsern ki bann spesyalis pa pe al Praslin parey oparavan e i annan plizyer pasyan avek bann maladi kronik ki en pe letan zot pa pe vwar spesyalis e i annan pasyan ki'n menm esper, *well* pres 2 mwan.

Alors, akoz sa defayans e ki ou Minister pou fer pou rektifye e en pe sa sityasyon bann spesyalis ki mont lo Praslin? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab parey nou pe dir, nou'n annan en rediksyon dan bann diferan servis spesyalis e pou plizyer rezon. Me selman, menm sistenm ki mon'n eksplike ki aplikab pou Mahe, i osi aplikab pou Praslin. Kot bann spesyalis i vwar bann dosye, i diskit avek bann Dokter dan sa bann servis.

Me osito ki i posib, osito ki nou vwar poudir lakantite ka ki nou annan dan bann diferan landrwa i komans diminyen, i

permet nou re ouver serten servis, nou promet zot poudir nou pou fer.

Me pour lemoman la sityasyon mannyer i ete i grav, i serye. Nou pa pe kapab donn tou servis ki nou ti donneren avan *COVID*. Mersi.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Bonzour Minis e Dr Louange. Minis eski ou kapab eklersi lepep an term protokol, sirtou kot i konsern bann pasyan ki al fer tretman aletranze e ki ler zot tournen, spesyalis pe donn zot en preskripsyon ki dir pou 3 mwan. E ler sa 3 mwan i fini, bokou zot pe vwar difikilte pou ganny serten sa bann latizann ki sa Dokter laba in preskrir, sa spesyalis.

Eski zot pe mazin pou fer bann swivi neseler pou kapab, en pti pe parey Madanm Lemiel in nonm en latizann. Sa *fusidic*. Eski zot pe mazine pou kapab rod fason pou fer sir ki *the supply* sa bann latizann i *flow* baze lo sa bann rekomandasyon preskripsyon ki zot pe ganny donneren.

E dezyenman Minis, kot i konsern nou klinik spesyalis *outpatient*. Spesyalman Twa

Zonn, ki mon konnen in ganny enteripte akoz *COVID*.

Me Minis, eski ou kapab pete eklersi nou osi, akoz i annan pasyan ki pe esper serten lenformasyon, menm si zot pe anvoy *email* osi, *email* pa pe ganny reponn baze lo bann rekomandasyon ki Lopital menm in dir avek zot, pou zot kapab ganny bann lenformasyon, akoz zot pa kapab vini an personn.

Eski zot pe mazin etabli en pli bon *patient information sistenm*, pou fer i sa bann pasyan ler pe atann en larepons zot kapab gannyen, me pa esper en long dele letan? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. E mon ava demann Dr Louange pou azoute lo la. Me souvandfwa letan en pasyon i al aletranze e parey ou dir, i annan de medikaman ki dan sa landrwa kot i ete i kapab ganny preskrir.

Isi Sesel sa ki nou annan se en *essential drug list*. Nou vwar souvan poudir en pasyan kekfwa i vini, laba in donn zot en medikaman kekfwa aki en *brand name*. Isi pou nou redwir

nou *cost* lasante, nou tant pou nou *go lo generics*.

E souvandfwa letan en pasyan, si in abitye pran, dizon in abitye pran en keksoz parey ki apel *Paracétamol or Panadol*, nou donn li *Paracétamol*, i dir ou i pa menm zafer. Or si nou i dir ou i apel Advil, laba in pran, i pa menm zafer.

So, nou annan en pe sa sityasyon. An menm tan, si i annan en pasyan ki lo en medikaman e ki isi sa medikaman i pa lo en *essential drug list*, nou annan en Komite ki vwar tou sa bann *case koumsa* e ki deside si i neserer pou sanz li pou met li lo en medikaman ki zot konnen i marse, i bon pou sa kondisyon.

Ou si non, si i bezwen kontinyen lo enn sa medikaman. E si i bezwen kontinyen lo sa enn medikaman, zot fer vini sa medikaman koman en *non-stock item*. Nou annan bokou ka ki koumsa.

Me selman avek *COVID*, pa zis isi, i partou. Nou'n vwar i annan en retar pou nou re ganny serten *stock* latizann parey nou ti abitye gannyen. En bon kekfwa, latizann oparavan ti plito Sid Afrik ou si non *Maurice*. Alors nou ti ganny en pe pli vit.

Me prezan ki nou bezwen al pli lwen, sa i annan en serten retar. Me nou fer nou mye pou nou fer sir ki sa tretman sa pasyan pa ganny konpromi, pa ganny arete ou enteronpe. Me mon ava les Dr Louange si ou permet Mr Speaker, azoute lo la si fodre.

MR SPEAKER

Dr Louange wi.

CEO DR DANNY LOUANGE

Mersi Mr Speaker. Mersi Onorab pou ou kestyon. Mr Speaker, mon krwar Minis in reponn tou, in reponn sa kestyon byen e i vre ki depi komansman *COVID*, nou'n met en Polisi an plas pou nou redwir bann medikaman ki anba *brand name*.

Akoz oparavan nou ti annan detrwa pasyan ki nou ti pe organize ki zot kontinyen ganny zot tretman anba en *brand name*. Me Polisi prezan in sanze aköz avek nou sityasyon ekonomik. Nou fer sir ki nou annan tou bann medikaman esansyel ki nou kouver lasante pou tou dimoun.

Me bann medikaman ki bann *brand name*, nou fer sir ki i annan son menm medikaman, me son, nou apel li son *generic name* dan Sesel. Ki i fer sir ki parey Minis in dir, tretman sa

pasyan pa ganny konpromi e i kontinyen. Me Mr Speaker, Minis in reponn kestyon. Mersi.

MR SPEAKER

Mersi. Nou letan pe al terminen lo sa kestyon. Me mon a permet Onorab Georges. Dirizan Zafer Gouvernman en dernyen moman.

MR SPEAKER

Eskize, Onorab Georges, ou kestyon silvouple?

HON BERNARD GEORGES

Mersi Mr Speaker. Mr Speaker, mon kestyon i relye avek repons ki Minis in donn Onorab Cosgrow. Minis in fer nou konpran ki non selman isi, me partou dan lemonn sityasyon *COVID-19* in fer ki bann lezot servis in bezwen ganny redwir pandan ki bann servis lasante i *tackle COVID*.

Mon ti a kontan si Minis i kapab konfirman, ki si ou le pli vit posibil ki Seselwa i pran zot responsabilite vizavi *COVID* i ganny vaksinen e i swiv bann konsey *Public Health*. Pli vit ki sityasyon *COVID* ava ganny met anba kontrol, e sityasyon Lopital ava retourn normal pou ki bann problem ki *Leader Lopozisyon* in souleve bomaten

i ava retourn dan en sityasyon normal. Mersi.

MR SPEAKER

Mersi Minis. Ou ava adrese.

MINISTER PEGGY VIDOT

Mersi Mr Speaker. Mersi Onorab. Wi mon konfirman ki i depan lo nou tou, lo sak enn de nou endividyel pou fer sir ki nou pran nou responsabilite, anver tou sa ki nou bezwen fer pou protez nou lekò an premye lie kot COVID-19.

Pour nou swiv tou bann konsiny sanniter ki nou met an plas. E pou fer sir ki nou pa zis dir poudir sa i an plas. Me nou osi nou viv sa ki nou pe dir. Si in dir pou nou pa ralye, pou nou pa fer group. Annou esey pa fer.

Si nou tou nou kapab sey fer sa pou detrwa semenn e pran vaksen, bann ki pa ankor. Ankouraz tou dimoun ki nou konnen i merit pran vaksen, annou ankouraze pou fer pran.

Nou konfirman ki si tou sa bann konsey i ganny fer, nou pou sorti dan sa pandemi en pe pli vit ki si nou kontinyen fer sa ki nou pe fer. Akoz sa in montre, lasyans in monte poudir sel fason pou sorti dan sa pandemik.

Alors Onorab ou byen. Si nou tou nou pran nou

responsabilite endividyel, nou ava ed nou pei pou sorti dan sa sityasyon ki nou ladan, e nou promet nou *from* lasante ki nou a fer sir ki servis swen lasante i a retourn, pou donn tou dimoun servis ki zot bezwen a ler ki zot bezwen, tout an personn kont resours ki nou annan. Mersi Mr Speaker.

MR SPEAKER

Mersi Mr Speaker. Mersi Minis, nou pou termin le pou sa kestyon. Nou pou dir mersi, nou pou termin la pou sa kestyon. Nou pou pran lot, Minis. Mon a dir Minis Lasante e Dr Louange mersi pou zot partisipasyon.

MR SPEAKER

Mersi pou zot partisipasyon e *bonne journée*.

***(MINISTER VIDOT AND
HER DELEGATION WAS
EXCUSED FROM THE HOUSE)***

(Interruption)

HON SEBASTIEN PILLAY

Mr Speaker, i annan bann *case* ki dimoun in anvoy kot nou, sa ki nou pe demande se ki nou kapab partaz sa avek Dr Louange. Se sa ki nou pe fer.

Napa *polemic* ladan. Sa bann case, dimoun in anvoy kot nou.

(Off-Mic)

HON SEBASTIEN PILLAY

Be ou pa Speaker ou, aret kwa? I annan en Speaker dan Lasanble.

(Interruption)

HON SEBASTIEN PILLAY

Be ou pa oule donn permisyon pou nou koze, dimoun in anvoy bann *text regarding* zot bann problem. Sa ki nou oule fer se partaz sa avek Minis ! Ou nek ou la, konmsi ou pa met mikro on.

MR SPEAKER

Nou'n etabli lareg pou bann Sesyon Demann Kestyon. Loter kestyon i ganny sans ganny siplemanter lo son kestyon. Lezot Manm nou pran sa ki nou annan letan. I annan plizyer Manm ankor ki'n lev lanmen. E pa zis enn, pa zis 2 i annan plizyer.

Nou annan lezot kestyon pou pran. Nou pou kontinyen avek lot kestyon e Onorab Pillay mon vreman regret ou mannyer ou'n enteronp sa prosedir Lasanble. Mersi.

(Interruption)

MR SPEAKER

Ou'n gannyen ou sans pou demann kestyon. Mersi.

(Interruption)

MR SPEAKER

En moman, wi Onorab Sophola. Mon a les ou koze.

HON NOLINE SOPHOLA

Mersi Mr Speaker. Bonzour. Bonzour tou bann Manm Onorab tou oditer ki pe ekout mwan. Mr Speaker, se la dezyenm fwa Minis Lasante in vin la. Dernyen fwa mon ti annan mon kestyon, menm kestyon ki mon ti anvi demande dernyen fwa, ou pa ti donn mwan loportinite!

(Off-Mic)

HON NOLINE SOPHOLA

La ozordi osi Mr Speaker, ou pa pe donn mwan loportinite.

Mon pa pe koz ek ou, mon pe koz ek Mr Speaker.

(laughter)

MR SPEAKER

Onorab. Ok. Onorab Sophola, mon a donn ou larepons. Si ou annan en kestyon spesifik pou

Minis met li an ekir, anvoy kot mwan. *Ok?*

(APPLAUSE)

HON NOLINE SOPHOLA

Mr Speaker, ou devret donn mwan mon drwa parey tou dimoun

MR SPEAKER

Bann Manm, si zot kontinyen enteronpe mon pou demann zot pou kit lasal. Ase.

(Interruption)

MR SPEAKER

Lord silvouple. Mersi, mon a dir byenveni. Mon a ganny lord silvouple.

Bon, byenveni Minis Errol Fonseka. Minis pou zafer Etern e osi akonpanyen par Mr Ted Barbe, Komisyoner Lapolis. Nou pou komans avek kestyon pou Minis. Avan nou al lo bann kestyon ki lo papye. I annan en Manm ti'n demann mwan en kestyon, demann mwan posibilite pou demann en kestyon lo en size spesifik.

Vi ki sa size i anba investigasyon Lapolis, e dan lanmen Zidisyer mon pa'n kapab permet sa kestyon. Me selman pou eksprim konsern ki annan e lo non Lasanble, mon a permet li fer en *statement* ki in

prepare. E mon a osi demann. Mon'n osi ...

(Interruption)

MR SPEAKER

Mon ki desid *Order Paper* Onorab Pillay.

(Interruption)

MR SPEAKER

Onorab Pillay. Onorab Pillay, dernyen fwa mon dir ou. Si ou pou enteronpe, mon pou demann ou pou kit lasal. Mersi.

Bon, mon pou demann Onorab William mon pou donn li posibilite fer en *statement* lo size ki i ti'n demann mwan.

HON WAVEN WILLIAM

Bonzour Mr Speaker. Bonzour tou dimoun ki a lekout. Bonzour Minis avek *Compol*. Mr Speaker, mon oule remerci ou pou akord mwan laparol. Mon remerci Bondye pou son lagras ek proteksyon divin lo nou pei Sesel. San li, ozordi plizyer nou frer ek ser seselwa ti'n mor e perdi zot gen e sakrifis personnel zot lasyer.

Aprè tou, zot plizyer dwa anba Konstitisyon ti pou'n ganny vyole dan en fason barbar. Swivan lanons lo *SBC*, ki 2 zonm ti'n ganny arete avek

kemikal eksplozif, ek lentansyon sete pou fer eksploz stasyon petrol Grand Anse, Mahe.

Se avek bokou konsern e lenkyetid ki en gran mazorite pep Gran Anse Mahe an partikilye zabitan ki reste dan zalantour Rivière Sèche Estate, dan krwaze Grand Anse e rezyon *BBC*.

Lo non distrik Gran Anse, Mahe mon kondann bann tel aksyon barbar ki si ti'n reisi ti pou'n okazyonn lanmor e domaz e dega lo imen e propriyete.

Mon oule eksprim nou lapresyasyon ek Lafors Lapolis e zot servis lentelizans, ki'n kapab anpes sa lesey. Nou priye ki nou bann zonm ek fanm dan liniform, Avoka ek Zidisyer, a les zot ganny gide par nou kreater dan travay kontinyel pou ganny lazistis.

Mon oule remerisi osi tou bann ki priye nwit e zour pou proteksyon nou distrik, nou pei e nou bann Dirizan. Finalman mon demann tou Seselwa pou reste vizilan e pou raport okenn keksoz ki zot soupsonnen ki kapab en menas ek lafors Lapolis ouswa nou dirizan anver sa demars pou protez enn a lot kont bann tel menas.

Mr speaker, i bon note ki serten sa bann rezidan pre ek

stasyon zot ankor tromatize avek sa konesans. Mersi, Mr Speaker.

(APPLAUSE)

MR SPEAKER

Mersi. Mon espekte ki sa *statement* ki Onorab William in fer i pas osi lo non bann Manm ki ti pou anvi adres sa size e ki sa i le moman ki nou'n adres li e mon pa oule i enteronp larestan sesyon.

Minis si ou anvi, nou realize poudir sa size i *subjudice*. Me si ou anvi dir de mo lo, nou kapab pran sa silvouple.

MINISTER ERROL FONSEKA

Mersi Mr Speaker. Parey ou'n dir, sa *inquest* pe kontinyen arive, e i dan lanmen AG. E i pa en keksoz ki mon pou fer okenn referans lo la. Zis mon anvi *assure* tou Manm Onorab isi, tou dimoun a lekout, ki tou keksoz ti anba kontrol e nou annan total kontrol lo la.

E mon oule reasir zot ki zot napa naryen pou enkyet lo la, vi ki Lapolis ti anba kontrol tou sa loperasyon. E napa naryen pou zot enkyet lo la *at this point*.

So mon a pou kapab fer pli gran, gran komanter lo la pour enstan. *Rest assured* ki nou

vizilan, nou partou. Kantmenm petet zot pa'n vwar en kantite *over reaction*. Pa nesese ki nou annan *over reaction* dan tou sityasyon. Sa ki pli enportan i kontrol e kontrol nou annan. Mersi pou sa e setou ki mon kapab dir lo la. Mersi.

MR SPEAKER

Mersi Minis. Nou a pran kestyon Onorab Audrey Vidot.

HN AUDREY VIDOT

Mersi Mr Speaker. Bonzour Minis avek *Compol*, tou Manm Onorab, zabitan Roche Caiman e tou dimoun ki a lekout. Eski Minis i kapab dir avek sa Lasanble ki Departman Lapolis pe fer pour siport Stasyon Lapolis Mont Fleuri, avek resours nesese pour kapab ranforsi patrol dan distrik Roche Caiman, pour dekouraz bann aktivite ilegal ki pe kontinyen ganny pratike pour ki zabitan Roche Caiman i santi zot pli ensekirite? Mersi.

MR SPEAKER

Mersi. Minis, ou repons.

MINISTER ERROL FONSEKA

Mersi Mr Speaker. Mersi Onorab Vidot pou ou kestyon. Ok, stasyon Mont Fleuri i en stasyon rezyonal ki deservi 4 distrik. Prensipalman,

Plaisance, Roche Caiman, Les Mamelles e Mont Fleuri li menm. Koman en stasyon rezyonal i annan li apepre 52 zofisye Lapolis ki enkli parmi 6 zofisye *CID*.

An vi ki stasyon Mt Fleuri i deservi sa 4 distrik ki mon fek mansyonnen, son lopeyasyon alors i vin ver bann servis ki nou apel *visible policing patrolling*. Servis Lapolis kominoter, prevansyon e deteksyon krim parmi plizyer fonksyon.

Mon ava aret la Mr Speaker, apre mon a kontinyen pli tar si i annan lezot bout ki zot anvi demann mwan. Mersi.

MR SPEAKER

Mersi. Wi, Onorab Vidot, ou kapab kontinyen avek siplemanter.

HON AUDREY VIDOT

Mersi Mr Speaker. Minis Lotorite Distrik pe ganny en kantite presyon sorti kot nou bann zabitan aköz zabitan in fatigue avek sa bann aktive ilegal dan distrik Roche Caiman e zabitan i oule en dele letan. Kan ki zot, zot kapab adres sa bann problem.

E dezyenmman Minis ou ladministrasyon si i pa kapab donn sipor adisyonnèl, apart ki

ou'n mansyonn zis sa bann zofisye ki la.

Si zot pa kapab donn sipor sa stasyon Lapolis pou met en lord, e anmenn lape dan distrik Roche Caiman, mon pou napa swa me zwenn ansanm avek Lotorite Distrik e nou pou komans donn zot nimero personnel, pour ki nou zabitan ler i annan son bann konsern, i a komans *call* zot osi pou zot konnen ki problem zabitan Roche Caiman i pas ladan avek sa bann kalite aktivite. Mersi Mr Speaker.

MR SPEAKER

Mersi. Minis.

MINISTER ERROL FONSEKA

Mersi Mr Speaker. Mersi Manm Onorab pou sa. *Ok*, mon a kouver en pti git lo bann bout adisyonnal ki vin ek sa stasyon Mont Fleuri. E stasyon Mont Fleuri i bezwen benefisye lezot sipor sorti dan bann lezot seksyon Lapolis an zeneral.

Alors baze lo ou bann tandans kalite aktivite kriminel ki Onorab fek mansyonnen. Bann loperasyon stasyon Lapolis rezyon Mont Fleuri i ganny sipor avek bann *unit* seksyon koman *Dog Unit*, *SSU*, *Risk and Disaster Services*, biro Narkotik, (*ANB*) e menm seksyon trafik.

Bann resours adisyonnal ankor ki stasyon Mont Fleuri i gannyen i 5 transpor ki atase avek li, parmi son bann zofisye i osi annan 9 a 10 zofisye pou bann arestasyon spesifik.

Nouvo plan Lapolis i osi enkli revwar stratezi loperasyon Lapolis dan sa kominote, an konsiltasyon avek Lotorite Distrik e lezot partner.

E nou akerir korperasyon ek Manm Onorab, aköz bann lezot korperasyon nou annan i par egzanp *housing* ek *PMC* e nou annan osi sa program respe nou vwazinaz ki kouver tou nou bann distrik. E sa i egzaktaman parey Onorab pe dir. I antre dan komite e rod bann lasistans, bonn korperasyon ansanm ek kominote.

Alors mon *welcome* sa propozisyon ki Onorab in fer, pou li zwenn ek Lapolis, ed zot e mon remerci li pou sa. Mersi Mr Speaker.

MR SPEAKER

Wi en dernyen pwen klarifikasyon Onorab Vidot. Wi?

HON AUDREY VIDOT

Mr Speaker, Minis pa'n donn mwan en dele letan. Zabitan Roche Caiman pe esper en dele letan, kan ki Minister son

ladministrasyon i kapab aport sipor Roche Caiman, pou nou vwar en pe lord dan nou distrik. Akoz zabitan in ganny ase! Nou pa pe vwar. Mersi.

MR SPEAKER

Mersi. Minis eski ou annan en dele letan ki ou kapab propoze.

MINISTER ERROL FONSEKA

Miss travay Roche Caiman, pa zis Roche Caiman, travay lo Mahe antye pe ganny fer. Roche Caiman i parmi tousala. So, mon pa konnen ki Onorab i anvi mon dir ankor.

Me nou la pou travay partou. Roche Caiman definitivman i en landrwa enportan e i en landrwa ovif si ou le.

Pa zis Roche Caiman. Mamelles, *in fact* Mont Fleuri, Corgat Estate. Partou. Tousala. Nou pa kapab zis get en bout san get lezot. Nou get antye e nou bezwen *fluid*, ase *fluid* pou nou kapab bouz partou.

I pou mal osi si ou vwar nou zis en landrwa. So, ler nou pe demann en keksoz la, annou demen en keksoz pou pei antye akoz nou problem partou.

So, mon konpran bann MNAs zot pe get zot bann distrik. Mwan mon bezwen get zot tou. Mon pa kapab get zis

bout par bout. Mon bezwen get antye. Mersi Mr Speaker.

MR SPEAKER

Mersi. Onorab Michel Roucou.

HON MICHEL ROUCOU

Mersi Mr Chair. Bonzour Minis, bonzour *Compol*, bonzour tou zabitan Mont Fleuri. Minis ler mon'n koz en pti pe ek bann zofisye dan Kordgard Mont Fleuri, zot in fer mwan ganny en konpran ki zot annan en pe konsern lo kote bann *items* ki zot servi, parey lo kote *handcuffs* en pti pe. Si, ou kapab vwar en pti pe pou asiste zot en pti pe avek sa tou. Mersi.

MR SPEAKER

Minis ou anvi adres sa, in fer en lapel.

MINISTER ERROL FONSEKA

Mon'n pran note sa Onorab. Mersi pou sa sizesyon. E toultan nou pe revwar sa bann zafer. E nou koz bokou ek nou bann zofisye konmela. Nou drop in, nou koz ek zot e nou gannyen sa bann *feedback* avek zot, zot bann bezwen.

Parfwa nou pa donn zot sa ki zot demande osi. Nou donn zot sa ki zot bezwen pou fer zot louvraz. I pa neser zis zot demande nou donner. Nou gete ki sa ki bon pou zot osi e

nou diskrit sa ek zot. So, i annan laport ouver la toultan. Mersi Onorab.

MR SPEAKER

Mersi. Onorab Naidu.

HON SATHYA NAIDU

Bonzour Mr Speaker. Bonzour Minis ek ou delegasyon, bonzour tou koleg Onorab e tou dimoun ki pe swiv. An sa ki konsern Lapolis, tou bann defayans ki la se pa bann defayans ki, se bann defayans ki nou'n erite.

E byensir anba ou gidans e anba gidans *Compol* mon annan en konfyans poudir ki zot pou rezourd sa bann problemn.

Ozordi si dan distrik Roche Caiman tou sa bann problemn i egziste, dan tou nou bann distrik i egziste se gras a ki? Mon krwar zot konn larepons.

An sa ki konsern keston, mon swe se ki vizavi patrol, eski zot pe revwar frekans ki zot pe fer patrol? Yer, nou'n vwar dan nouvel i annan en largiman ant en marsan e bann artis.

Si nou pe koz lo *proactive policing*, mon krwar ki *there needs to be boots on the ground*. Akoz sa problemn ti'n kapab ganny evite. Mersi.

MR SPEAKER

Minis.

MINISTER ERROL FONSEKA

Mersi Mr Speaker. Mersi Manm Onorab. *Boots on the ground, frequency of patrols*. Bann eleman tre enportan. Les mon donn zot en pti. Mr Speaker, mon konnen ou'n dir mwan pa koz tro bokou. Kit mon bann *answers short*. Me selman mon bezwen servi sa moman pou eksplik zot en pti git.

Mon pas la Perseverance, *ok*. Perseverance lo en *shift* i annan 10 zonm. Dan sa 10 zonm, 6 i reste Perseverance, 4 i al Anse Etoile. Anse Etoile 4 zonm. Ou annan ou dan ou *control room 2*, i reste 2 deor. So, ou vwar mannyer zonm i ganny manze lo en *shift*. Letan ou get sa 3 *shift* ki marse, ou annan ou 30 zonm. Be ler ou fer deplwayman la, ou zonm i ganny manze ek sirkonstans pou kouver diferan landrwa.

So, Onorab Naidu, mon konpran ki ou pe dir. *Frequency of patrol and all that*. Me selman pou sa lannen antye e nou pe tap for la pou fer *recruitment*. Nou pa'n recruit.

Rezon COVID pa ti kapab fer bann dimoun vin *together*. La nou kapab komans fer e nou pe al *run a course*. *Compol* pe planifye, nou bezwen *recruit*.

Nou bezwen *build more manpower requirements* pou nou fer egzaktman sa ki ou pe dir nou fer. Mersi.

Mon *hope* mon'n *answer* ou kestyon lo sa legzanp ki mon'n donnen. Mersi.

MR SPEAKER

Mersi Minis. Onorab Arissol. Sandy.

HON SANDY ARISSOL

Mersi Mr Speaker. Bonzour Minis, Bonzour Mr Speaker, tou Manm Lasanble Nasyonal. Mr Speaker, mon ti a kontan demann Minis, an vi ki Onorab Vidot in Manm Lasanble Roche Caiman pou plizyer lannen e *US* in o pouwar pou plizyer lannen e zanmen zot in anvi sey met keksoz anba kontrol. Zanmen zot in sey anvi met en pe lord, me zot in plizoumwèn sorti bann fouter dezord, soutir bann dimoun ki vann drog avek nou bann zanan.

Alors, e la ozordi zot pa'n fer nanryen ...

(Interruption)

MR SPEAKER

Onorab, Onorab Arissol. Onorab Pillay. Dernyen fwa. Eski ou pou kontinyen enteronp mwan? Ou pe

enteronp mwan? Ou pe enteronp Lasanble.

Onorab Arissol demann ou kestyon silvouple.

HON SANDY ARISSOL

Mersi Mr Speaker. E ...

HON AUDREY VIDOT

(Off-Mic)

Ou pa fer li *retract* sa ki in dir ?

MR SPEAKER

Non. Onorab Arissol demann ou kestyon.

HON AUDREY VIDOT

(Off-Mic)

HON SANDY ARISSOL

Mersi Mr Speaker.

HON SEBASTIEN PILLAY

(Off-Mic)

MR SPEAKER

Arete. Onorab Pillay mon pou demann ou sorti dan lasal. Sorti silvouple. Sorti!

(APPLAUSE)

MR SPEAKER

Akoz ou'n enteronp mwan tro bokou. Sorti!

(Interruption)

MR SPEKAER

Serzan, mon pou demann ou ed Onorab Pillay pou sorti dan lasal silvouple.

HON SEBASTIEN PILLAY

(Off-Mic)

MR SPEAKER

Pou larestan sa peryod, sa peryod ki nou ladan la. Ou kapab tournen *next*.

HON AUDREY VIDOT

(Off-Mic)

Mr Speaker, mon annan en *matter of privilege*, mon kapab demande silvouple?

MR SPEAKER

Wi, ki ou *matter of privilege* Onorab?

HON AUDREY VIDOT

Mr Speaker, i pa byen e dan nou *Standing Order* i dir kler. Si en Manm li i santi i anvi fer lakizasyon lo mwan, Onorab Vidot dir li anmenn en Mosyon. Ki i pe per? Anmenn en Mosyon, anmenn son bann lenformasyon ki dir. I pa kapab vini zis fer bann fo lakizasyon devan Lasanble Nasyon, pou donn en fo persepsyon lo mwan, Onorab Vidot. I pa byen ! I

bezwen annan respe koman en *Chief Whip*. I bezwen ...

MR SPEAKER

Onorab Vidot, mon pa'n tann Onorab Arissol fer en lakizasyon kont ou.

HON AUDREY VIDOT

(Off-Mic)

La pou la ou pa'n tann li Mr Speaker. La pou la. I byen Ou pa tann li. Ou'n seryezman pa tann li Mr Speaker ? La pou la?

MR SPEAKER

Onorab Vidot, *order!* Silans ou osi! *Ok?*

HON AUDREY VIDOT

(Off-Mic)

..... i pa kapab vin dir keksoz koumsa ...

MR SPEAKER

Onorab. Onorab Vidot, mon pou demann ou sorti dan lasal silvouple !

(APPLAUSE)

MR SPEAKER

Onorab Arissol, poz ou kestyon.

(Door bangs)

HON SANDY ARISSOL

Mr Speaker. Mr Speaker.

MR SPEAKER

Poz ou kestyon silvouple.

HON SANDY ARISSOL

Mr Speaker, mon ti a kontan rebran mon kestyon apre sa bann *disturbance*. Mon fer li byen kler, mon fer li onnet Mr Speaker. Mon kestyon ki mon ti anvi demann avek Minis, an vi ki Onorab Andrey Vidot in Manm Lasanble pou plizyer lannen Roche Caiman, an vi ki Parti US, zot in la pou 43an, zot pa'n anvi met lord dan Roche Caiman. Parti US zot pa'n anvi met lord dan Roche Caiman. Me nou'n vwar en kantite dezord dan Roche Caiman ;- lo drog, lo vyolans, lo plizyer keksoz in arive dan Roche Caiman.

E la mon pa'n tann personn lo kote US kondann lensidan bonm ki'n arive Grand Anse, ki ti pou arive Grand Anse.

Mon ti a kontan demann Minis...

MR SPEAKER

Onorab. Eskiz mwan Onorab Arissol, ou a rapel ki mon'n dir mon'n permet Onorab William pou kouver sa soz, pou pa lev sa size.

HON SANDY ARISSOL

Annou pa lev sa ankor. Bon, mon a *retract* 'bonm.' Mon *retract* 'bonm.'

MR SPEAKER

Kontinyen.

HON SANDY ARISSOL

Mon ti a kontan alors demann Minis avek *Compol* ki la, eski in annan en konplent formel pandan tou sa bann lannen olye zis sa 8 mwan la. Eski in annan en konplent formel sorti kot Lotorite Distrik Roche Caiman an relasyon avek bann dezord, bann aksyon anti sosyal ki pe arive dan sa distrik? Mersi bokou Mr Speaker.

MR SPEAKER

Mersi Minis.

MINISTER ERROL FONSEKA

Mersi Mr Speaker. Mersi Onorab. Natirelman mon ti'n bezwen konsilte *Compol* lo la akoz sa i dan lepok pase. I posib in annan serten *complain* lo Kord Gard Mont Fleuri si in arive. Me nou napa okenn rikord formal ki *Compol* i dir mwan in ganny fer. Mersi Mr Speaker.

MR SPEAKER

Mersi. Onorab Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou Manm prezan, bonzour tou dimoun ki a lekout.

Mr Speaker, vi ki Minis dan son *statement* in nonm en pe, in nonm sa 4 distrik ki pe ganny deservi sa Kordgard, so in nonm Plaisance ladan. Mon ti a kontan konnen ki plan nouvo Komisyoner, vi ki i la ozordi avek nou.

Nou ti koz sa ler i ti vin la, akoz dan nou distrik parey mon ti dir ou avan nou annan en ta bann polisye ki'n pran *retirement*.

Nou bann polisye ki'n pran *retirement* i lo bann nivo Sef Sirentandan tou nou annan, nou annan Sirentandan, nou annan Lenspekter ek plizyer lezot ankor.

Me mwan mon santi sa bann dimoun, dan mon bann parkour dan distrik nou'n ganny bann dyalog, ki kekfwa zot ti a kontan zot osi kontribye dan lakominote vi ki zot in la.

So, la mwan mon kestyon i eski zot annan en plan long term pou zot get sa bann dimoun. Kefwa donn zot serten *training* ouswa ankadre zot dan lakominote, ki sa dan li menm i ava tir en pe presyon

dan Lapolis, vi sa bann dimoun parey nou'n dir, zot in *train* dan bann letan.

Letan kolonyal, avan ki nou sistenm Lapolis '77 ti ganny enteronpe pou li vin parey i ete ozordi. Mersi Mr Speaker.

MR SPEAKER

Mersi Onorab. Minis.

MINISTER ERROL FONSEKA

Mr Speaker. Mersi Onorab Labrosse. I toutafe normal, si ou annan talan. Si ou annan leksperyans, si ou annan keksoz pou kontribye ki ou servi tou sa ki ou annan. E parey ou'n eksplike i annan en kantite talan ki dimoun i al avek ler i fini en louvraz. E nou, nou rekonnèt sa. E alors dan program *Commissioner*, in diskrit sa ek mwan.

Sa nide pou rod dimoun, ou kornen par ler zis en pti *advisory* ou gannyen, i pa *really teaching*, i en fason ki dimoun ki annan serten leksperyans, i vini i fer serten prezantasyon dan laklas, i donn son leksperyans. Tousala i azout ek lenformasyon, *training* ki ou pe donn dimoun.

So byensir Onorab. Byensir sa bann dimoun si zot *volunteer* pou vin asiste nou, nou la pou *fit them in* dan nou

bann program. Mersi pou sa osi. E ou kapab pas sa lenformasyon ou osi avek zot, sa i dan nou program. Mersi.

MR SPEAKER

Mersi. E setou lanmen ki mon ti annan ki ti'n leve. Onorab Georges wi.

HON BERNARD GEORGES

Mersi Mr Speaker. Mr Speaker, tre briyevman. Minis in koz lo mank *boots on the ground*, manm kapasite e lafason ki zofisye i ganny deplway dan en distrik. Nou pou pran sa e nou konpran osi mank resours.

Me mon ti a kontan demann avek Minis si enn bann fason pou rezourd bann problem bann sou distrik parey Roche Caiman, parey Les Mamelles se pa pou met en *police post* dan sa bann sou distrik avek enn oubyen 2 zofisye la.

E a sa moman, anfen, si Minis i krwar ki sa i en posibilite, malgre ki li menm li i pou demann an mendev sipleman.

Si i krwar ki sa i posibil, mon kapab dir avek Minis ki i annan bokou dimoun deor ki pare pou *sponsor* sa bann *police post* dan bann distrik.

Donk i pa pou kout Gouvernman naryen, me zot

pou bezwen zis trouv bann *boots on the grounds* pou met dan sa bann *police post*. Mersi.

MR SPEAKER

Mersi. Minis.

MINISTER ERROL FONSEKA

Mersi Mr Speaker. Mersi Onorab Georges. Ou konnen, ou bezwen *police post* akoz, sa *police post* i servi 2 keksoz prensipalman. I servi koman en *control room* pou kontrol loperasyon. Savedir i annan en radyo, i kapab koz ek tou son bann dimoun ki *on the field* e i ganny lenformasyon, partaz lenformasyon e re anvoy direksyon lo son bann *team*.

An menm tan sa stasyon dan bann diferan distrik i en landrwa permanan kot piblik i konnen si i annan en problem i kapab tay laba. So pour sa rezon ou bezwen annan sa. Akoz sa piblik li i bezwen annan sa lasistans.

Me sa nide, mon krwar ou menm ou ti fer sa referans bann *small mobile police post*. I osi enportan akoz si ou pe *run* en loperasyon la, ou kapab redwir ou *manpower* akoz si ou annan ou *one control room* avek 2 dimoun ladan, i kapab kontrol plizyer loperasyon ki pe arive dan *north* si oule, *as long* ki loperasyon i mars byen.

So ou bezwen fer bann test *antenna test* pou fer sir ki ou annan bon kominikasyon.

E sa i *mobile*. So ou kapab bouze. Ou konnen pli boner mon'n koz en pti git lo sa bann *shift* ki mannyer in *no time* ou servi 30 zom, selman dan sa 30 zom, selman ler ou pe pas Anse Etoile ou vwar zis 2.

Ou dir oli mon 30 zom, napa. Akoz ou'n *break it down* dan bann *shift*. Ler ou pe servi zom pou fer loperasyon, ou manz en kantite *manpower*. So 30 zom, *one platoon*. Fini konmsa. Ou kit 6 la Perseverance, ou met 4 laba Anse Etoile lo en *shift* ki annan 10. Fini ganny manze.

So si ou annan sa bann pti *post* la, ou kapab deservi, ou *control room* ou *minimise* sa. Ou deservi plizyer loperasyon ansanm. So, i annan bann lezot teknik ki nou kapab fer. Akoz si ou pe fer ou *community policing, intelligence-based*, pa neser ou annan, ou *saturate* landrwa 24 lo 24. Ou *saturate* landrwa dapre ou loperasyon ki ou pe fer, baze lo ki ou anvi *achieve* pou sa loperasyon. So, la ou kapab. Ou kapab ek menm kantite dimoun ou kapab vin en pti pe pli afektiv.

So i annan en kantite keksoz ki nou bezwen anmennen. Tousala aprezan,

ou bezwen *train* dimoun pou travay koumsa. Me nou a bezwen travay en lot fason. La ou bezwen *build in training*.

So tousala, sa bann rezilta ki zot pe rode i la li, selman i annan son moman ki nou bezwen *build up to it*. So *this is really* fason ki nou bezwen rezourd sa bann problem. Mersi Mr Speaker.

MR SPEAKER

Mersi. Nou ava aret la avek sa kestyon e nou a re pran travay 11er avek lezot kestyon pou Minis an prezans Komisyoner. Mersi.

(BREAK)

MR SPEAKER

Bon nou a kontinyen avek kestyon. Prosen kestyon ti pou Onorab Rocky Uranie. Mon vwar li i pa dan lasal, alors nou a kontinyen avek Onorab George Romain.

HON GEORGE ROMAIN

Mersi Mr Speaker. Bonzour Minis, bonzour *Compol*. Bonzour tou dimoun a lekout, e en bonzour spesyal pou tou zabitan Anse Etoile. An vi ki stasyon Lapolis Anse Etoile in fermen pandan sa bann dernyen mwan, e ki Anse Etoile i enn parmi nou bann pli gran

distrik, sa ki nesesisit sirveyans e prezans Lapolis, eski Minis i kapab dir nou, ki bann zefor ki an plas an se moman pou asire ki Anse Etoile i kontinyen ganny servis Lapolis pou ki distrik i reste dan lord, lape e trankilite?

Mon dezyenm kestyon, ki plan ki son Minister i annan pou reouver stasyon Lapolis Anse Etoile? Mersi Mr Speaker

MR SPEAKER

Mersi. Minis, repons.

MINISTER ERROL FONSEKA

Mersi Mr Speaker e mersi Onorab Romain pou ou kestyon. An sa ki konsern Anse Etoile, Mr Speaker, zis pou donn zot en pti pe *background* lo Anse Etoile. Le 19 Mars, sa lannen stasyon Lapolis Anse Etoile ti bezwen ganny fermen tanporerman akoz plizyer ka pozitiv *COVID-19* ki ti pe ganny detekte parmi bann zofisyè Lapolis dan sa Kordgard.

Aprè ki stasyon an antye ti ganny dezenfekte osi e en netwayaz entansif ti ganny fer partou anndan, de tou pli tar ti apre ganny remarke ki sa kordgard ti pe ganny enfeste avek zensek e osi ti annan en kantite mwazi lo miray. Bann *funga infestation*.

Swivan sa plizyer Lotorite konsernen ti ganny konsilte pou pran en desizyon e kapab pran lo ki pou arive avek sa Kordgard.

Finalman desizyon ti ganny pran pou ki stasyon Lapolis Anse Etoile pou bezwen reste fermen e ki i pa pou kapab ganny servi koman en Kordgard, ziska ler ki bann desizyon e solisyon final i ganny pran e konsernan leta sa landrwa.

Pou note en QS, en *quantity surveyor* i konsilte pou evalye leta stasyon Lapolis e prepar en rapor. Sa rapor in devwal plizyer fe lo leta sa Kordgard e an menm tan propoz plizyer rekomandasyon.

Pou enstan sa kordgard i fermen e la nou ti servi dan distrik Anse Etoile, nou ti konsilte avek ladministrasyon sa distrik e nou ti deside pran sa *internet cafe* ki atase avek batiman biro Administrasyon Distrik pou transform li e akomod Kordgard tanporerman.

E alors depi le 16 Zen sa lannen stasyon Lapolis Anse Etoile ti vin operasyonnel dan biro Ladministrasyon Distrik parey mon'n fek mansyonnen. Mersi Mr Speaker

MR SPEAKER

Mersi. Ou annan kestyon siplemanter Onorab George Romain?

HON GEORGE ROMAIN

Mersi Mr Speaker. Minis mersi pou larepons en pti pe byen detaye. Mon oule profite osi pou remerisye *Compol* pou son sipor ki i ti donnen pou ouver sa *police post* dan ladministrasyon distrik Anse Etoile. Mersi bokou, *Compol*.

Mon de kestyon siplemanter Mr Speaker. Eski Minis i kapab dir avek sa Lasanble si zot pe mazinen ogmant zofisye dan distrik an vi dan koze avek enn de zofisye Lapolis, repons ki mon'n gannyen i kler ki i mank prezans Lapolis dan nou distrik pou ede kapab desarz zot responsabilite pli byen. Sa i mon premye kestyon.

Mon dezyenm kestyon Mr Speaker, eski Minis i kapab dir nou, an vi ki zot pe servi ladministrasyon distrik koman en *police post*. Ki bann difikilte ki zot pe fer fas avek an se moman? Mersi Mr Speaker.

MR SPEAKER

Mersi Onorab. Minis.

MINISTER ERROL FONSEKA

Mersi Mr Speaker. Mersi Onorab pou ou bann kestyon

siplemanter. Wi, parey mon ti a pe eksplike boner, petet mon pa ti'n devret al lo la. Me ler mon ti koz lo Perseverance ki furni zonm pou Anse Etoile. Be i pe furni zonm lo en *shift* 10 dimoun.

Savedir i pe pran 4 zonm i pe met Anse Etoile. 4 zonm, ler ou get sa groser Anse Etoile, mont anler partou dan leo i pa naryen ditou.

E parey mon'n dir boner, ler ou annan 4 zonm en landrwa ou bezwen kit 2 dimoun deryer dan *headquarters* pou *operate* ou radyo apre pou dimoun, pou bann vwazinaz vini si zot bezwen okenn lasistans.

So definitivman pou pwen pou *reinforce* Anse Etoile i irzan. Me i irzan partou. Sanmenm pli boner mon ti koz lo nou *recruitment* ki pa'n ganny fer en pe letan. So, sa nou pe vremen bezwen fer sa *urgently*.

Ki bann defi ki nou gannyen. Natirelman i pa tro *conducive*. Par egzanp i napa en kaso laba. So, la ou pou bezwen, pou loperasyon ou pou bezwen ganny sipor Perseverance.

Be Perseverance i annan 3 kaso, me nou'n *allocate* sa bann kaso osi pou rimann pou bann *juvenile*. Akoz en *single cell*. Nou bezwen en landrwa

conducive pou *juvenile*. Nou pa kapab zis met zot nenport landrwa.

So ou kapab vwar konsernen. Ki nou komans zwe, nou bezwen zwe ek sa ki nou annan. *Ok?* So sa bann kontrent ki nou gannyen ler nou napa landrwa ki'n ganny prepare pou fer sa louveraz.

Sa semen mon krwar, en semenn pase mon ti laba pe get en kou. Ler ou antre dan en landrwa ki pa *conducive* pou sa zofisyete fer sa louveraz i dan en fason ou pa pe donn li sa respe son *uniform*, son *statue*, son lenportans si ou le.

So sa bann keksoz i enportan dan tou bann distrik ki nou fer, ki nou annan bann keksoz apropiye. I pa bezwen neser tro gran li, i bezwen pou sa louveraz. *Design* pou fer sa louveraz e ou'n kalkil tou bann keksoz ki annan son radyo, son kaso. Tou bann keksoz ki ou bezwen dan en kord gard.

So definitivman, lefe ki ou dan en bout *internet cafe* ki ti dan *district administration*, i pa *conducive at all*. Me selman nou bezwen annan en mantalite osi ki kot nou ete nou kapab fer nou louveraz.

E sa lespri *get on with it* nou bezwen met sa dan latet nou bann zofisyete, akoz nou bezwen fer nou louveraz *still* dan

sa lanvironnman ki nou pe travay ladan.

Mon *hope* mon'n reponn ou keston Onorab Romain. Mersi Mr Speaker.

MR SPEAKER

Mersi Minis. Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker, eski Minis i kapab dir nou an vi ki Kordgard Anse Etoile ti pe osi deservi sirtou sou distrik North East Point dan distrik Glacis, ki an se moman napa en Kordgard. Eski dan menm lespri deservi zabitan ou Departman pe mazin met en post Lapolis dan sant kominoter Glacis, kot ti annan enn dan letan *COVID* ou menm dan rezyon North East Point. En landrwa a ki aktivite drog i kontinyelman afekte zabitan.

Oubyen ki mannyer sa servis Anse Etoile i osi kapab deservi vilaz North East Point? Mersi.

MR SPEAKER

Mersi Onorab. Minis repons.

MINISTER ERROL FONSEKA

Wi Mr Speaker. Mersi Mr Speaker. Mersi Onorab Esparon.

In fact Glacis nou pe servi pa neseserman Anse Etoile. Parey mon'n dir Anse Etoile i annan sa ptipti *team* la. So nou servi Beau Vallon pou siport Glacis. Glacis parey Onorab i konnen, sa Kordgard osi in ganny kondannen pou rezon laso, bann *fungus* ki i annan.

Dan tou sa bann vye Kordgard ki'n ganny fer ek laso ek koray. Menm si i annan granit lo la i annan sa bann problemm *fungus*. E ou pa kapab met dimoun ladan pangar i komans ganny asma, bann lezot problemm.

Alors, byen sa i bezwen ganny re fer. Me an menm tan mon tande, Onorab Esparon, petet ou kapab, ou annan en propozisyon, mon tande ou'n dekouver en landrwa ki nou kapab servi tanporerman. Si sa i le ka nou ti a kontan tann sa propozisyon. Pa an se moman me ler nou fini dan Lasanble.

Me pou enstan, pou reponn ou kestyon, nou pe servi Beau Vallon pou siport Glacis. Me natirelman Anse Etoile osi si i annan en ka zot bezwen vin la. Zot a fer li. Mersi Mr Speaker.

MR SPEAKER

Mersi Minis. Mersi Onorab. Nou a pas lo prosen kestyon. E kestyon i pou Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Kestyon i lir, kestyon 27. Eski Minis pou Zafer Entern i kapab donn en kontrandi Lasanble Nasyonal, lo rapor ki i annan plizyer Seselwa ki pe ganny deteni kont zot volonte an Iran, e ki plan Gouvernman i annan pou fer zot retourn Sesel osi to posib e sen e sof? Mersi.

MR SPEAKER

Mersi Onorab. Minis ou a adrese silvouple.

MINISTER ERROL FONSEKA

Mersi Mr Speaker. Mersi Onorab Henrie pou ou kestyon. Mon a konfirm enn de pwen lo la Onorab. Me i annan serten keksoz ki mon pa pou kapab al an detay. Me annou komanse toutfason.

Lapolis i oule konfirmen ki i annan rapor ki bann ka ki'n ganny anrezistre konsernan bann Seselwa ki pe ganny detenir kont zot volonte, dan bann pei o Mwayenn Oriyan.

Aktyelman an se moman i annan 14 ka lo rikord Lapolis. 7 dan sa bann tel ka i pe ganny travay lo la e parmi sa i annan 2 ka ki'n fini ganny konplete e finalize. E enn parmi sa 2 ka in ganny konplet e i kot biro Atorni

Zeneral e lot i deza devan Lakour kot en sispe in ganny sarze pou lofans trafik imen, ki fer nou pa kapab koz plis lo sa.

Mr Speaker, pou rezon sekirite nasyonal e sekirite serten bann endividi dan sa bann ka, nou pou propoze ki nou zwenn avek Komite Sekirite Nasyonal pou diskite sa bann ka.

Me lo rikord parey mon'n dir zot, pou reponn ou kekyon prensipal an tou nou annan 14 ka *missing person* lo rikord. Me dan sa 14 i annan zis sa 7 ka ki'n ganny rikorde pou Mwayenn Oriyan. Lezot ka nou pa pe konnen. Nou napa rikord ki bor egzaktman zot ete.

Savedir ou annan 14, 7 ladan e i annan 2 ki aktivman devan. Mersi Mr Speaker. E Manm Onorab *sorry* mon'n en pti pe kourt lo la. Me sa i le ka. Mersi.

MR SPEAKER

Mersi Minis. Wi Onorab Henrie, okenn siplemanter.

HON GERVAIS HENRIE

Mersi Mr Speaker. Minis mon konpran ou tre byen. Me kekyon ki ganny table menm avan ki sa konfirmasyon par Lapolis ti ganny fer lo televizyon, akoz ou vwar kekyon i mansyonn Iran e vwar la kot mon *supplementary* i vini.

Akoz premye fwa ki Sesel ofisyelman ti ganny enformen lo sa sityasyon, sete dan en konferans lapres letan ansyen Prezidan Danny Faure ti mansyonnen. E *this is where the question comes from*.

So mon anvi konnen. Lo rikord Lapolis, zot annan, kan premye fwa ki Lotorite. Setadir ansyen ladministrasyon ti okouran sa sityasyon? Ki zot in fer avek lenformasyon ki zot ti gannyen, partikilyerman pou enform bann fanmir?

Akoz sa lenformasyon ler ti pase dan konferans de pres ti sok bokou dimoun, partikilyerman bann fanmir ki ti annan en manm fanmir ki ti manke. E *then* zot ti pe dir be ekout en kou, si Lotorite i annan sa lenformasyon all along, ki mannyer zot in *hold it*.

So, mon anvi konnen depi kan ki Gouvernman ti konnen e kwa ki'n ganny fer deza vizavi sirtou fanmir ki i annan en pros ki manke? Mersi.

MR SPEAKER

Mersi Onorab. Wi Minis.

MINISTER ERROL FONSEKA

Mersi Mr Speaker. Mersi Onorab Henrie. Lo size depi kan nou'n konn sa. Depi Gouvernman oparavan. Sa nou pou bezwen donn ou sa

lenformasyon pli tar, nou bezwen fer en pti pe *research* e nou pa oule koze si napa sa *fact*.

Lo kestyon fanmir, *rest assured - again* mon bezwen en pti pe delika lo la, *rest assured* ki tou sa bann fanmir sa 7 ka nou pe *deal* avek i okouran e mon krwar se tou mon pou kapab dir ou lo la. Zot okouran. Mersi Mr Speaker.

MR SPEAKER

Wi, ale. Klarifikasyon ki ou bezwen Onorab Henrie,

HON GERVAIS HENRIE

Wi, vitman Mr Speaker. Mon oule zis Minis i konfirm avek nou. Dan bann ka parey, eski i annan en travay avek lezot antite Gouvernman par egzanp *Foreign Affairs*, kot zot kapab osi solisit sipor bann pei konsernen pou kapab fer nou bann Seselwa retournen osi to posib e sen e sof. Mersi.

MR SPEAKER

Wi Minis.

MINISTER ERROL FONSEKA

Wi Mr Speaker, *again* sa direksyon la, zis mon kapab dir zot ki i annan serten travay, me selman ou bezwen osi pran konsiderasyon ki par ler nou pe *deal* ek bann landrwa, en pti pe

bann *rogue state* si ou le, ou konpran mwan? E larantre lo sa bann *area* i pa tro fasil.

So me selman pou reponn ou kestyon, i annan serten travay pe ganny fer lo sa domenn. Mersi Mr Speaker.

MR SPEAKER

Mersi. Onorab Arissol Sandy.

HON SANDY ARISSOL

Mersi Mr Speaker. Mon ti anvi zis en pti klarifikasyon avek Minis. Mon'n tann ou mansyonn ou pou zwenn avek en Komite. Mon ti anvi konfirman si ou pe koz lo Komite Defans ek Sekirite Lasanble Nasyonal oubyen kekfwa en lot Komite? Mersi Mr Speaker.

MR SPEAKER

Wi Minis.

MINISTER ERROL FONSEKA

Wi, mon dir Komite Sekirite Nasyonal devan Lasanble. Mersi.

MR SPEAKER

Mersi. Mon napa lot Manm ki'n lev lanmen pou kestyon siplemanter. Mon a remerci Minis pou son repons lo sa kestyon. Nou pou pas lo prosen kestyon, selman mon krwar nou bezwen en zanmen zofisye

kot Komisyoner Ted Barbe pou fer son depar e nou pou annan Mr Raymond St. Ange, *Superintendent* prizon. Konmisyoner mon a dir ou mersi en *bonne journée*.

(COMMISSIONER OF POLICE WAS EXCUSED FROM THE HOUSE)

MR SPEAKER

Nou ava apel *Superintendent* prizon silvouple.

Bon byenveni *Superintendent* Prizon, Mr Raymond St. Ange ki'n zwenn Minis pou kestasyon Onorab Phillip Arissol.

HON PHILLIP ARISSOL

Mersi Mr Speaker. Bonzour tou dimoun. Mon kestasyon i lir koumsa. Eski Minis pou Zafer Entern i kapab dir nou Lasanble ki mezir son Minister pe pran pou kontrol sityasyon *COVID* dan prizon? Ki kantite prizonnyen ou deteni ki'n teste pozitiv pou *COVID-19* ziska prezan e sa i reprezant ki pousantaz popilasyon prizon ?

E eski i annan prizonnyen ki pe refize pou pran vaksen? Mersi.

MR SPEAKER

Mersi Onorab. Minis.

MINISTER ERROL FONSEKA

Mersi Mr Speaker. Mersi Onorab Arissol, Anse Boileau. Repons a sa pandemik *COVID-19* servis prizon, pe enplimant sa bann mezir swivan pou sey diminyen lenfeksyon parmi son popilasyon.

Tou bann travayer sa servis in ganny posibilite pou pran vaksen. Sa ti komans depi le 19 Zanvye sa lannen avek premye doz. Dezyenm doz ti ganny administre dan le 24 Mars. Savedir 90 pousan bann travay in konpletman ganny vaksinen.

Dezyenmman, bann ki'n ganny kondannen e an detansyon provizwar, in komans zot premye doz le 18 Mars e dezyenm doz le 8 Avril. 95pousan bann kondannen e detenir in konpletman ganny vaksinen.

Trwazyenmman, doz vaksen pou bann ki vin an rimann, ki vin fiy e an mezir in komans donnen apartir le 7 Me sa lannen.

Katriyenmman, tou dimoun travayer, kondannen e bann dimoun an detenir i ganny donnen *mask*. Bann vizit pou kondannen in redwir pour sa rezon. Bann travay ki antre dan bann lenstalasyon i ganny *screen*.

Bann kondannen ki antre i osi ganny *screen*. Sak semenn, *Superintendent* prizon i fer en *meeting COVID* dan prizon pou get sityasyon. Landrwa i ganny *spray* e *disinfected* 3 fwa par zour toulezour.

Nou pe mazin pou osi azout en *spraying* par en antreprenner prive a eksteryer. *And sanitizer* e lavan lipye i ganny fer dan larantre e sorti bann lenstalasyon.

Bann nouvo kondannen ou detenir i ganny zere an en *zone* detansyon e karantenn e zot ganny sirveye, savedir *monitored* avan ki zot antre dan lenstalasyon kot zot pou pas zot letan.

So zot annan sa moman la ki zot ganny *monitored obviously* pou redwir kontaminasyon. En blok seliler i ganny servi koman en *zone* izolatwar kan i nesaser.

Pou ou dezyenm kestyon; 68 kondannen e dimoun an rimann in ganny teste pozitiv pou *COVID-19*, 66 kondannen e 2 deteni. Anviron 25 pousan pou en popilasyon an mwayenn 272.

3 kondannen in refize pran zot vaksen oubyen zot annan rezervasyon akoz problemn lasante. Sa i finisyon

mon larepons Mr Speaker. Mersi pou sa.

MR SPEAKER

Mersi. Onorab Arissol ou annan siplemanter ?

HON PHILLIP ARISSOL

Yes Mr Speaker. Eski Minis i kapab dir Lasanble si okenn son bann *staff*, Seselwa ou etranze in ganny enfekte avek *COVID-19*. E vi ki prizon i annan son prop klinik, eski zot annan lekipman, resours imen pou donn servis premye swen prizonnyen?

Sa avek bi pou anpese ki prizonnyen i atrap *COVID* ouswa propaz sa viris dan lakominote kan zot pe sorti pou al resevwar swen an deor. Mersi.

MR SPEAKER

Mersi Onorab. Minis.

MINISTER ERROL FONSEKA

Mersi Mr Speaker. Pou premye kestyon, 40 dimoun ti pozitiv, ganny *COVID* e tousala in ganny refer. Mon krwar ou dezyenm kestyon ti ler zot kit landrwa si zot ganny en *screen*? Ou kapab repet sa ankor en pti kou Onorab. Mersi.

HON PHILLIP ARISSOL

Dezyenm kestyon i koumsa. Vi ki prizon i annan son prop klinik, eski zot annan tou lekipman, resours imen pou donn sa servis premye swen zot bann prizonnyen. Sa avek bi pou anpese ki prizonnyen i atrap COVID ler zot sorti, pou al dan lakominote. Ouswa zot ganny COVID, zot propaz COVID dan la kominote. Mersi.

MR SPEAKER

Mersi Onorab. Wi Minis.

MINISTER ERROL FONSEKA

Mersi Mr Speaker. Mon a donn ou en pti rann kont lo *medical centre* lo Prizon. I en Dokter ki travay kot Klinik Prizon dan bann zour ki'n ganny dedye. Ler napa klinik pou vwar bann detenir ou bann kondannen pou RDR. Dan apre midi par egzantp, Dokter i asiste bann klinik eksteryer pou rezon COVID-19 dan kominote.

I annan 3 ners lokal ki ganny asiste par en gard prizonnyen Tanzanyen, ki osi en asistan ners kalifye. Bann ners i travay bann diferan zour pou okip e distribye *methadone* tou le bomaten. Bann referans pou Lopital Sesel i kot lezot klinik, parey kot dantis ou pou servis lasante mantal i ganny fer par Dokter prizon.

Soutyen par Minister Lasante i bon prenon kont sa sityasyon COVID-19 osi bann kontrent asosye avek loperasyon.

Se pandan nou pa pe kapab akse tou servis aköz bann restriksyon ki *obviously COVID* i an plas. Sa en pti rezimen lo nou pti *health centre* ki nou annan kot prizon. Mersi Mr Speaker.

MR SPEAKER

Mersi Minis. Onorab Bistoquet i annan kestyon siplemanter?

HON ROSIE BISTOQUET

Bonzour Mr Speaker. Mersi Mr Speaker. Bonzour Minis ek ou delegasyon. Bonzour tou Onorab e bonzour tou dimoun ki pe ekoute. Mon annan en pti bout kestyon siplemanter aköz sa enn premye nou'n pas lo la. Mon pa oule perdi letan.

Vi ki Minis ou'n dir poudir kot prizon i annan servis debaz lasante, aköz ki prizonnyen i bezwen al kot Anse Boileau klinik oubyen *Health Facility*? Ki swen ki zot al gannyen an plis ki prizon pa pe donner. Mersi.

MR SPEAKER

Mersi Onorab. Minis.

MINISTER ERROL FONSEKA

Mersi Mr Speaker. Prosedir i si *PMO* prizon i refer kot Sant Lasante Anse Boileau, zot ganny teste pou *COVID natirelman*. E zot bezwen al laba akoz parfwa Dokter pa 24 lo 24 kot prizon.

So nou ganny okenn rapor ki sorti kot klinik, sa bann dernyen letan konsernan konplent ki sa sityasyon Anse Boileau i konsernen.

So sanmenm sa rezon ki nou bezwen servi Anse Boileau parfwa e dan bann ler. *In fact* ti annan en sityasyon resaman ki nou ti bezwen fer en *referral*, kot enn sa bann prizonnyen ti a pe pas dan bann *withdrawal symptoms*.

E dan bann ka koumsa ou pa kapab esper Dokter. Ou bezwen pran li anmenn li e Anse Boileau i enn sa landrwa pli pre e pour sa rezon ki parfwa nou servi Anse Boileau. I lo bann sityasyon ki ou pa kapab esper pou Dokter retournen *back to prison*. Mersi Mr Speaker.

MR SPEAKER

Mersi Minis. Mon napa okenn lot Manm ki'n lev lanmen pou kestyon siplemanter. Alors nou pou termin sa Sesyon Kestyon la. Mon pou remersye Minis ek *Superintendent* prizon, Mr St.

Ange pou zot partisipasyon e mon swet zot bonn apre midi.

Pou Lasanble, nou a re pran travay 2er avek kestyon pou en lot Minis. Mersi. Nou a pran poz.

(BREAK)

MR SPEAKER

Bonn apre midi Minis Marie-Celine Zialor, Minis pou Lafanmir, Lazenes ek Spor. E avek Minis pou sa premye porsyon nou annan Mr Fabien Palmyre Sekreter Prensipal pou Lazenes ek Spor, e Mr Jean Larue Sef Egzekitiv *National Sport Council*. Nou a konmans avek kestyon Onorab William. Mersi Onorab.

HON WAVEN WILLIAM

Mesi Mr Speaker. Bonn apre midi Minis avek ou lekip. Minis baze lo leksperyans 43an devlopman sport dan Sesel, eski Minis pou Lazenes e Sport i kapab donn en kontrandi, pou seksyon Sport pou tou, sport onivo e laspe sport konpetitiv, e eksplike ki nouvo stratezi zot pe vin avek dan en fason realis pou kontrol lekspektasyon avek labi ? Mersi.

MR SPEAKER

Mersi Onorab William. Minis ou ava adres son kestyon *please*.

MINISTER MARIE-CELINE ZIALOR

Mersi Mr Speaker. Mon ava konmans dir par bonn apre midi Mr Speaker, tou bann Manm Onorab prezan e tou bann dimoun ki a lekout en si bann travayer Lasanble.

Mersi bokou Onorab pou ou kestyon. Mr Speaker i ase difisil pou fer kontrandi devlopman spor pandan sa 43an ki'n pase be selman mon krwar nou kapab fer en pe *summary* lo la apre dezyenm kestyon i ava pli fasil pou nou reponn.

Mon konmans par Seksyon Spor Pou Tou, i sa seksyon i responsab pou asire ki diferan program ek aktivite lwazir e rekreyasyonnel lo nivo distrik e lo nivo kominoter i ganny fer.

E pandan nou pa pe al pli lwen ki sa de dernyen lannen ki'n pase in annan *comme* bann program legzanp, program pou bann dimoun trwazyenmaz e in annan program pou dimoun avek dezabilite fizik, e in annan program *nature walk* e program bann *nature challenges*.

E zis pou donn enn de statistik program *outdoor pursuit* an 2020 NSC ti anrezistre apepre 600 dimoun e 2021 sa sif in nobou kapab double pou vin 1200 dimoun.

Pou *fitness trail* Roche Caiman NCS 2020 ti anrezistre apepre 450 dimoun e an 2021 sa in vi pli bokou in ariv 3000 dimoun ziska ki ti'n arete aköz COVID.

Pou Spor O Nivo nou'n vwar ki'n annan spor rezilta ek devlopman ki'n progresse ouswa ki'n reste stab par egzanp naze, *volleyball* me parkont in annan por ki'n regrese. *Unfortunately* par egzanp *basketball*, laboks, badminton pou donn enn de legzanp.

E pou ankouraz bann spor ki zot atlet in fer bon rezilta, e ki'n anmenn meday pou Sesel zot in ganny en *allowance* depandan lo zot nivo.

Atlet in osi ganny posibilite pou fer training o nivo aletranze. E zot ganny bann lezot fasilite adisyonnèl pou asire ki zot kapab realiz performans lo en pli o nivo.

E An se moman nou annan 21 atlet ki lo program Spor O Nivo, e si Onorab i anvi plis leklersisman CEO Larue i la e i ava kapab donner, si i dezire.

Trwazyenm kot konsern konpetisyon spor konpetisyon lo nivo Nasyonal se bann Federasyon ouswa bann lasosyasyon ki responsab pou organize pou bann konpetisyon.

E resours pou fer sa i ganny met a zot dispozisyon dapre kapasite ki NSC i annan. E mon ti ava zis swete mansyonn avek sa Lasanble ki nou pe re aranz nou fason ki nou fer sa kalite rapor ki mon pe fer la ozordi dan Minister an antye.

Pou nou pli byen rann kont lo progresyon e lenpak nou bann stratezi, mwan mon menm mon la pe donn sa kalite rapor mon pa tro satisfè me nou pe fer en fason ki nou aranz sa pou nou donn Lasanble en pli bon fason e Lepep Seselwa ki mannyer nou rann kont.

Lo son dezyenm bout kestyon pou nouvo stratezi ki nou pe vin avek. Nou annan 5. Premye devlopman spor lo nivo kominoter kot bann distrik i pou pran *ownership* bann programm avek bann aktivite.

NSC i pou donn gidans e vin en fasiliter e vin en regilater. E sa stratezi i annan bi pou li refer nou bann distrik annan en kantite aktivite sportiv e dan tou bann nou kominote kot i posib.

Nou dezyenm stratezi se kategoriz bann disiplin sportif, pou donn priorite ek lasistans bann Federasyon ek Lasosyasyon ki i annan en pli bon sistenm zesyon. Bann ki demontre kapasite pou devlop son spor e bann ki anmenn rezilta.

Pou nepli sa resours ki nou annan kot nou partaz konman e vwala dan ou kestyon ou'n demande pou anpes labi ki labi i vini.

Trwazyenm stratezi, devlopman spor profesyonnel, kot atlet ki annan potansyel i ganny loportinite pou pran en karyer dan sport. Savedir i pa fer okenn travay i zis fer sport.

I annan Seselwa i annan atlet ki pe fer sa ozordi. Nou de CEO bomaten nou'n ganny sans zwenn Mr Abdel Sylla, e in donn son langazman pou ede pou ki lezot Seselwa ki annan sa abilite i kapab fer sa.

Me nou pa pe koz lo zis lo atlet la nou pe koz lo lezot kad, e Mr Sylla in donn ou en apersi lo bann diferan kad ki nou kapab fer sa.

Parey nivo lantrener ki en lantrener li osi i fer zis son louvraz lantrener i pa fer lezot louvraz, psikolog spor bann nitrisyonnis dan spor e lezot ankor.

E zis pou fer Lasanble konnen osi i annan lezot kad ki i pa popiler Sesel taler Mr Sylla in eksplik nou ki mannyer i annan profesyonnel mon'n blyi son non mannyer i apele la, ki vin mezir zot lipye zot tou sa bann zwer i fer soulye dapre *shape* ou lipye.

Sa i fer i ede fer lavi en profesyonnel pli gran ki nou vwar dimoun konmela 35/40an i kapab fer spor profesyonnel e i anpes ganny bann *injury*.

Katriyenm stratezi, anmenn servis lasyans ek teknolozi medikal lo en pli o nivo;- ki ava ed bann lantreprenner fer zot travay pli byen. Kot zot ava kapab servi lasyans ek teknolozi pou zot travay vin pli profesyonnel.

E nou senkyenm e dernyen stratezi se redevlopman *Sport Complex Roche Caiman* pou met lenfrastruktir spor ki egziste lo en standar enternasyonal. E osi konstri nouvo lenfrastruktir pou atlet ek piblik an zeneral kapab pratik bann nouvo sport, ki konmela napa lenfrastruktir.

E sa landrwa pou osi fer aktivite lwazir e rekreasyonnel pou bann fanmir. Apre tou aköz nou dan sa 3 portfolyo dan sa Minister e nou bann stratezi

sa bann priyorite i pou sa prosen 4an. Mersi Mr Speaker.

MR SPEAKER

Mersi Minis. Onorab William *yes* ou kapab swiv avek siplemanter.

HON WAVEN WILLIAM

Mersi Mr Speaker. Mr Speaker mon ti ava kontan demann Minis si i ti kapab donn en pti pe plis detay aköz mon vwar poudir nou pe bouz dan en nouvo direksyon, sirtou konsernan bann atlet profesyonnel.

Eski i dan en pozisyon pou dir nou par lefe ki zot pou anvi ki sa bann atlet zot fer zis spor. Eski zot in fini tonm dakor lo en *Scheme of Service* ouswa en *package* ki zot kapab raport ek sa Lasanble ozordi ?

E mon dezyenm kestyon se ki konsern Polisi, dan sa nouvo stratezi vizavi bann fasilite sportif o nivo distrik.

Par egzanp Grand Anse Mahé ti'n ganny dezinyen konman en distrik ki ti pou annan en *Sport Complex*. Me *over the years* nou'n vwar poudir i annan bann diferan lentere, bann diferan bann propriyeter ki otour sa lanplasman li menm li.

Eski zot pou finalman pran en desizyon final lo sa

desizyon e an relasyon avek sa desizyon, pou enkli tou bann partiprenan pou fer sir ki a lafen dizour letan en desizyon i ganny pran i ava en desizyon ki'n enplik tou bann *stakeholders* pou en desizyon final? Mersi.

MR SPEAKER

Mersi Onorab William. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mon pou reponn sa dezyenm kestyon Mr Speaker si ou ava permet *CEO Larue* i ava pran sa premye, i ava regarde ki kantite detay la se moman i kapab donnen lo sa program.

Sa dezyenm kestyon lo fasilite nivo distrik, mon krwar Onorab Esparon i annan en kestyon ki i pou demande apre. Si ou permet Mr Speaker nou ava kapab annan en pe detay lo ki manner sa i pou marse, nou ava kapab reponn li a sa moman si ou permet? Mersi.

MR SPEAKER

Wi *CEO* ou ava pran laparol.

CEO JEAN LARUE

Mersi Mr Speaker. Mersi *MNA* pou ou kestyon. Konsernan *Scheme of Service* pou sa

package profesyonnel, a ler aktyel nou pe travay lo la pres pou nou fini. Me parey nou pe dir se ki nou pe target spor ki nou konnen pou anmenn nou meday. E nou konnen i p en kantite, se la ki nou bezwen met nou lenvestisman.

E dezyenmman lenvestisman osi dan sa *scheme* travay avek sa atlet, sa 1, 2, 3 atlet ki pou anmenn nou meday ankor dan 4an dan 8an.

E ankor ozordi si ou vwar Olenpik pe ale i annan 5 atlet, deza i donn ou en nide dan ki lapant nou pe ale avek travay avek zot.

An plis nou pe osi devlop en Kontra, akoz letan nou fer lenvestisman i bezwen annan en Kontra ant sa atlet, son paran, ek *NSC* oubyen Gouvernman.

So sa parey mon pe dir ou sa i anmars, me mon kapab donn zot detay total manner i pou ete sa *Scheme* pli vit posibil. Mersi.

MR SPEAKER

Mersi. Mersi *CEO*. Nou ava pas avek lezot Manm. Onorab Zialor.

HON NADDY ZIALOR

Mersi Mr Speaker. Bonn apre midi Minis ek ou lekip. Minis anliny avek larepons ki ou'n

donnen *with regards to* bann diferan sekter ouswa *targeted group* dan ou Minister, mon ti anv konnen ki nivo stratezi oubyen ki stratezi ki annan plas, an se ki konsern *Paralympic* e *Special Olympic*? Mersi Mr Speaker.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mersi Onorab keston, mon krwar tre valid la dan nou stratezi pou spor profesyonnel i osi enkli bann pou bann dimoun otreman kapab, nou annan en program ki enklisiv.

E mon ava les *PS Palmyre* si ou permet Mr Speaker koz en pti git lo bann korporasyon enternasyonal ki nou'n konmans fer nou'n konmans koz lo la. Pou ki nou tenir bann konpetisyon osi enternasyonal O Nivo ki pou osi donn en nouvo souf *Paralympic* pou donn nouvo souf nou bann atlet ki otreman kapab, pou zot osi fer loner.

Mon konnen dan lepase i enn bann group ki'n anmenn bokou, bokou meday pou Sesel e i annan lentere enternasyonal pou nou fer bann konpetisyon

Sesel e mon pa vwar aköz zot merit eks le ladan.

So petet i ou permet *PS Palmyre* i ava koz en pti gin bann demars ki nou pe fer bilateral pou nou kapab anmenn sa bann program. Mersi.

MR SPEAKER

Mersi Minis. *PS Palmyre* ou ava pan larelev.

PS FABIAN PALMYRE

Mersi Mr Speaker. Bonn apre midi tou Onorab. Onorab dabor mon ava dir poudir dan Polisi nou dir tre klerman Polisi Spor tre klerman ki fodre annan sa eleman enklisivite. I pa zis koze lo la.

I en keksoz ki ti frapan sete ler nou ti pe fer nouvo Polisi bann dimoun ti dir poudir i annan bokou koze lo la, ler mon pe koz bann atlet otreman kapab me selman i demann bokou plis aksyon.

E parey Minis in dir lo kote departman ki eskize nou annan sa travay kot nou pe travay ek plizyer *partenaire* enternasyonal, kot nou kapab aprann ek zot parey *Commonwealth* i annan bokou pei *Commonwealth* ki pe travay dan sa laliny e zot in fer bokou progre. Nou pe aprann i annan

en *body* i apel *Commonwealth Advisory Body on Sports*.

E malerezman la ek *COVID* louvraz in desann en pe, me selman nou pe travay fortman lo la, pou fer sir ki bann atlet otreman kapab i ganny enkli.

E la mon ava donn en senp legzanp kekfw ki ava montre sa dan dernyen *Zwe De Zil* ler ti annan konpetisyon, pa konnen si zot in remarke, bann atlet otreman kapab ti pe partisip par egzanp dan atletik ler i annan 100 met ou pe vwar 100 met otreman kapab.

E sa i en keksoz ki mon krwar ki *NSC* pe pouse avek bann Federasyon lokal, pou pa bezwen fer bann konpetisyon apar. Sak konpetisyon nou pe enkli nou bann atlet otreman kapab. Mersi.

MR SPEAKER

Mersi *PS*. Onorab Porice.

HON DOYACE PORICE

Mersi Mr Speaker. Bonn apre midi Mr Speaker, Minis avek ou delegasyon e tou bann lezot Onorab.

Minis an vi ki nou dan en sityasyon *COVID*. Mon konnen i pa pou ariv konmela, me pou a lavenir.

Avek ou nouvo Departman pou Spor eski zot pe mazin fer

en konversasyon avek bann pei pli pre ou dan larezyon? Bann ki nou deza annan Lanbasad isi Sesel e osi bann ki nou Prezidan pe vizite pou ganny lantrenman o nivo? Ouswa bann pti lesanz konpetisyon famiyal parey nou ti abitye gannyen? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Definitivman larepons i senp pou sa. E avan ler sa bann vizit in ganny fer nou'n deza konmans travay.

E vwala nouvo fason travay ki Departman Lazenés avek Spor pe fer aköz zot in ganny nouvo manda dan plas pou zot *oversee NSC* avek *SNYC* se sa bann travay ki lo plan.

Nou'n koz lo stratezi *NSC* sport sa i lo plan stratezi departman pou nou kapab fer sa bann lyen.

E mon kontan poudir bann repons ki nou a pe gannyen i tre pozitiv vwala aköz nou'n fer sa bann stratezi dan sa fason.

E tou sa bann 5 stratezi sports ki nou annan swa i lo kote loperasyon pou *NSC*, swa i

lo kote Polisi lo kote bann devlopman enternasyonal tou sa bann korperasyon ki ou a pe koz lo la, in deza e travay ki'n deza konmanse nou travay tre kolaborasyon avek bann lezot Departman.

E nou'n menm kapab annan bann proze tre eksitan, ki tre byento nou pou fer bann lanons letan nou'n fini nou'n fer sa bann kozri.

E preski tou le semenn, preski tou le semenn swa lofis Minis, swa kot Departman nou pe ganny bann rankont ki pe fer nou ganny sa bann korporasyon.

E de fwa mon en pti pe sirprann aköz nou'n esper sa kantite letan, aköz i annan bann parey mon fek aprann de semenn pase avek konsiler *Maldive* ki ti vin isi, kot nou'n sinyen, nou' sinyen en Memwar e kot nou pa'n enplimante.

E i annan bann lezot lesans osi kot nou'n fer e la ki nou pe fer nou a pe anmas tou sa bann ed Memwar sorti kot Departman *Foreign Affairs* e la nou pe al enplimante e pou nou regarde met dan program sirtou kot Departman e apre regarde lekel sa bann letan in ariv loperasyon, pou nou kapab met kot NSC. E vwala en pti pe pou reponn sa kekyon. Mersi Mr Speaker.

MR SPEAKER

Mersi Minis. Onorab Monthy e ava swiv par Onorab Loizeau si ou ti kapab met pare pou al lo *podium*. Onorab Monthy.

HON PHILIP MONTHY

Mersi Mr Speaker. Bonn apre midi Minis avek ou delegasyon. Minis ler ou'n fer ou entervansyon, ou'n nonm detrwa spor ki ou'n plizoumwenson nivo ki ti annan, me osi ou'n mansyonn serten spor ki'n re grese.

E i annan serten spor ki in regrese se aköz lafason ki zot Federasyon in performen. So mon kekyon i ki travay ki pe ganny fer pou ki sa bann Federasyon i vin vreman bann Federasyon ki o nivo ki sa bann dimoun ki pe zer sa bann federasyon i annan konpetans pou kapab zer *manage* sa disiplin sportif dan pei? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi pou sa kekyon Onorab. Mon pou konmanse apre mon ti ava swete kekfwa NSC aköz sa bout i kot zot pou donn plis detay.

Dan sa stratezi ki nou'n koz lo la pou profesyonnel, profesyonnalizm spor sa bann federasyon lasosyasyon osi i ladan en mon dakor avek ou wi, i annan en kantite fwa rezon akoz en spor i regrese ouswa i reste parey i ete i pa fer okenn progres set akoz move zesyon. Pa neserman akoz dimoun i anvi, me selman akoz ennler napa kapasite.

E petet apre sa model *leadership* ki ti annan se ki nou pa ti met en diferans ant kwa ki en lenterferans, apre kwa ek letan ou pe entervenir, pou ou kapab.

E mon krwar poudir lepase in annan sa en pti pe retisans pou swa Departman ouswa Sekretarya Minis pou entervenir pou kapab met sa.

E mon kapab dir ou la nou annan nou 6, nou annan 6 Federasyon Lasosyasyon, ki dan problem, dan gro problem avek Rezistrar zot lo lalis parey nou dir an *Anglais* ganny '*struck off*' ki nou bezwen travay avek pou nou kapab fer sir ki zesyon i en pe onivo.

Apre nou bezwen annan en plis rann kont. Sa bann Federasyon, Lasosyasyon zot ganny en Bidze avek Gouvernman e nou bezwen annan en prosedir program parey taler mon ti dir avek

Onorab William, ki nou fer rapor lo lenpak, nou fer rapor en pti pe pli konkret pou nou kapab, dir kan ki in annan progres kan ki nou annan regresyon, e pou nou fer rann kont pou ki nou amelyor. Akoz i sa bann spor ki finalman e sa bann atlet ki vin bann viktim.

Mon ti ava kontan Mr Speaker, avek ou laprouvasyon donn laparol *CEO* petet i ava donn plis detay. Mersi.

MR SPEAKER

CEO wi.

CEO JEAN LARUE

Mersi Minister mon krwar ou'n *capture* li tre byen me selman mon ti ava zis al en pti pe pli lwen se ki, premyerman nou ti pe dir bann Federasyon nou pe vin avek en nivo stratezi priyoritiz zot. Priyoritiz zot. S

Savedir si ou dan priyori enn, se sanmenm sa bann ki nou'n vwar in anmenn progres e zot kapab anmenn progres.

Prezan zot pou ganny resours finansyel, lasistans e en bann ti ava kontan donn zot en sekreter zeneral a plentan, dimoun ki travay avek zot, donn zot bann *coach* pli o nivo, en fason ki en lasosyasyon dizon ki dan kategori 3, 4 i pou konnen pou li monte, fodre i annan en bon tim *management*. I swivre

en *Code of Conduct* ki tre kler ozordi dan spor. E se pou sa rezon anba sa seksyon ki nou apel li *competitive sports* nou'n osi kree en seksyon *compliance* akoz sa avan nou ti napa.

Se pou sa rezon letan Rezistrar i dir nou, nou pa *compliance* prezan nou menm nou menm dimoun, nou prop dimoun ki pe osi pe fer *compliance* i a pe zize.

Non ozordi nou oule nou annan en nouvo seksyon ki pou zize ki pou mezire si enn ou dan kategori 1 ou pa pe delivre, so ou pou bezwen desann ek sa. Se ozordi se lafason ki keksoz pe ganny fer.

E se pou sa rezon nou le profesyonnalizm sa bann Federasyon. Mersi.

MR SPEAKER

Mersi *CEO*. Onorab Loizeau e ava swiv par Onorab Bistoquet.

HON NORBERT LOIZEAU

Mersi Mr Speaker. Bonzour Minis bonzour *PS CEO*, bonzour tou dimoun.

Mr Speaker mon anvi demann Minis vi ki dan repons in koz lo spor profesyonnel mon pe mazine ki lo nivo profesyonnel ki laplipar ditan se bann spor endividyel, ki fer sa perse pou al profesyonnel.

Byen rar ki ou vwar sport lekip dan sport lekip ou ava ganny enn de ki kapab fer sa perse, parey Sylla, Ah-Kong e lezot ki'n ganny sans.

Vi ki nou Sesel pandan tou sa bann letan, nou sport in reste toultan lo nivo amater nou. Ler ou amater ou depan lo zis lo donasyon, e i vin en fardo lo Gouvernman.

Alors mon anvi demann Minis vi ki mon rekonnèt ki i annan bokou dimoun dan prive, ki'n kontribye dan spor pou ede dan devlopman spor, eski zot annan en koze avek bann dimoun dan prive sirtou pou spor lekip?

Kot petet zot kapab antre e pran serten lekip mon krwar mon'n deza koz ek ou la Minis en fwa, pran serten lekip sirtou bann spor lekip *rent* zot konman en biznes, pou ki nou ava sorti lo nivo petet amater petet ariv lo nivo profesyonnel.

Mon konnen petet mon en pti pe tro anbisyè, me selman nou bezwen konmans en landrwa nou ava gete si pa marse.

Akoz mon pe dir sa, set akoz i annan bokou zenn ozordi akademikman zot pa bon, me selman zot annan en talan eksepsyonnèl dan en spor, sa i ava ede pou nou anmas zot.

Zot pa ava dan en lanplwa me selman zot ava dan en lekip sport zot ava pe *train* zot pe perform zot pe ganny en larzan. Parey bann zwer etranze ki pe zwe dan bann lekip zot pe ganny peye pou zwe. *Why not* nou zwer Seselwa osi pa ariv sa nivo ki zot ava ganny en larzan zot osi? Mersi.

MR SPEAKER

Mersi Onorab. Minis

MINISTER MARIE-CELINE ZIALOR

Mersi Mr Speaker. Mersi Onorab. Mon krwar nou pa tro anbisyé. Mon krwar sa i vreman posibil, i posibil mon krwar pli kour letan ki nou krwar i posibil, mon pou les *CEO* donn en pti pe plis detay lo la.

Me selman mon zis anvi fer pase en pwen, ki avek *PS Palmyre* kot Departman nou'n deza konmans zwenn Minis Ledikasyon, nou'n zwenn pou nou konmans regarde sa ki ou pe dir program.

Akoz zis pou fer pase en pti lenformasyon ou konnen parey Serena Williams zot ti konmans antre dan en lakademi laz 9an. E in ler pou nou bann lekol primer konmans idantifye bann skil avek bann talan parey ki ou pe dir.

E si i annan sa deboursman profesyonnel ki letan i demann li ki anvi fer i met mon anvi vin en zwer *basketball* profesyonnel. I annan en legzanp Sylla apre i kapab met sa personn pa pou dir ek li e tir sa ou pou mor lafen ek sa.

Sa ki fodre, fodre i annan en lanvironnman i annan en leko sistenm ki antoure. Vwala akoz ki nou pe *focus* lo sa bann stratezi ki nou pe *focus* lo la. I tre posibil sa ki nou lo menm frekans mon krwar avek Onorab, sa ki dan nou latet i parey.

Mon ava les petet kekfwa Mr Speaker *CEO* i ava pran sa kestyon i ava donn en pti pe plis detay. Mersi.

MR SPEAKER

CEO wi.

CEO JEAN LARUE

Mersi Mr Speaker. E parey Minis pe dir nou lo menm frekans la Onorab. Bomaten annefe nou ti pe fer zis sa diskisyon sa diskisyon nou'n pran li nou'n al en pe pli lwen.

Ti annan en letan pase mon konnen ti annan bann konpanyen ki ti anvi pran en atlet o nivo *fund* li. Me apre se avek sityasyon ki mannyer.

Me selman la i le moman pou nou fer li. An plis nou'n ganny nou bann biznesmenn ki pe zwenn ansanm ki pare par egzanp pou pran en *playing field take ownership* zot al avek zot anmenn zot bann atlet mon annan osi en diskisyon avek 2 Seselwa tre talante ki anvi vin bann *agent* pou bann atlet Seselwa.

So nou vwar bann devlopman pe vini e nou konmsi nou dir zot be ale fer. E dernyen lenformasyon mon kapab pas avek zot se ki nou annan en zenn *basketball player* Christ Bouchereau ki li pe fer en parkour profesyonnel e in montre in demontre ek son paran ki'n donn li sa sipor la tre enportan se paran i osi la.

E nou nou'n donn li en konmsi met en pe divan anba son lezel, akoz demen li osi i pou vin n profesyonnel. Parey ou pe dir dan spor i annan rannman, i annan larzan e sa zenn ki pare disiplin devouman annan en *drive*, mon krwar nou devret donn zot sa lasistans pou zot al pli devan. Mersi.

MR SPEAKER

Mersi *CEO*. Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre

midi Minis ek tou ou delegasyon. Bonn apre midi tou bann Onorab.

Minis eski ou kapab dir sa Lasanble, ki plan ou Minister pou annan nouvo relev sports, sirtou pou *Petite Enfance*? Mon pe dir *Petite Enfance* depi 5an an montan.

E sa i ava pou en plan a lonterm ki mon pe koz lo la. Sirtou la nou trouve nou dan kous *COVID* laplipar bann manrmay dan lakour zot grosi zot ganny obesite e zot pa pe fer nanryen, mon pe gete ki ou plan, pou asire zot grandi e annan en bon devlopman lasante ankor redwir obesite e vin bann bon travayer lafors travayer pou nou pti popilasyon Sesel ki pe vyei? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab kestyon i tre enportan mon ti ava kontan petet envit *PS* ek *CEO* pou met donn en pti gin azour, ki nou pe fer lo kote departman mon konnen i annan dek travay ki'n konmans avek ledikasyon lekol.

E apre mon konnen poudir bann *grassroots* bann *grassroots* devlopman ki nou a

pe koz lo la. Be sa ki nou'n fer nou, nou'n met dan kriter pou bann Federasyon Lasosyasyon i bezwen annan sa program ki ou pe koz lo la, sansan *NSC* pa pou rekonnet zot.

E nou pe apre avek Departman osi tou annan bann program plis spesifik ki bann diferan regroupman laznes i pou anmennen i pou ankadre, pou ki nou bann zanfan.

E sa i byensir an kolaborasyon avek devlopman *Local Government* avek Ledikasyon ki mon ava envit *PS* si ou permet Mr Speaker pou li koz lo la apre *CEO* i ava pran petet program spesifik *grassroots* kot *NSC*. Mersi.

MR SPEAKER

Mersi wi *PS*.

PS FABIAN PALMYRE

Mersi Mr Speaker. Zis pou met en pti detay lo sa ki Minis in dir i parey pli boner in dir nou'n zwenn avek Minis Ledikasyon avek en delegasyon, e nou tou le de group ti lo menm frekans.

Minis Ledikasyon ti koz lo nesosite pou annan par egzant bann aktivite *ECA* e zisteman la mon ava dir ler ou mazine bann zanfan si ou pe dir gard zot an bonn sante, ou pe regard pandan lekol ki sa bann kalite aktivite zot fer, apre ler lekol.

E la mon ava profite pou remersye *PS* Kevin Perine, mon'n deza zwenn ek li e nou'n fini konmans diskite mannyer nou pou zisteman fer sa ki ou pe demande Onorab.

Mon krwar nou ti pe esper *COVID* bann restriksyon desann be selman arete me selman mon krwar nou pa pou kapab kontinyen esper *COVID* nou pou bezwen deal ek bann *health restriction* i large e i posibil pou annan bann aktivite, nou fer li. Nou deza annan bann plan lo sa.

Kominote pou tre enportan e i pou osi lafanmir ledikasyon lafanmir. Bann paran la dan sa moman sirtou kot kekfwa ou pa pou kapab organiz bann aktivite ti ava ankouraz zot pou zot i annan en kantite keksoz lo *internet* lo *YouTube* isi laba, ki zenn i kapab fer.

Me selman definitivman avek tou nou bann *partenaire* kominote Ledikasyon sirtou, nou annan plan pou fer sa akoz dan Polisi nou'n eksplike poudir enn nou bann bi fondamantal se annan en pep an bonn sante e nou konnen an bonn sante ou pou bezwen aktiv. Mersi.

MR SPEAKER

CEO ou pou azout keksoz?

CEO JEAN LARUE

Wi Mr Speaker.

MR SPEAKER

Mersi.

CEO JEAN LARUE

Pou ankor sak Federasyon Lasosyasyon i en kriter ki letan zot soumet zot plan devlopman lonterm zot enkli pou nou sa ki nou apel nou prefere apel li *Child Youth Development, ok?*

E la aktyelman nou konnen par egzanp ou pran en sport parey tenis zot pe travay avek bann zenn, akoz i annan bann spor kot ou bezwen atrap zot depi tre zennaz pou anmenn zot pli lwen.

Ou pran en spor parey naze, ou bezwen konmans tre zenn az pou devlop naze.

E an plis nou pe vwar ozordi ki nou pe ankouraze i annan bann diferan lakademi ki pe al lo nivo distrik e la i plis plito vize pou futbol federasyon futbol mon konnen pe fer en bon pe travay.

Me selman nou pe ankouraz zot osi ki bann lezot spor zot osi fer bann sa bann lakademi akoz nou vwar poudir letan i annan lakademi, i annan apartenans i annan sipor paran ki vin zwe en gran rol e mon krwar nou lo sa laliny e mon

toutafe dakor avek sa kestyon ki ou'n demande Onorab. Mersi.

MR SPEAKER

Mersi CEO. Nou pou pas lo prosen kestyon. E kestyon pou sorti kot Onorab Regina Esparon.

HON REGINA ESPARON

Mersi Mr Speaker. Bonn apre midi tou dimoun a lekout. Mr Speaker mon ti ava kontan demann Minis, an vi ki bann fasilite sport dan distrik in sorti anba Gouvernman Lokal e vin anba ou Minister, eski Minis i kapab dir nou si zot annan en program regilye lo fason pou antretenir bann fasilite sport dan distrik, dan en fason ki zot pa tonm an rin? Mersi Mr Speaker.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mr Speaker larepons kestyon i senp, definitivman nou pou annan program pou antretenir sa bann lenfrastruktir. E mon bezwen fer sorti ozordi ki zesyon lenfrastruktir bann fasilite spor Sesel i en gro defi.

E se pou se la ki nou bezwen tou led ek sipor avek tou bann *partenaire*, pou nou kapab dan sa prosen 4an ki devan nou pou konmans met zot lo standar apropiye. Mon dir konmanse akoz latas i enorm. Me nou bann stratezi an gro i *comme* swivan;-

Nou pe fer evalyasyon tou sa bann lenfrastruktir.

Dezyenm nou fer en plan zesyon konpreansiv an kolaborasyon avek bann *partenaire* e sa mon konnen in deza fini fer sirtou avek Departman Minister Zafer Lokal.

Trwazyenm nou bezwen fer reform zesyon lenfrastruktir li menm. Sa defi in vin akoz sa bann zesyon ki ti la oparavan, sa model pa ti pe marse.

E sa reform i enkli rod dimoun ki konpetan, pou kapab fer sa travay. Parey mon pe dir i annan de fwa i pa zot lafot zot zis napa sa konpetans pou zot kapab met azour sa lenfrastruktir parey ki i sipoze ganny fer.

Katriyenm entrodwir sa model partenarya avek sekter prive ki taler *CEO* in konmans koz lo la, parey nou dir an term finansyel en *PPP*.

E la nou bezwen ankouraz dan sa model bann diferan endividi bann diferan biznes e

mon dir mersi pou sa bann ki'n vin devan, i annan ki'n vin devan ki anvi pran *ownership* en laplenn, en kort. I annan ki anvi pran en distrik an antye i anvi ki i annan ki anvi pran lenfrastruktir sportif en *complex* ki'n demande.

E bann kot nou annan bann lenvestiser serye. Nou pou kontakte bann distrik e nou pou fer vizit vin regarde ki sa bann investiser i anvi fer, pou nou kapab pran konsiderasyon.

E mon envit Mr Speaker ozordi mon'n ganny lokazyon pou envit tou bann Manm Onorab pou zot kapab vin donn nou en koudmen zot osi.

E la mon ava dir mersi spesyal pou sa bann ki'n deza fer li. Parey Onorab Georges Romain ki'n donn nou gran koudmen avek Anse Etoile. E nou annan osi bann larestan mersi Onorab Porice *as well* avek Praslin.

E bann larestan Manm ki'n vin devan ki' dir poudir regard sa mon'n en dimoun ki ti ava kontan swete ede avek sa bann lenfrastruktir e nou vremen, e nou pe lans lapel avek nenport ki dimoun nou ouver e nou kapab fer en partenarya.

Nou lo nou kote nou pe rod en partenarya osi mon

konnen poudir distrik Anse Royale i annan en partenarya, pou nou kapab fer sa enternasyonal.

Nou annan en vizit ki pou ganny fer mwan prosen pou nou kapab devlop sa bann lenfrastruktir lo sa nivo.

Taler mon konnen Onorab William in demann a keston. Nou pou vin Grand Anse tou akoz mon konnen poudir Grand Anse osi tou i enkli bann larestan landrwa rezyonal.

Kot nou kapab fer en *PPP* me si parey mon pe dir nou konnen poudir bann dimoun ki enterese dir zot vini nou ti ava nou byen apresye.

E nou anvii osi ranforsi laspe *monitoring* avek ki manner nou donn rapor anmenn pli bon rezilta ki nou pe vwar ozordi. I enn bann rezon akoz zot tonm an rin.

Akoz nou napa en fason ki manner nou *monitor*, ki manner nou dan en fason byen striktire, kot nou regarde sa mode l ki manner nou pe fer si i annan progre ouswa non si i pe ganny fer ouswa non.

E sa i en febles en pe partou zesyon Sesel, kot *even* kantmenm i annan *PPP* ki vini i annan en dimoun i dir *ok* mon ava donn donasyon kek lenfrastruktir apre nou pa met dan plan pou nou *monitor* li. I

annan en diferans ant fer renouvelman en lenfrastruktir apre *maintenance*.

E de fwa letan nou pa pe fer *maintenance* apre ou bezwen prezan kraze refer. E sa i bann febles kot nou pe met dan nou plan stratezi nou annan en plan rapor. En plan kot nou bezwen annan rapor regilyerman pou nou kapab fer sir ki sa bann lenfrastruktir i letan met li o nivo lo standar ki sipoze ete i pa tann an rin.

Menm si avek en lenvestiser ouswa avek en *private partnership* dan son *lease* dan son Lagreman, nou bezwen fer sir ki i annan zofisyee ki *monitor* ki fer sir sa lenfrastruktir i lo standar. Mersi Mr Speaker.

MR SPEAKER

Mersi Mr Speaker. Onorab John Hoareau. *Sorry* ou annan kestonn siplemanter Onorab Esparon?

HON REGINA ESPARON

Mr Speaker mersi. Mr Speaker mon ti ava kontan demann ek Minis ki kalite kolaborasyon ki annan avek biro *DA*?

Anba ki Bidze ki bann *upgrading* lo bann gran lapenn e bann pti laplenn dan sou distrik pou ganny fer?

Kwa ki in al mal dan leparse ki nou'n vwar bokou bann lenfrastriktir i tonm an rin? Petet sa *CEO* i ava kapab reponn nou. Parski model *maintenance* bann lenfrastriktir oparavan Minis *sorry* mon pou dir ti en pe parey 'Bal Dan Simityer,' *ok?*

Ki nouvo model *monitoring* ki pou met an plas pou anpes labi e donn bal dan sa domenn?

Minis parski ki nou pe vwar an se moman, *NSC* i vini i koup zerb dan milye laplenn, *filed worker* kot Gouvernman Lokal i grate i met an ta. *MNA* parfwa i bezwen rod volonter pou retire. Konmsi mon pe regarde ki kalite programm sistematik ki ou Minister pou met an plas pou anpese ki sa bann zafer i arive? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab wi nou bezwen avoue i annan pa mal. E letan nou'n pran nou'n fek rebran detrwa mwan, letan nou'n rebran tou lenfrastriktir mon krwar *CEO* i ava donn detay apre lo la.

In annan en pe konfizyon avek Gouvernman Lokal definitivman nou'n bezwen fer

detrwa *meeting* pou nou kapab rode lekel ki distrik i fer, lekel ki *NSC* i fer ki mannyer.

E anndan dan *NSC* menm i bezwen annan reform ki ganny fer. E sa model ki sa ti anba la vre i en pti pe parey sa 'Bal Dan Simityer' e i ti en bal *NSC* e letan nou'n arive nou'n avek *DPA* nou'n arete net, nou'n kennsel sa Kontra e nou'n aret net e nou'n fer ki sa i ganny abzorbe anba *NSC*.

Me selman nou pe regarde ki mannyer i marse i pe demann. E mon konnen poudir *NSC* i annan *management* bezwen refer ankor en pe reform konsernan sa, vwala akoz taler mon ti dir rod dimoun ki konpetan pou travay. Mon krwar mon envite Mr Speaker *CEO* pou donn en pti pe plis detay. Mersi.

MR SPEAKER

Wi *CEO*.

CEO JEAN LARUE

Mersi r Speaker, mersi Onorab pou ou kestyon. Anfe pe semenn pase nou'n annan ankor en diskisyon avek Gouvernman Lokal, pou nou gete pou arete sa zafer ki *NSC* i ganny fer en bout anndan kort oubyen anndan *fence*, an deor *fence* en lot group dimoun ki vin fer, sa i pa normal.

Menm en lot group dimoun ki pou vin met ki vin fer lalimyer oubyen ki vin aranz kort.

Nou pe tonm dakor poudir laplenn, gro laplenn avek *multipurpose* kort anndan ek an deor *NSC* i *take over* i fer tou *ok*? E prezan nou'n fini etabli en program, en *schedule* ki bann dimoun *NSC* i sipoze al fer sa louvraz regilyerman.

Me an menm tan osi parler nou resevwar en pti *call* kekwfa avek *DA* ki dir nou be gete kekwfa la i demann en pti touse. So nou regete si parler nou kapab re anvoy dimoun dan sa distrik zis pou al aranze.

Me selman parey ou pe dir Minis in konfirman poudir wi nou'n annan problem. E letan nou annan problem nou admet nou annan problem e nou rod solisyon pou problem.

E enn solisyon ki nou'n konmanse ki nou pe vwar se ki ankor sa bann *ownership* ki dimoun in vin devan. Mon kapab donn zot en legzanp al get obor *School Meal Centre* ozordi, sa i en klasik kot en group dimoun in vin ansanm zot netwaye zot mentenir i *secure* ki ozordi ou pa pou vwar vandaliz pe arive.

So i tre byen i annan lezot distrik kot nou'n ale kot transpor ti'n pri dan zerb nou'n

travay avek bann lezot lazans in ganny tire. E la mon krwar sa model ki pe vini e byento nou pou *advertise* en *new post* en *maintenance manager* - *new post*.

Nou ava espekte sa ki pe vini ansanm avek *MLUH* osi nou pe fer bann travay kot nou annan enzenyer, arsitek ki ed nou prezan, ranforsi nou kapasite pou fer sir fasilite distrik *sport facilities* i lo en nivo akseptab e ki osi *safe* pou dimoun servi.

MR SPEAKER

Mersi *CEO* nou ava pas lo lot kestyon. Onorab John Hoareau siplemanter.

HON JOHN HOAREAU

Mersi Mr Speaker. Bonn apre midi Mr Speaker. Bonn apre midi Minis ek ou lekip. Mon kestyon i al en pti pe dan laliny Onorab Esparon, me selman i al en pe pli devan ki sa.

Eski Minis i pare pou konsider redonn Ladministrasyon Distrik e dir bann *MNA* avek bann *DA* ki Lotorite dan distrik en Bidze, ki ava ede pou zer bann louvraz parey netwayaz kot bann fasilite sport, e osi dan distrik.

An menm tan bann kort bann laplenn ensidswit distrik i al reganny lotonomi pou zer sa

bann keksoz koumsa? Akoz an se moman atraver *central government* sitan bokou birokasi, ki serten bann keksoz i ganny bliye oubyen i ganny met akote, akoz sitan bokou lo zot lanmen pou zot vwar tou distrik ansanm.

Tout an dizan sa mon ti ava kontan osi petet zot reflexir osi lo, bann mezir odit, bann mezir prosedir ki nou kapab enplimante dan distrik li menm. Mersi

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Nou ti ava *welcome* sipor avek led. Be selman *without a budget* kekfw akoz nou napa larzan. Mon ti ava - akoz apre sa *ownership* ki nou pe koz lo la *ownership*, mon krwar kominote in montre nou enn de landrwa zot kapab pran.

Menm bann Federasyon bann Lasosyasyon si zot zesyon ek stratezi ki nou pe fer, zot for, zot demann led avek zot *counterpart* aletranze zot gannyen led finansyel, e menm *in-kind* zot gannyen pou zot kapab met sa bann lenfrastruktir spor lo en nivo.

Fodre ki la avek nou sityasyon ekonomik nou rod lot fason pou nou zer nou bann reveni pou kapab fer sa e napa en sel fason fer keksoz mon krwar nou bezwen inovatif, nou bezwen modernize. Led avek sipor pa zis lo kote Nasyonal.

E la bann Manm Onorab nou kapab servi zot lenfliyans aletranze tou bann *counterpart*, e nou, nou pare pou nou travay e fer sa platform kot zot kapab vini. E avek NSC mon asire Mr Larue *will welcome* kot nou ava kapab si sa i zesyon par egzanp Beau Vallon antye, me selman pa per i annan en gro travay devlopman avek en lenvestiser Beau Vallon *complex* ki pe vini. Ki apre nou ava koz lo la.

I pe vini nou a pe rode en pe nou menm me selman nou envit zot osi tou vin fer sa konversasyon avek nou e nou ava kapab fer sa partenarya me selman petet kekfw Onorab san Bidze Gouvernman. Mersi.

MR SPEAKER

Mersi Minis. Onorab Woodcock.

HON WAVEL WOODCOCK

Mersi Mr Speaker. Bonn apre midi Minis avek ou delegasyon. Minis an vi ki tou fasilite sportif pe ganny transfer sorti kot Gouvernman Lokal pou vin

anba ou Minister, eski i pou osi enkli finansman pou bann klib sportiv o nivo distrik?

Akoz oparavan se Gouvernman Lokal ki ti pe donn finansman pou bann klib onivo distrik *volleyball, basketball, judo* eksetera, eski pou osi enkli sa finansman ki ti pe ganny donner avan anba Gouvernman Lokal? Si sa se prezan ki ou Minister ki pou *take up?* Mersi bokou.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Non sa si ou rapel letan mon ti pe koz lo stratezi premye se ki distrik i reste pou *ownership* devlopman aktivite nou, nou pa pe al antre ladan sa Bidze i pou reste.

Nou'n diskite nou avek Minis Hoareau apre nou'n vwar non, me i pou reste kot Gouvernman Lokal, nou ava pran lenfrastruktir. Be selman parkont pou donn bann kapasite pou vin donn en koudmen, NSC i ava donn en koudmen me selman nou ti ava sete ki sa i reste.

E sirtou si annan bann zenn dan bann distrik ki anvi pran sa defi pran sa pou

organize nou, nou ava donn zot en koudmen. Mersi Mr Speaker.

MR SPEAKER

Mersi. Onorab Samynadin. E i ava swiv par Onorab William.

HON KELLY SAMYNADIN

Mersi Mr Speaker. Bonn apre midi Minis avek ou delegasyon e tou mon bann koleg Onorab. Minis mon ti ava profite pou remerci ou pou sa nouvo lapros ki ou Minister pe mazin pran *when it comes to* mentenir nou lenfrastruktir dan nou bann distrik?

Me antretan mon ti ava apresye konnen si ou kapab dir sa Lasanble ki bann prosedir ki ganny fer *in terms of tendering out* Kontra pou mentenir bann lenfrastruktir sport dan distrik? An vi ki dan distrik Au Cap nou pe ganny pa mal difikilte avek NSC pou nou kapab travay dan sa direksyon.

Apre zis en pti *reminder* pou CEO pou tyek en pti pe lo nou sityasyon lo nou laplenn Au Cap? Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mersi Onorab pou sa kestyon. Mon krwar mon pou les prosedir *tender* petet Mr Speaker *CEO* i ava eksplike, tenon kont ki tou sa bann prosedir *tender* zeneral Gouvernman pe revwar antye prosedir pou *tender*.

Me selman sa ki egziste la petet *CEO* i ava kapab eksplike. Mersi Mr Speaker.

MR SPEAKER

CEO wi.

CEO JEAN LARUE

Mersi Mr Speaker. Mersi Onorab. Wi ozordi annefe nou sipoze Au Cap le 6 dapre nou program.

Prezan *regarding tender*. Lefe ki tou bann fasilite ek son resours in vin kot *NSC*, nou pa'n ale pou al refer *tender* me parkont, nou'n vwar dan serten distrik ki lefe ki en pe letan en distrik in ganny abandonnen, pye dibwa in pouse eksetera, eksetera, prezan nou'n dir ansanm avek *POU* nou'n tonm dakor, nou dir annou fer *one-time off ok*, en travay;- ki en group dimoun dan distrik.

DA i konn prosedir, i annan li 4 *tender* zot fer zot prosedir normal *POU* i ouver, e *NSC* i annan sa larzan ki ti ganny transfer, en dimoun i

ganny sa Kontra i al e i fer sa louvraz i fini.

I prop. La prezan nou *NSC* nou retournen nou fer sir prezan nou pez konmsi nou gard l i prop. Se sa fason ki soz i enn de distrik in deza pran sa lapros. Mersi.

MR SPEAKER

Mersi Onorab William.

HON WAVEN WILLIAM

Mersi Mr Speaker. Mr Speaker mon anvi demann Minis *anyway* Minis ou nouvo, me letan mon ti pe fer avek mon kestyon 43an, mon anvi konnen Minis si zot ti annan okenn bann propozisyon ki zot menm zot anndan bann *expert* zot in mazin lo la, pou kapab prezant avek nou ouswa dan en konbinezon?

Akoz ki arive se ki nou, nou konsernen nou anvi konnen egzakteman letan nou pou vot Bidze pou zot, e ki benefis e ki lenpak i pou annan a labaz nivo distrik?

Par egzanp si nou pe dir i annan *private sector* ki pou antre, mwan mon en pti konsernen, aköz mon pa konnen ki sa formil nou pou servi. Par egzanp, si sa laplenn i tonm dan en landrwa kot i annan en kominote ki abitye servi, nou bezwen annan en

bon formil pou kapab zere, ki sa sekter prive ler i pou antre pe mazin biznes fer larzan li.

E nou bezwen konmsi fer sir ki nou annan en bon formil letan zot vin prezant sa onivo distrik. Me selman mon konsernen par lefe ki mon pa'n tann ase konmsi bann propozisyon, akoz ki Departman NSC i ti pe mazine vin avek an menm tan ki zot vin onivo distrik? Mersi mon pa konnen i mon'n fer mon kestyon kler. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Mon krwar NSC i ava pran en bout, mon ava pran en bout. I annan tou keksoz ki nou fer lagreman nenport ki partenarya nou pou fer, e i al kot *Attorney Zeneral* lofis, nou fer sir letan nou pe fer sa bann lagreman nou fer sir sa ki nou pe fer.

Nou okouran poudir sport i kapab vin en biznes si nou pe bouz dan sa direksyon. Ou konnen Mr Speaker annan ler nou le kas dizef pou nou fer lonmnet, nou pou bezwen kapab apre regarde ki mannyer nou viv, apre nou'n kas sa dizef

apre ki nou'n fer lonmnet, ki dan en kote nou annan balans. Nou annan en balans nou annan nou bezwen al dan sa direksyon. E kot nou annan en balans.

E parfwa lafreyer ki fer nou pa fer. Be mwan letan mon'n zwenn personnelman mon pe zwenn tou sa bann dimoun, ki anvi ki annan lentere mon fer letan, letan apre ler mon zwenn zot. E lamazorite se bann dimoun la ki kontan sport parey nou ;- kontan sport en kantite

E zot lentere nou get zot lentere kalite lentere. I annan bann *even* aletranze kot nou'n *turn zot down*. CEO i la i konnen kot nou'n vwar apre kot nou'n fer nou *due diligence* parey nou dir. Lentere pa ti okenn dan spor, zot ti annan en lot misyon pa anba sa enn ki sa enn zot fer krwar zot pe vin avek.

Nou annan pa mal nou bann teknisyen nou bann dimoun ki travay lo la. E vwala akoz nou pe dir mon konnen nou ti annan nou vizit Grand Anse nou pa'n kapab fer in kennsel, be selman nou pou fer.

E nou pou fer sir ki nou pou kouver pou nou regard tou bann posibilite. E nou pou enkli li, mon konnen parfwa nou pa ganny enkli pa ganny

lenformasyon. Be nou fek pran sa gro latas, donn en pti pe pasyans ek pti gin letan, akoz letan nou fer en plan nou anvi fer li parey mon pe dir.

Si nou pa fer li konpreansiv, me tou son leko sistenm tou sa bann bout ki al avek ou pa ganny en lekor antye avek tou sistenm ki pe fonksyonn byen dan kanmarad, apre dan sa bout devlopman kapasite.

Me selman ou konsern i mon krwar i fonde tre fonde, me selman mon ava les *CEO* kekfwa azout bann detay ki ava petet met ou latet en ti pe plis anpe. Mr Speaker mersi.

MR SPEAKER

Mersi. *CEO* ou ava azoute.

CEO JEAN LARUE

Mersi Mr Speaker. Mersi Onorab. E mon krwar mon osi mon partaz sa konsern akoz in ler pou nou bouz dan en lot fason fer. Nou'n konn li ki nou ti fer yer, e ozordi ler ou ganny bann dimoun ki enterese pou don en koudmen dan son distrik, mon krwar nou devret kapab ekout li. E gete si i vre sa ki i pe vin fer.

E an menm tan nou, nou pa pou zis pran laplenn oubyen fasilite donner. Se pou sa rezon nou travay avek biro

Attorney Zeneral kot i sorti en lagreman. Si par egzantp en distrik e mon kapab dir par egzantp Bel Air zot in pran *ownership* sa kort *basketball*, me selman nou tonm lo en lagreman poudir, i annan lezot tim ki kapab vin servi, me selman dan en fason organize ki napa mont lo lipye kanmarad.

Me selman prezan nou tou nou vin ansanm nou fer sir poudir nou mentenir nou prop fasilite, napa vandaliz e nou'n vwar poudir letan ou fer konmsa, la dimoun i en pti konmsi zot santi zot pli pre, pli for me selman an tou prenon kont poudir nou pa anmenn bann lezot dimoun ki annan bann lezot aryer panse zot pa vin lenfliyans nou. Mersi.

MR SPEAKER

Mersi. Mon ava pran letan pou Onorab Adelaide.

HON FRANCOIS ADELAIDE

Mersi Mr Speaker. Bonzour bonn apre midi Mini avek ou lekip. Minis mon petet mon pou demann mon pti kestyon *in regards to* bann lenfrastruktir tonm an rin parler, i arive ki par egzantp bann distrik i en pe lwen, parey nou, nou ler nou vin petet lo laplenn ouswa lo kort nou vin en pti gin petet anvil 5er-6er Baie Lazare nou

petet 6er-7er e ler nou konmans fer sport i fini fernwanr.

So petet pou nou kapab ankouraz plis dimoun vin lo pou servi sa bann fasilite sportif, ki zot pe fer petet pou ede sirtou *in regards to* lalimyer?

Akoz ou konnen poudir elektrisite i ser e petet i annan bann lezot alternativ par egzanp fotovoltaik, eski dan zot plan zot annan en fason ki mannyer pou asiste bann distrik petet, avek bann posibilite ganny *sponsor* sa bann lekipman pou ki sport i vin an zeneral en pe pli bonmarse. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Mon krwar tre bon pwen. Mon krwar *PS* Palmyre la i ava note bann kolaborasyon ki nou bezwen petet kekfwa avek bann departman lenerzi pou nou kapab al fer sa kolaborasyon dan sa direksyon.

E petet pou bann spesifik mon ava demann Mr *CEO* Larue pou li kapab koz lo en pti git sa son plan desantralizasyon. Mersi Mr Speaker.

MR SPEAKER

Mersi Minis. *PS* in note. *CEO* i ava azoute.

CEO JEAN LARUE

Wi zis pou azoute Onorab mersi mon krwar i en pwen byen valid e mwan konman *CEO* mon fer li mon devwar pou pase dan bann distrik e fer bann diskisyon osi avek bann *MNA* ek bann *Das*.

E ler nou pe fer sa travay par egzanp nou konn bann *status* bann diferan fasilite. Wi ansanm dan diskisyon avek zot menm zot ava dir nou, be gete la nou bezwen tel lalimyer e nou dan nou *planning*, ki nou bezwen vin kot zot apre dan nou *planning* nou pou dir Baie Lazare i bezwen li 4 poto lalimyer fotovoltaik;- St Louis i bezwen sa e apre ki nou kapab fer nou en plan travay, me selman an prenon kont ek resours ki nou annan. Me selman mon krwar i en pwen tre valid. Mersi.

MR SPEAKER

Mersi. Byen nou pou pas lo prosen kestyon nou pou zans zofisye e mon ava dir mersi *CEO* Jean Larue ki pou ganny ranplase par Mrs Penny Belmont. Madanm Clerk mon annord la byen? Tre byen.

(CEO LARUE WAS EXCUSED FROM THE HOUSE)

MR SPEAKER

Bon byenveni *CEO Seychelles National Youth Council* Penny Belmont lo sa keस्थ्यon e keस्थ्यon i pou Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Kस्थ्यon limero 32 i lir koumsa, eski Minis pour Lazenes i kapab dir Lasanble Nasyonal ki travay son Departman pe fer pou ankouraz bann lakonpanyen prive etabli en kiltir progresyon karyer, spesifikman pou benefis lazenes Seselwa e ede valoriz zot talan dan lanplwa? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou sa keस्थ्यon. Mon krwar i en keस्थ्यon vremen, vremen stratezi e vremen valab.

Pou konmanse, mon ava konmanse apre mon ava envit *PS Palmyre* pou donn en pti pe plis detay lo kote kolaborasyon bann lezot Departman, e petet *CEO* i ava koz lo loperasyon en pti git bann legzanp.

Dan plan stratezik Departman Lazenes, i deza annan en lobzektif ki son bi se pou travay avek tou *partenaire* konsernen pou amelyore kot i neser e devlope, kot i annan bezwen, afen ki Sesel i annan en kiltir e en lanvironnman ki ankouraz e siport partisipasyon zenn dan devlopman lekonomi nou pei.

Sa bann pwen ki mon'n fer en pti *summary* dan nou plan i enkli, travay avek bann Minister bann Departman bann lazans ki taler *PS* i ava donn en pe detay, e osi bann lorganizasyon konsernen pou devlop sa ki nou apel an *Anglais employability*, nou bann zenn.

Nou pe osi pou al fer resers, lo bann konsern ki bann lorganizasyon prive i annan lo sa size. Akoz fodre nou al rode akoz zot pa oule al anpoy nou bann zenn. E nou deza pe atann en pe bann konsern tel ki;- nou zenn napa travay, zot pa oule travay *odd hours* e ki zot sorti dan bann sant profesyonnel avek serten mankman e lezot ankor bann konplent ki nou pe gannyen.

E apre sa resers nou pou travay avek bann lorganizasyon e antite konsernen pou adres bann konsern ki'n sorti dan sa resers. Sa ki nou fer nou bann desizyon baze lo lenformasyon.

E nou pou annan bann nouvo lapros pa parey nou annan oparavan, mon ava eksplik en pe sa bann nouvo lapros brefman.

Enn, nou pa pou vin zwe en *blame* game aköz sekter prive i blanmen, lazenes i blanmen nou blanm ledikasyon, nou blanm tou dimoun. Me nou anvi vin avek prensip kolaborasyon e fer bann konpromi kot i nesese e kot i posib.

Dezyenm nouvo lapros se, nou pou bezwen devlop kapasite entern kot i fodre. Nou bezwen rekonnèt kot nou napa kapasite e nou pou rod led avek lasistans kot nou santi nou annan limit.

E nou bezwen devlop bann program lanplwa pou bann zenn ki relevan e ki modern. E nou pou bezwen anmenn plis inovasyon avek teknolozi. Nou ansanm avek Departman Lafanmir dan Seksyon *Qualité De Vie - Quality Of Life*, nou bezwen rekonnèt poudir lemonn in sanze, nou pe viv dan en lemonn kot nou pa kapab anmenn menm lapros ki nou ti annan oparavan.

E la mon pe regard osi avek sa bann larestan defi ki ti napa kekfwa letan detrwa nou, nou ti ankor pli zenn nou ti pe grandi, e nou bezwen pran kont

si nou letan nou pe mazin zenn nou pe mazin petet kekfwa zis en zenn ki tonm dan en serten kategori.

Nou annan en pli gran varyete en pli gran profesyonnel ki osi annan bann zenn fanmir ki mannyer kot nou devlop en kalite lanplwa, ki nou donn li fleksibilite ki i kapab fer sir i grandi.

Letan nou, nou ti pe grandi kekfwa sa bann defi ti napa sa bann danze. La i annan ki mannyer ki nou fer sa mon pe donn zis en legzanp, pou nou vwar.

E sa taler *PS* i ava koz lo sa bann sa bann kalite kolaborasyon ki nou bezwen fer avek lanplwa nou bezwen sanz lafason ki nou pe travay Sesel. Nou bann zenn i bezwen sa kalite sipor osi tou.

E tousala i pou ede devlop Polisi e bann Lezisasyon nesese pou nou valoriz e protez nou bann zenn travayer, an menm tan ki bann konsern ki bann anplwayer i annan e ki fonde i osi ganny adrese annan en balans ant tou le de. Mersi Mr Speaker. Petet mon ti ava envit si permet *PS* pou donn en pti pe plis detay lo sa bann kolaborasyon. Mersi.

MR SPEAKER

Yes *PS* ou ava azoute.

PS FABIAN PALMYRE

Mersi Mr Speaker. Parey Minis in dir enn bann premye *partenaire* kle nou'n zwenn avek se Minister Ledikasyon. E parey Minis in koz lo sa resers ki nou pou fer pou nou regard bann konsern ki fonde ki bann anplwayer i annan.

E nou plan se partaz sa bann resers Minister Ledikasyon e travay avek zot konvenk avek zot pou azir program letid anfen ki bann etidyan ava pli byen ganny prepare pou lemonn travay.

Nou bezwen fer sir pou ki sa ki anplwayer pe demande se sa ki gannyen, aköz la nou dan venteentyenm sek fodre, nou pa prepar nou bann zenn pou bann keksoz ventyenm sek. E ennler mon krwar sa i en keksoz ki nou pe fer nou pa realize.

Nou osi enn bann keksoz nou bezwen fer se, fer sir ki nou tou nou konpran sa problem i en problem pou nou Seselwa. Nou tou nou konplent. *Ok?* Nou tou nou dir poudir etranze i ganny plis favorize.

E kot sa ki nou bezwen fer, se konnen poudir nou bezwen fer sir ki nou pa donn leskiz okenn landrwa travay, pou zot dir ki sa travay etranze i siperyer ki nou zenn.

Alors nou bezwen prepar nou bann zenn. Enn bann legzanp se nou bezwen bann landrwa travay konmans konsidere, aköz nou pe vin sa ki annan en bon *work experience programme* dan sa pei.

E la nou pe koz pandan vakans, nou pe koz menm pandan ler lekol depandan laz. Me selman nou konnen bann edikater pou konn sa e bann dimoun dan Lanplwa, pou konn sa ki plis ou met bann zenn a laporte ki savedir sa karyer.

Ou konnen parey en zenn i kapab dir mwan mon anvi vin dokter, mwan mon anvi vin en ners. I dir sa li, me selman i perdi sa i perdi lezot keksoz ki vin avek.

Alors nou fer li vwar ganny leksperyans e deside si i kapab fer sa. Dan bann biro ou anvi vin sekreter oubyen fer krwar ou anvi vin antreprenner, fer krwar en zenn i dir mwan mon pa oule ganny anploye, mwan mon oule fer mon biznes. Ou bezwen atas li, e la fodre nou ganny korporasyon ek bann dimoun ki fer biznes, bann zenn a en laz apropiye i vini i vwar *what it takes to run a business*.

Fodre zot konpran bann sakrifis ki fer. E nou i pou enportan ki sa kolaborasyon avek Minister Ledikasyon i mars byen, aköz ler bann

etidyan pou al fer sa bann kalite leksperyans, fodre dan lakol zot pe ganny siporte par sa program *carries guidance*.

I enportan sa akoz depi boner par egzanp dan S3 en zanfan i merit kapab pe konmans swa ki kalite *IGCSE* i pe al fer.

Pli tar ki kalite *A Levels* i pe al fer. E sa bann size la i gid ou pou ouver ki karyer a pepe ou pe ale, e nou bezwen osi regarde avek bann landrwa travay avek bann *professional centres* ki sa *mismatch* akoz en manmay i sorti dan en *professional centre* en zenn, selman sa dimoun sa anplwaye li i dir i napa sa bann skil. I napa sa bann kalite ki zot bezwen.

E la kot nou bezwen travay avek Minister Lanplwa. Parey mon'n dir bann keksoz ki fonde wi nou adrese. Me selman si i annan bann lezot i annan bann lezot rezon ki bann anplwayer pa le pran nou Seselwa kot i pa normal la mon krwar kot sa *monitoring* i vini.

La mon krwar kot nou bezwen regarde e la kot nou pou bezwen travay ek bann *partenaire* pou nou devlop bann Lezislasyon, bann Lalwa zisteman pou protez nou zenn.

E mon krwar sa laliny ki nou pe pran i pou fer ki parey

Minis in dir i annan sa *fair balance*. Nou pa blanm personn nou adres bann lakin ki kekfwa nou bann zenn i annan, me selman an menm tan nou pa les bann rezon fasil, bann leskiz fasil, pou bann anplwayer pa pran nou bann zenn Seselwa dan lanplwa. Mersi.

MR SPEAKER

Mersi Onorab Henrie. Swivi siplemanter. Minis ou le kontinyen wi.

MINISTER MARIE-CELINE ZIALOR

Non Mr Speaker. Kekfwa petet mon ti ava donn sans *CEO Belmont*, pou li donn en pti pe legzanp lo bann aktivite *SNYC* ki pe fer pou adres sa. Mersi.

MR SPEAKER

Dakor *CEO*.

CEO PENNY BELMONT

Mersi Chair. Bonn apre midi tou dimoun. *SNYC* i plis en fasiliter konpare ki nou fer bann program.

Me avek an relasyon avek lanplwa, nou'n revwar en pti pe ki bann ki pe demande lo *market* konsernan lanplwa bann zenn. E nou anvizaze antre dan en *mentorship programme* avek bann

lakonpanyen prive kot nou kapab ler sa zenn in fini retourn konman en *graduate* me osi pandan vakans.

Donn zot sa sans latasman, donn zot sa sans aprann kisisa egzakteman zot anvi parey *PS* pe eksplike, zot konnen egzakteman mon anvi vin en sekreter *maybe* antase dan en biro pou aprann.

Mon anvi vin en solda en *internship programme* ki pran en pe letan, zot ale zot aprann, so pou nou *SNYC* i plis ki nou annan sa bann program *mentorship*.

E sa program ki *public private partnership* ki la nou kapab antre an lakor avek bann diferan lakonpanyen prive e *SNYC* pe fer. *Thank you.*

MR SPEAKER

Wi mersi *CEO*. E Onorab Henrie wi?

HON GERVAIS HENRIE

Mersi Mr Speaker mon ti ava kontan dir mersi pou bann larepons aköz mon panse ki zot pe reflesir dan direksyon, ki nou konman en *Caucus* nou anvi vwar.

So Mr Speaker mon premye kestyon se ki mon ti ava kontan demande, eski zot ava pare pou konsider konman en bann kondisyon ou propoze

avek larestan *Cabinet* dan ka Minis, enn bann kondisyon *license* pou bann biznes ki pe vin Sesel par egzantp dan domenn tourizm, ki zot vin avek en program ki ava siport sa *mentorship program*. Konmsi *it's part of your License condition* pou ki alor pei i benefisyè a lonterm. Sa i enn.

E dezyenmman mon ava plito annan en pe sizesyon pou anbelir sa ki zot in deza dir, dan Sesel ozordi i annan en kantite bann *well-established business*.

Par egzantp dan domenn labank, lasirans, telekominikasyon, avek *manufacturing* mon pe mazin *SeyBrew*, e *Takamaka Bay* sa i bann lakonpanyen ki zot kapab aproz pou ganny sipor aköz sa bann lakonpanyen souvandfwa ou pou vwar poudir i annan bann travayer ki'n fer 25an ou plis avek zot.

E savedir i bezwen annan en keksoz ki byen dan sa lakonpanyen ki'n gard sa bann travayer tou sa letan. E dan domenn tourizm par egzantp, ki lendistri pilye pou lemoman.

E la mon pe mazin *First Lady* ki ti konmans konman en resepsyonnis avek *Fisherman's Cove* e in fini konman *Financial Controller*. Vwala en legzanp i pou vin lo mon dernyen pwen

Mr Speaker, kot bann Seselwa i kapab vin konman bann Anbasader pou sa program.

E mon pe mazin *First Lady* ki kapab donn nou bann *talk* dan bann lekol, aköz li i en dimoun ki'n fer plis ki 40an karyer konmans isi e al fini laba anler. So nou annan deza bann bon eleman dan pei pou devlope. Mersi.

MR SPEAKER

Mersi. Minis ou ti a kontan reponn?

MINISTER MARIE-CELINE ZIALOR

Mersi Mr Speaker. Mersi Onorab pou sa bann sizesyon tre valab. Mon asire ki *PS* avek *CEO* in pran not pou ou premye sizesyon kestyon larepons i senp wi. Nou'n deza komans fer. Nou'n deza konmans fer avek Departman Lanplwa, selman apre zot priyorite in sanz en pti git aköz zot portfolyo.

Be nou'n konmans fer letan nou ti annan sa kriz lanplwa dan pei. Pou konman en kondisyon sa bann sirtou tourizm, pou ki kot departman lafanmir ti pe ede avek en pe *counselling* pou *counsel* bann zenn, pou zot kapab fer sa sanzman;- swa sanzman karyer swa nouvo kondisyon travay,

pou donn *counselling* pou zot kapab reste dan lanplwa.

Mon annan bann ki pe mars ase byen nou'n deza *overall* annan en kantite demann i vini. E sa osi i ava bann diskisyon ki ava kontinyen mon mazine lo nivo Departman avek *PS Baker* ki i ava kapab met sa nou *Cabinet* nou napa okenn problem pou siporte. Mon pa krwar nou'n deza konmanse.

Lo kote bann diferan lendistri sekter, mon krwar enn nou bann pwen sete regard inovasyon regard modern e enn parmi enn ki mon'n deza pe travay, e mon'n deza koz ek *PS* pou nou al fer konversasyon pou *Ekonomi Ble*. Dan *Lekonomi Ble* sa loportinite enorm pou nou bann zenn, pa zis lo kote karyer li, pou zot ganny en lavwa *even* kot *UNU* Nasyon Ini. I annan kot nou'n konmans fer sa konversasyon avek *Lekonomi Ble* i annan program ki nou'n deza fini avek *TéléSesel* pou pase byento.

E nou pe al konmans al fouy ladan e nou pe travay tre pre avek Minis Devika Vidot lo kote zenn lantreprenarya, kot nou pe resanz sa formil ki ti kot *SNYC*. Nou'n aret net pe refer li pou vremen anmenn Minister Finans ladan. Anmenn lezot partenarya ladan.

E mon konnen *PS Palmyre* pe fer bokou koze avek *PS* pou *Economy Planning* pou nou gete kote bann sekter ki pei pe mazin diversifye e fer bann program *align* avek sa.

De fwa ou konnen ki arive avek Gouvernman dan lepase, en kote lanmen drwat pa konnen ki lanmes gos pe fer. Nou a pe sanz sa fason travay, sanz sa fason fer e nou apresye nou kontan sipor ki Lasanble pe donn nou.

E bann Anbasader definitivman. Mon kontan pou dir ou poudir *First Lady* i annan en lofis kot Sekretarya kot mwan, aköz i annan bon pe travay kot lafanmir ki pe donn nou lanmen, pou li kapab fer e mon konnen in fer en pe kot *SNYC* osi tou.

En pe travay, e mon ti ava i pou deza kontan pou vin en Anbasader. Me nou ankor lezot bann Anbasader sirtou la mon mazin detrwa bann *ex-teachers* ki'n konmans dir nou konmans anmenn bann program, ki ti ava swete pou nou atrap lanmen bann zenn Anbasader.

Se sa lespri nou fek selebre nou 45an lendepandans sa lespri patriyotizm linite, sa nou'n vreman apresye sa bann komanter Onorab. Mersi bokou.

Mon pa konnen petet kefwa Mr Speaker si *CEO* i ti ava kontan azout lo bann program Anbasader ki mon konnen li osi in konmanse. Mersi

MR SPEAKER

Wi *CEO* ou ti a kontan azoute?

CEO PENNY BELMONT

Mersi Mr Speaker. Mersi Onorab. Mersi *Minister*. Nou fek relans nou program Anbasader bann zenn Anbasader *actually* semenn pase nou ti annan en pe problem aköz *COVID* nou pa'n kapab.

Me zot pou vwar lo Télésésel konmansman semenn prosen i pe al pase. Ki nou'n pran bann zenn profesyonnel ki dan diferan *aspect of life* ki nou'n repran zot pou nou kapab *mentor* bann lezot.

Akoz nou realize poudir tou dimoun i bezwen en lot lanmen pou ed li. Apre zot bezwen en dimoun pou zot *look up to*.

So sa program nou'n fini relanse ankor e mon bezwen dir mersi tou bann lezot zenn e bann osi ki'n fini pas zenn bann ki ti Onorab ki'n vin volonterman pou zot donn en

koudmen, pou nou relev sa program. Mersi bokou.

MR SPEAKER

Mersi *CEO*. Onorab Georges.

HON BERNARD GEORGES

Mersi Mr Speaker. Bonn apre midi Minis avek ou delegasyon mon kontan sa ki mon pe tande. I fer mon zwaye e i fer mon kontan. Akoz mon vwar ki i annan en langazman lide.

Me ed mon silvouple pou *join the dots*. Akoz mon pa vwar konman en dimoun ki sa ki *PS Palmyre* in dir sa ki *CEO Belmont* avek ki nou'n ganny en zoli diskisyon dan nou distrik, in fer en prezantasyon avek mon *DA* avek mwan. E nou'n antouzyazme par sa ki nou'n tande. E sa ki ou ou'n dir ozordi Minis mon vwar ki i annan en *road map*, me i annan posibleman en destinasyon.

Sa ki mwan mon ti ava kontan e mon konnen bokou dimoun pe mazin parey mwan se konnen ki nou pou kapab *join the dots* e ariv a sa destinasyon.

Akoz sa ki mwan mon pa arive konpran ozordi se ki manner i annan serten zenn ki devlop ekstrememan byen ki vin bann Avoka, ki al travay dan biznes *offshore* fer en kantite

larzan ki travay labank ki vremen, vremen *up-to-date*.

Epi ou annan en lot kategori dimoun ki *aim* pou zot vin en *stevedore* oubyen en *home carer*, e zot pa anvi angaz zot dan pa ki i annan en distenksyon, nou konpran ki pa tou dimoun ki kapab fer menm keksoz.

Me ki manner eski nou pou kapab angaz sa bann *school leavers*, sa bann zenn profesyonnel, sa bann dimoun ki pe sorti dan lekol e pe antre dan lemonn travay, pou zot vwar egzakteman kote zot devret ete e non pa zis kay lo en keksoz ki in tradisyonnelman zot sor. Ed mon avek sa silvouple. Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. En kestyon fondamantal en kestyon mon pa konnen si nou pou koz lo mon pou ale ziska demen bomaten. Be selman pou versyon kourt apre mon ava les *CEO* akoz i annan en pe sa bann program ki *SNYC* avek son restriktirasyon in met ladan.

Sa nou bezwen konmans depi avek nou kolaborasyon avek Minister Ledikasyon, apre avek Gouvernman Lokal. I al tre fon laba dan son fondasyon menm sa pe koze e vwala.

E enn parmi nou bann si ou pou demann mwan dapre resers dapre mon prop leksperyans personnel, apre antre dan sa lofis pou sa dernyen 8 mwan la, se nou fanmir ki byen ki sa portfolyo i ansanm tou le 3.

E nou annan en striktir fanmir lo ki fonde, ki si ou ganny en bon konmansman fondasyon kot ou fanmir i ankouraz ou pou leve, i ankouraz ou pou anvi plis ki sa ou vwar otour ou, ou annan en bon konmansman ou ale.

Be si malerezman nou annan nou en bann difikilte familyal ki nou tou nou ankouraz, sa bann defi ki nou annan ki ti napa parey mon ti pe dir detrwa lannen pase, sa i met a dezavantaz tre zennaz nou bann zanfan apre evantyelman.

Be letan zot in ariv zenn i louvraz in miltipliye en kantite. So vwala sa. Nou annan bann lonterm stratezi ki al plis ki 10an ki nou'n met ater ki nou'n mete ki mannyer nou pou fer.

Sa, sa bann i pou ler ou p fer sa pou sa bann ou bezwen

annan ou bann kour tenm si ki bann ki'n pare nou pa anpes zot anvole, les sa bann anvole e regard sa bann ki la ater, ki mannyer nou fer li krwar e montre li kote son lezel i ete pou li osi anvole.

Sa i bann diferan plan. E vre nou pa ankore vin devan nou pa ankore tro pare pou nou vin fer bann kominikasyon, aköz nou anvi ler nou dan plan e nou pe semenn prosenn, nou pe al finalize bann plan stratezik, kot tou le 3 portfolyo kot i vin ansanm.

E fodre pa ki nou fer bann pti bout fodre ki en louvraz e kantite nou bann la se zwenn avek bann lezot Departman, zwenn. E nou tou nou konnen ki mannyer sa i difisil aköz nou pa'n abitye, bann dimoun pa'n abitye mon krwar *PS Palmyre* i ava dir ou pa mal difikilte ki i gannyen.

I bezwen tanzantan vin kot mwan pou nou kapab deblok bann landrwa pou nou kapab fer nou bann Departman Gouvernman travay ansanm, fer nou bann Seselwa anvi dir ou napa *ownership* la, vin ansanm pou nou kapab regarde ki mannyer nou fer.

Me selman nou bezwen anmenn sa lo en nivo kominoter. Nou fot ennler dan

lepase se kit li lo en nivo nasyonal e i pa desann dan kominote e vwala ki petet letan ou met lo nasyonal.

Bann deza ki annan lezel ki anvole ki vini. Sa bann ki pa ankor vwar son lezel li i pa konnen ki mannyer i pou ariv kot ou.

E si ou pe demann mon la mon fer en somer vwala ki mon pou dir ou ki i sa i bann gran plan, e nou pe al an ledikasyon nou pe al dan bann distrik vwala ki nou pe al fer e mon ava petet les *CEO* donn bann detay e kekfwa si *PS* i annan keksoz pou azoute an kolaborasyon i ava azoute. Mersi.

MR SPEAKER

Wi mersi Minis. *CEO*.

CEO PENNY BELMONT

Mersi Mr Speaker. Mersi *Minister*. Mersi Onorab Georges. E mon pou profite parey Onorab Georges in dir nou'n annan bokou diskisyon. e trwa kar Onorab la in zwenn avek *SNYC* avek bann *DA* espekte Anse Royale, Anse Boileau ek Anse Aux Pins ki nou pa ankor fer.

E sa an konsiltasyon pou nou premye nou stratezi pou nou konnen egzakteman ki *SNYC* i fer. E ki manda. Ki nou fer egzakteman. E Onorab

Georges nou'n fer en kantite konversasyon ki mannyer nou fer serten mannyer nou revwar nou program mannyer nou al atak bann zenn, ki mannyer nou koz ek en zenn pou nou anmenn zot ansanm.

So mon krwar i tous sa bout *ownership*. *SNYC* in antre sa bout sansibilizasyon. E premye ti an konsiltasyon avek zot pou nou konnen lo zot kote ki sa ki zot anvi pou zot distrik.

Akoz sak distrik i diferan. Nou pa kapab dir distrik Mont Buxton son bezwen pou zenn i parey Perseverance. So i diferan.

E dezyenm parey apard sansibilizasyon nou bezwen fer sa konsiltasyon. E nou bezwen ogmant sa langazman ek partisipasyon. I pa zis ek zenn, i osi distrik kominote antye. E parey Minis in dir avek Ledikasyon, Gouvernman Lokal *so it's an ongoing process*

Sa ki nou pe sey fer la nou pa pou kapab fer la nou pa pou kapab *overnight*. Me solman nou bezwen tou dimoun pou vin ansanm pou nou kapab fer li. E osi ler nou pe koz kolaborasyon eski ki mannyer nou fer pou nou angaz zenn?

Avan *SNYC* ti fer bann aktivite li ki ti organize, li ki ti fer tou. Me la nou pe demann zenn zot menm, aköz ler ou

regarde ou annan nou 40 *affiliated members*, bann group. Zot deza egziste Komite e group.

E la nou pe ankouraz bann lezot zenn pou zot fer zot groupman, pou zot fer zot Komite e zot *take ownership or* pran responsabilite pou zot distrik.

E si nou toultan nou pa donn zot sa sans responsabilite nou kontinyen zis fer aktivite pou zot. Byensir zot pa pou avanse.

Me ki nou, nou bezwen fer nou bezwen annan sa sipor e donn zot sa gidans a tou moman pou zot konnen ki bor zot tap laport e ki bor ki byen e i pa byen.

E apre osi se sa responsabilite. *SNYC* ansanm ek Minis avek *PS* nou group antye se nou anvi donn sa lespwar bann zenn. Redonn lespwar zenn redonn zot sa lanvi, e osi konnen ki zot ete e vwar ki bor nou, nou kapab ed zot. Se sa ki *SNYC* pe fer. Mersi bokou.

MR SPEAKER

Mersi *CEO*. Onorab Michel Roucou.

HON MICHEL ROUCOU

Bonn apre midi Minis avek ou lekip. Minis mon'n ekout en pti

pe atantivman lo kote bann nouvo stratezi ki zot pe vin avek bann zenn ki vreman ankourazan.

Me selman souvandfwa nou vwar ler bann zenn in dan en lanplwa pou bokou zot in zwenn sa lanplwa sa landrwa travay. E ler pou zot ganny en promosyon souvandfwa nou vwar kot *DPA* i annan en problem. Eski zot pou anmenn *DPA on board* pou fer sir ki sa i pa vin en dekourazman pou bann zenn? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab, *DPA* i pe regard sekter piblik li. E i deza annan bann reform ki pe konmanse. E mon kapab zis dir ou la brefman poudir lafason ki mannyer nouvo Gouvernman pe reorganiz sekter piblik, nou pe ganny bokou plis lotonomi, pou nou kapab fer sa bann demars parey.

E nou bann plan fitir se pou donn bann departman bann Minister pou zot kapab fer sa bann *proposal* parey ou pe dir. Pou ki nou donn sa bann zenn ki merite zot promosyon e

zot merite. E parey ou konnen tir politik sa i enn parmi bann keksoz ki'n afekte bokou sa bann devlopman.

E enn taler mon'n bliye dir ki Onorab Georges in demande, rezon koz kekfwaw dimoun pa vin ouswa i deryer se aköz kekfwaw i annan serten aktivite ki dimoun in asosye sa avek en aktivite politik ki i pa'n vini. Ler nou pe retir tousala.

E prezan ki lo merit fodre ki lo merit e letan nou donn plis lotonomi donn Minister, pou zot kapab fer sa e ki sa i ava ganny fer. Mon tou bann lenstans depi ler mon la 8 mwan kot nou'n fer pledwari avek *DPA* nou'n nobou kapab fer li. Mersi Onorab.

MR SPEAKER

Mersi Minis. Avek sa nou a pran nou prosen kestyon e nou pou ankor en sanzman ofisyel, nou pou dir orevwar Mr Fabien Palmyre *PS* e Ms Penny Belmont *CEO*. Nou ava dir zot mersi pou zot partisipasyon e bonn apre midi. E nou ava rapel prosen zofisye.

(PS PALMYRE AND HIS DELEGATION WAS EXCUSED FROM THE HOUSE)

(APPLAUSE)

MR SPEAKER

Bon bonn apre midi byenveni Mr Clive Roucou *Principal Secretary* pou Departman Lafanmir ki zwenn Minis pou en kestyon ki konsern sa Departman. E sa kestyon i adrese par Onorab Naddy Zialor.

HON NADDY ZIALOR

Mersi Mr Speaker. Bonn apre midi Minis. Bonn apre midi nouvo vizaz *PS* Roucou permet mwan felisit ou konman enn nou ansyen koleg dan ou nouvo post konman *PS*.

(APPLAUSE)

HON NADDY ZIALOR

Mon kestyon i ler *comme* swivan; eski Minis responsab pou Departman Lafanmir i kapab eksplik nou Lasanble ki *status* e leta sant vokasyonnel North East Point e ki plan sa Minister pou sa sant ?

Mon dezyenm kestyon ki group dimoun pe ganny targete anba *Disabled Trust Fund* e ki nivo prosedir pou ganny akse avek sa fon? Mersi Mr Speaker.

MR SPEAKER

Mersi Onorab Zialor. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou sa kestyon tre valid, mon pou konmanse Mr Speaker e apre si ou permet PS Roucou i ava donn bann detay.

Premye kestyon sa sant vokasyonnel North East Point i byen regretab lo la ozordi pou dir i pa dan en bon leta ditou.

Son leta nou menm kapab dekrir li konman deplorab. Taler PS i ava donn detay. Nou ganny difikilte, mwan mon ganny difikilte pou krwar ki mannyer en group dimoun sitan spesyal dan nou sosyete, sa kalite neglizans ki'n arive pandan sa bann letan ki sant ou a krwar in ganny oubliye li.

E nou'n napa swa nou'n vwar nou bezwen frenm sa sant apre evalyasyon ek Departman Lasante in fer an Desanm lannen pase, e in annan kat diferan kontrakter ki nou'n envite.

Letan nou'n abzorb konsey bann dimoun dezabilite, nou annan nou en nouvo Direkter Zeneral ki annan apepre 4 mwan 5 mwan ki dan lofis pe fer travay fantastik e la nouvo PS pe donn li sipor.

E zot in vin evalye e donn zot lopinyon profesyonnel e zot lopinyon pe sizere ki sa landrwa

i merit ganny demoli e rekonstrir.

An se moman Departman Lafanmir pe esper rezilta sorti kot *Procurement*, pou konnen lekel ki pou ganny Kontra pou vin aranz sa sant.

Nou bezwen aranz li tanporerman pou kapab reouever, vi ki napa landrwa pou bann paran e bann etidyan servi antretan.

E mon ti ava kontan fer resorti Mr Speaker ki plan lonterm pou sa sant, nou pa ankor definir li akoz nou pou annan en *meeting* avek Minister Ledikasyon Zedi sa semenn la, pou nou kapab deside lekel sa bout akoz i en sant vokasyonnel ledikasyon, lekel bout ki al avek Minister Ledikasyon, akoz i deza annan Lekol Eksepsyonnel anba Ledikasyon nou bezwen re revwar li net.

E pou sa bann demars mon ti ava kontan remersye de dimoun dan Lasanble ozordi - Onorab Zialor loter sa kestyon menm e apre Onorab Esparon. Akoz zot donn bokou sipor lentere kot Departman Lafanmir sirtou ler nou ti napa PS, pou nou kapab fer sa.

E nou konnen poudir nou pou fer sa bann *meeting* pou envit zot e larestan Manm Onorab ki ti ava kontan i annan pa mal louvraz pou nou fer, en

bon pe louvraz pou nou fer, pou nou kapab vin devan met sa lo en nivo ki akseptab.

Dezyenm bout kestyon Mr Speaker, reform avek *Disabled Trust Fund* in konmanse e bann kriter ek bann prosedir sa osi i ankor pe ganny etabli. *PS* i ava donn detay taler.

E i annan en nouvo Komite ki'n ganny met an plas, ki annan reprezantan sorti bann diferan sekter pou fer sir ki vre ki bann dimoun ki merite anba sa *Trust Fund* i gannyen. Mersi Mr Speaker. Mon ti ava kontan envit *PS* Roucou pou donn en pti pe plis detay.

MR SPEAKER

Wi *PS* nou ava donn ou laparol.

PS CLIVE ROUCOU

Mersi Mr Speaker. Mersi Onorab Zialor pou sa kestyon. Mr Speaker parey Minis in dir North East Point kot *VTC building* li menm striktir i deplorab, e i pa *safe* pou nou bann etidyan, nou bann zanfan ki laba.

E pou azoute ki tou bann kontrakter ki'n donn zot lopinyon lo la zot osi zot in sizere ki batiman pa pou kapab *house* sa bann etidyan ankor. E i devret ganny demoli *according* pou sa bann kontrakter.

Me selman pli gro problemn ki nou pe gannyen se avek bann paran ki pe vwar zot pe ganny difikilte pou ganny en landrwa spesifik pou sa bann zanfan.

Laplipar sa bann zanfan zot depandan en kantite lo sa lekol. E bann paran zot dan difikilte akoz kot zot pa pe kapab al travay, e zot napa en landrwa spesifik pou met zot zanfan.

Me selman nou Departman i kontinyen an negosyasyon avek bann lezot *partners* parey *SIAD*, *CEPS* e Lasosyasyon bann Dezabilte, sa i avek le bi pou nou kontinyen ankadre nou bann etidyan lo en baz tanporer.

Alors Departman pe fer tou le mye posibil pou nou fasilite sa eleman ganny en landrwa spesifik oubyen fasilite lafanmir sa bann zanfan, pou zot bouz devan zot. Mersi Mr Speaker.

MR SPEAKER

Mersi *PS*. Onorab Zialor ou annan siplemanter? Wi.

HON NADDY ZIALOR

Mersi Mr Speaker. Mersi Minis, mersi *PS* pou ou lenformasyon byen detaye.

Mon ti ava kontan koz en pti gin lo sa *Disabled Trust Fund*, an se moman a ler aktyel

petet ti ava bon nou konnen konbyen i annan dan sa fon?

Me pli enportan eski i annan okenn groupman oubyen okenn endividi ki'n fer aplikasyon dan sa fon, ki a ler aktyel zot pa ankor zot in fini ganny aprouvasyon depi lannen pase, ki zot proze in ganny aprouve, me solman larzan pa ankor rantre lo zot kont pou zot kapab *purchase whatever* lekiman ki zot in demande. Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Nou napa egzakte man sa bann sif la avek nou. E nou kapab fer Onorab gannyen apre dan en kourt dele letan. Akoz nou'n bezwen letan nou'n pran sa de Konsey, Konsey Dimoun Dezabilite Konsey bann Dimoun Aze, i annan pa mal problem iregalite finansyel ladan.

E kot Sekretarya mon'n bezwen rod *FC* kot Minis Finans pou vin donn nou en koudmen pou pran tou sa bann kont. I annan nou pa ankor ni kapab idantifye osi tou kote i ete. E nou pe fer en levanter pou nou kapab met azour tousala.

Savedir nou'n sispann peyman Onorab, atraver Mr Speaker, pou nou kapab met en lord, fer sir ki nou annan nou bann regilasyon i ganny swiv prosedir ki annan en lord dan tou sa bann zafer.

E i annan bann lenformasyon osi ki nou ankor pe rode, e in difisil pou nou gannyen. E nou bezwen fer parey sa Lasanble osi, ou konnen i annan dimoun ki pa kontan sa bann reform ki nou pe fer.

E nou'n fer fas nou'n fer fas avek en pe sabotaz, nou'n fer fas avek bann dimoun ki'n kite 24 erdtan in ale e in fer sir ki i pa'n donn lenformasyon, tousala. E nou pe fer bann prosedir pou nou kapab met anba kontrol.

E nou sispekte, mon pa dir i annan, nou sispekte petet kekfwa en pe bann iregalite en pe petet kekfwa bann labi dan tou le de. E nou'n refer ti annan en bann *Suspence account* kot nou'n bezwen avek Minister Finans donn en koudmen pou nou met en lord dan tousala.

Me selman mon konnen poudir *PS Roucou* ler in vini in met son lanmen lo la. E i ava kapab donn sa Lasanble lenformasyon o pli vit posib konman sa bann kont in ganny

fini met annord. Mersi Mr Speaker.

MR SPEAKER

Mersi Minis. Onorab Labrosse.

HON RICHARD LABROSSE

Bonn apre midi Mr Speaker. Bonn apre midi tou bann koleg. Bonn apre midi tou dimoun ki a lekout, espesyalman mon bann zabitan Plaisance. Mon krwar ozordi nou vreman fyer ozordi pou vwar de nou profesyonnel dan sa Lasanble.

Mr Speaker se pou sa rezon ki nou en bastyon bann dimoun pli entelizan, dan lemond pa dan Sesel en, (pa nerv ek mwan.) *(laughter)*

Ok Mr Speaker pou PS avek Minis ler mon'n ekout Minis la konsernan aköz sa bann zafer fon iregalite i en pe fatig mwan. *Just* parey mon ti koz lo zafer larzan kot bann dimoun Plaisance laba koz ek PS apre pli tar.

So lo kote sant li menm la, zot in dir ki sa sant i pa enpartyen pou met bann etidyan pou vin aprann keksoz ladan, son leta ki zot in dekrir la.

Me mon ti ava kontan konnen ki zot plan avek sa bann manrmay a se moman. Eski i annan bann alternativ ki zot pe mazin fer pou zot kapab

kontinyen avek zot laprantisaz, vi ki nou konnen sa bann dimoun bezwen sa pti latansyon spesyal.

Aprè dezyenmman konsernan sa fon Minis si ou ti kapab brefman donn mwan en pti pe lenformasyon, aköz dan mon distrik ki i annan bann dimoun ki'n apros mwan. Par egzant mon annan en msye la ki e esper en lili en pti pe spesyal ki konsernan son ka ki i pe viv avek.

Konmsi brefman ki mannyer konman en MNA oubyen en endividi bann endividi deor i pou kapab ganny akse avek sa fon ler zot dan bezwen ? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker, mersi Onorab pou sa de kestyon. Lo kote alternativ mon pou les PS Roucou eksplik en pti pe pli byen, in konmans eksplik en pe taler.

Lo kote ganny akse avek sa fon byento mon krwar PS i ava petet regarde ki mannyer nou kapab ganny akse avek.

Me selman Departman li i pe fonksyonnen li, i annan en divizyon dan sa Departman ki

pou dimoun aze avek pou bann dimoun otreman kapab, ki ou kapab atraver *PS* Roucou fer sa demann fer sa rapel e nou kapab regarde.

Yer nou fek fer pe konversasyon avek Lasante pe regarde sa bann lekipman spesyalize, pou nou bann dimoun ki mannyer. E mon konnen sa divizyon i fer plis *meeting*, akoz zot in fer kot mon, avek bann lasosyasyon ki la aktyel zot pe vini e zot pe konmans met en plan, zot pe konmans met en plan ater ki nou ava evalye ki mannyer nou konmans enplimante pou nou konmanse.

Nou vremen demann leskiz akoz nou konnen ti merit fer yer, be letan nou'n pran sa nou'n bezwen met lord ladan nou'n bezwen odite, nou'n bezwen fer en kantite rod lenformasyon i annan ki nou ankor pe rode sirtou bann dimoun avek dimoun aze nou ankor pe rode lenformasyon.

E i annan dimoun ki pe fer ekspre pa donn lenformasyon pa pe donner, pou nou kapab fer sir nou pe met azour sa bann. Me ou kapab fer demann avek Departman Lafanmir pou bann ka spesifik. Mersi Mr Speaker. Mon ti ava kontan petet *PS*

Roucou i eksplik alternativ laranzman. Mersi.

MR SPEAKER

Wi *PS* ou ava adrese.

PS CLIVE ROUCOU

Mersi Mr Speaker. Mersi Onorab pou ou kestyon. Mr Speaker i bon pou not laporte Lasanble ki sa divizyon sa departman li menm i annan zis 4 mwan an egzistans.

E parey mon'n dir oparavan nou departman i antre pros kolaborasyon e negosyasyon e konsiltasyon avek lezot *partners* parey *SIAD CEPS* Lasosyasyon bann Dezabilite, kot nou vwar bann bezwen sa bann etidyan.

Kot nou vwar zot koz zot pli kapab pou kapab antre konmsa zot kapab ganny plase dan sa bann landrwa spesifik, e la i ava kontinyen zot letid lo en baz tanporer ziska ler nou kapab met nou sant an mars. Mersi Mr Speaker.

MR SPEAKER

Mersi. Onorab Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker bonn apre midi Minis ek ou delegasyon. Bonn apre midi tou koleg.

Minis vi ki *URS* i nepli egziste, kot nou ti vwar bokou nou bann zenn avek en serten dezabilite, ki ti pe ganny anploye anba sa *scheme*, ozordi zot vwar zot pe fer fas a bokou diskriminasyon, sirtou dan bann lorganizasyon prive, ki pe refize anploy zot.

Menm si avan sa bann menm zenn ti otreman kapab ti pe travay dan sa lorganizasyon plis ki 2 a 3an.

E menm Minis i annan enn de sa bann zenn i'n la in al fer *interview* zot ganny met lo ler ki zot pou ganny promet en travay zot pou ganny en *call* apre sa bann landrwa i zis koup kontak avek zot. E zot fer fas avek gro dezapwentman.

Minis eski ou Minister pe mazin konsider en *Special Scheme* or en lot fason ki kapab arive ede siport sa bann zenn otreman kapab, ki annan serten talan me senpleman zot pa pe ganny travay, aköz zis en serten dezabilite zot pe ganny met a kote. E sa i en gro presyon ek zot fanmir. Mersi.

MR SPEAKER

Mersi. Wi Minis.

MINISTER MARIE-CELINE ZIALOR

Mersi Mr Speaker. Mersi Onorab pou sa kestyon. Lo ou

premye komanter lo *URS* nou pe travay tre pre Lazans Proteksyon Sosyal ansanm avek Labank Mondyal nou pe refer net sa bann *Scheme* pou vin pli ekitab pou ki retir labi, me selman ki adres bann konsern.

E nou'n fer sir ki nou annan reprezantan lo la e nou *co-chair* tou sa Komite. Ki nou pe fer sir teknik kot nou e adres sa bann konsern ki ou a pe dir pou lasistans bann dimoun otreman kapab.

Ki i en travay ki nou pe fer konzwentman avek Departman Sosyal. Lo kote *special Scheme* travay ki premye plan mon krwar *PS* i ava kapab elabore, premye plan ki sa divizyon pe fer i pe fer levanter.

Nou pa konnen lekel nou bann dimoun ou vwar bann lenformasyon fer levanter nou pe fer sa ki nou apel n *profiling* tou e ki kalite zot siport spesyalize sak sa bann dimoun i bezwen. Apre nou ava kapab fer *Scheme*.

E nou bezwen travay avek pa zis sa avek bann paran osi i annan bann ki anvi avans devan zot paran i per tou. Mon konnen i annan sa ka diskriminasyon i ankor annan, me selman fodre nou raporte. Anba Konstitisyon Sesel i fer provizyon pou drwa tou dimoun

sa bann dimoun osi i enkli e mon pa krwar nou fer en keksoz separe.

La nou pe al kont lespri en fodre selman bann dimoun i raporte e nou si anmenn sa bann *case* kot nou, nou pou fer sir, nou fer sir ki nou pran li serye e nou fer sir ki sa bann ka diskriminasyon i ganny *deal* avek fer, fas avek si lanplwa ti napa nanryen i zis ganny tire.

Kot nou kapab mon konnen kot pa mal i annan en ka mon konnen kot Onorab Woodcock Praslin probableman, e nou pou bezwen e nou ti pou monte Praslin me selman nou pa'n kapab aköz restriksyon, pou nou kapab adrese fer vin fer sa bann travay.

E la nou kontan aköz nou'n ganny *PS* Lafanmir la ki dinamik e ki pe donn en kantite koudmen; ki pe donn bokou koudmen sa Departman pou al dan sa direksyon.

Parey mon pe dir mon pe repet mon lekor me selman mon bezwen fer sorti dan Lasanble Mr Speaker, ki pa tou dimoun ki kontan sa bann sanzman, *hmmm*.

E letan ou annan sa bann rezistans parfwa i fer ou fer detrwa lepa par deryer, kekfwade fwa nou pa dir nou pa fer sorti.

E la avek nouvo Direkter Zeneral i pe regarde kapasite tou anndan. E pe fer sir ki bann dimoun ki pou antre ki la, zot pe vremen travay avek zot leker zot napa en dezyenm azanda, zot osi anndan osi i kapab annan labi tou.

E nou bezwen fer sir ki sa e si annan okenn bann diferan *Special Scheme* i ava depan lo lenformasyon ki nou anmase, ki apre ou ava kapab partaz ek sa Lasanble. Mon pa konnen Mr Speaker si *PS* Roucou o annan lenformasyon adisyannel. Mersi.

MR SPEAKER

PS oule azout keksoz?

PS CLIVE ROUCOU

Mersi Mr Speaker. Mr Speaker parey Minis in mansyonnen, ki Departman depi ler mon'n vini la mou pe al konman *profiling* e i enportan pou Lasanble konnen ki lenformasyon lo nou bann dimoun avek dezabilite oubyen abilite spesyal, li menm li i pa kler nou napa statistik spesifik oubyen enformen, pou nou konn kwa ki annan kwa ki napa.

E sa legzersis *profiling* ki nou pe al konmanse tre byento avek *DICT NBS ASP and CEPS* so i ava permet nou konman en Departman ganny tou da bann

lenformasyon spesifik, kot la nou ava kapab vwar kwa ki nou bezwen e kwa ki nou napa, e kwa ki nou kapab anmenn devan pou ed sa bann dimoun. Mersi Mr Speaker.

MR SPEAKER

Mersi. Nou a pran kestyon Onorab Esparon e a swiv par Onorab William.

HON REGINA ESPARON

Mersi Mr Speaker. Mr Speaker mon ti ava kontan demann Minis, an vi ki in dir no zot pa konnen dan sa nouvo reform kot zot pe fer kot VTC si i pou rekonstri sa landrwa la oubyen si i pou en lot landrwa.

Me petet Minis ti ava bon ki nou pran kont ki si sa zot pou pran desizyon pou refer sa lekol dan sa plasman, ki nou bezwen regard son lenfrastriktir byen.

Parske an se moman la nou konnen i en landrwa ki annan delo monte e delo monte ti kree bokou lenkonvenyans pou bann zanfan ki pe servi la dan lepase, ki nou pa met en lenfrastriktir la ki pou osi ganny sa lenkonvenyans avek sa problem delo monte ki sorti dan sa lanmar.

Parski nou'n fer en vizit avek Minis Lanvironnman pou regarde ki mannyer pou sey anvoy sa delo en pe pli lwen, i ki

pa ava akimile la pou kree konvenyans pou sa bann manrmay. Me nou pa ankor finalize kwa ki pou ganny fer la.

E dezyenmman Mr Speaker, mon i a kontan demann avek Minis nou'n koz avek zafer bann larzan ki mannyer i ganny depanse sa fon.

Mon ti ava kontan konnen vremen sirtou bann *Grant* ki zot resevwar, ki mannyer sa *Grant* i ganny depanse. Nou konnen i annan sa *famous* larzan *UNESCO* la R306mil ki ti ganny *mismanage* dan lepase. Ennler ti anba *NCFD*; -ennler mon pa konnen si Lasosyasyon Dezabilite.

Me nou ti ava kontan ganny en leklersisman letan bann *Grant* i antre, ki fason pou annan sa bon *monitoring*, ki sa larzan i ganny depanse pou sa proze ki ti'n ganny *budget for*. Mersi.

MR SPEAKER

Mers. Minis.

MINISTER MARIE-CELINE ZIALOR

Mersi Mr Speaker mersi Onorab. Lo kote reform i en pe pli profon ki sa ou'n eksplike la. Akoz nou bezwen deside avek Minister Ledikasyon armoniz nou bann program ansanm.

Regarde eski ledikasyon i pou pran nou pa ankor nou pa ankor nou pe fer *meeting* la Zedi eski Ledikasyon i pou pran sa kote akoz i en *vocational school*?

Eski i pa merit enkli siv, eski ki kalite lapros nou pou gannyen avek? Akoz i annan bann etidyan laba ki par lao 40an en. Par lao 40an nou bezwen pran sa bann keksoz an kont e regarde eski nou pa bezwen en lot sant spesyalize pa sa enn ki la?

Fer en lot lapros en lot ek nou bann teknisyen *advise* ki pli bon lapros ki nou pou pran. E regarde ki kalite sant e nou deza pe travay avek en konsiltan ki pe re regard sa ki pe regard *disabled* osi tou pe regarde li.

Akoz nou pe le ganny bann proze anba *India Small Grant*, pou nou kapab fer en pe travay en pe deswit osi tou. Nou bezwen fer bann plan kour term parey tou sa ki nou'n dir lonterm nou bezwen rod bann solisyon kour term osi tou, ki resours i deza la nou kapab fer, pou sa.

E ou dezyenm pwen definitivman ki nou'n fer? Nou'n fer nou *FC* in en dimoun ki dan Sekretarya Minis, tou sa bann fon tou sa bann *Grant* i bezwen pas parla;- pa ti pe pase oparavan.

Sa i enn bann keksoz kot nou'n sanze kot la prezan nou annan en pli gran apersi e kot nou de *PS* nou ava ganny tou le mwan nou ganny en rapor lo sa bann *statement*. E nou ava kapab anmezir nou fer Lasanble gannyen *request* lo sa bann kote fon.

W i ti annan bann *Suspence Account* ki'n kennsel, ki pe regarde ki mannyer nou refer sa bann fon, dan en fason pli transparans kot nou rann kont e fer sir ki larzan pe ganny byen depanse. Mersi Mr Speaker.

MR SPEAKER

Mersi Minis. Onorab William.

HON WAVEN WILLIAM

Mersi Mr Speaker. Mr Speaker mon ti ava kontan demann Minis mon anvi fer bann Manm Lasanble mazine, ki ti sizyenm Lasanble, i annan sa fiy nonmen Tannie Nathifa Samedi ki ti vin fer en diskour an term *braille* e i ti anvi vin en *braille teacher*.

Mon anvi demann avek Minis vizavi sa *Disability Trust Fund*, si zot ava onor langazman sizyenm Lasanble pou kapab ed sa fiy? Akoz i annan bann lekipman ki i bezwen. Onor langazman ki sizyenm Lasanble ti fer dan

setyenm Lasanble la, akoz mwan mon ti en temwen mon anvi reviv sa *case* ki Minis ava konsider ka sa fiy.

Akoz sa fiy malgre ki i pa vwar kler, i annan en vizyon i anvi fer son legzanmen avanse me i bezwen bann lekipman.

So mon ti ava kontan met ka Tannie e Minis dir nou ki fason ki sa setyenm Lasanble ki ti fer sa komitman atraver *Leader* Lopozisyon ki konmela i Prezidan pou nou kapab onor sa langazman avek sa fiy avek sa fanmir. Mersi

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Travay in deza konmans nou'n fini mwan personnelman nou'n zwenn i annan en Lasosyasyon bann Dimoun Aveg, ki'n vini, sa zour Tannie pa ti kapab vini. Be nou'n konmans fer en pe travay pou nou kapab zisteman rode ki mannyer nou onor sa bann langazman.

E mon konnen i annan ankor *meeting* mon ava les *PS Roucou* donn en pti pe plis detay. Mersi Mr Speaker.

MR SPEAKER

PS.

PS CLIVE ROUCOU

Mersi Mr Speaker. Mersi Onorab pou ou kestyon. Mr Speaker *in fact* bomaten menm mon'n dan en *meeting* avek Lasosyasyon bann Dimoun Aveg kot sa pwen kestyon lo *braille* aprann *braille*.

In fact mon pwen ki mon'n met devan se ki Lasosyasyon i devret vin pli armonize avek kanmarad. Kot tou bann *partners* i vin pli kolektiv.

Sel problemn *from meeting* bomaten ki nou'n gannyen tro bokou bann dimoun ki an deor oubyen ki pa vwar kler pe fer zot demann lo zot menm, zot pa pe pas atraver Lasosyasyon.

Alors pwen ki'n monte devan ki'n for se nou pe ankor avek sa *profiling* avek plis lenportans konn lakantite dimoun ki aveg. E sa anmenn zot dan Lasosyasyon e atraver Lasosyasyon kot Lasosyasyon i ava sa *body* li menm kot i kapab tap laport ganny lenformasyon, gete kwa ki *available* pou *bring in* sa *braille*.

In fact zot pe koz lo *braille 1* ki en *simple form of the braille system* ki bann etidyan i pli fasil pou aprann. E *from thereon* zot kapab aprann plis sa *brailing* ki pli an avan

Me tousala Departman Lafanmir avek Lasosyasyon Aveg, nou pe travay an pros kolaborasyon pou nou anmenn sa devan.

Akoz en pwen ankor ki'n monte se dimoun ki aveg son lespri i ankor bon zot fizikman zot kapab fer desizyon, zot kapab aprann en keksoz, *the only* problem ki pe arive se Lasosyasyon pa pe travay an byen kordinasyon pou anmenn sa devan.

Me avek Departman Lafanmir, avek Lasosyasyon Aveg nou pe travay pros e a mon garanti ou Onorab ki keksoz pou materyalize pou Tannie. Mersi Mr Speaker.

MR SPEAKER

Mersi *PS*. Onorab Georges. E i a swiv par onorab Letourdie.

HON BERNARD GEORGES

Mersi Mr Speaker. Mr Speaker mon ti ava kontan o konmansman swiv dan swiv parol Onorab Zialor e felisit nou ansyen koleg Onorab ozordi *PS* Roucou dan son nouvo fonksyon.

Mon ti ava kontan lo lapar nou tou pou dir li ki mannyer nou fyer, e ki nou kontan pou li, kot in arive. Swet li tou de bon parey mon'n dir dan son fonksyon e dir li *PS*

Roucou ou annan ou en fantastik Minis, alor profite e donn li tou sipor ki pou kapab donn li silvouple.

Mr Speaker kestyon ki mon annan se, pa mon kestyon me i sorti deor set en dimoun ki'n demann mon demann sa kestyon, i ase enkyet pou vwar ki sant i pa operasyonnel pou lemoman.

E i ti ava kontan ki Minis ti ava kapab eksplike, ki kantite dimoun ki'n ganny afekte par lefe ki sa sant pa pe opere la pou lemoman e pou dir si dimoun i enterese pou donn en koudmen pou ede, ki mannyer zot kapab fer li e ki sonm larzan eksetera ki kekfw pa sonm larzan me dan ki fason dimoun i kapab ede finansyerman ou otreman dan limedya? Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mersi Onorab pou sa kestyon. Sa bann konsern i pa nouvo. Nou'n gannyen e nou annan en dimoun ki reprezantan tou sa bann paran ki ti kontakte nou lofis ki ti pe demande.

E nou ti pe regard avek direkter zeneral pou zwenn avek zot. Zwenn avek tou sa

bann paran ki zot pa konnen kot pou met zot zanfan, zot bezwen al travay kot i annan difikilte anmas sa bann lenformasyon, regarde ki mannyer nou antre an en konversasyon avek si i bann travayer sekter piblik, i fasil pou nou fer dyalog avek nou bann koleg.

Si sekter prive ki mannyer nou kapab antre pou nou vwar, ki nou kapab ganny fer si non ki mannyer nou kapab al kot Lazans Proteksyon Sosyal pou demann bann lasistans tanporer, pou fer sa arive. Sa i bann diskisyon ki pe fer avek sa bann paran. E mersi bokou ou sa dimoun ki'n anvoy sa mesaz ki anvi ede.

E mon ti ava dir ek li kontakte *PS Roucou*, e zot va regarde ansanm ki mannyer. Kekfwa i annan bann dimoun osi tou nou, nou pa annan lo lide nou pa bann dimoun ki annan tou nide. I annan dimoun ki annan bokou pli bon lide ki nou, e nou pare pou nou ekout zot.

Zot vin avek zot lide nou ava donn zot en platform nou ava regarde ansanm ki mannyer nou ava rezourd. Mersi bokou Mr Speaker.

MR SPEAKER

Mersi. Onorab Letourdie.

HON JANY LETOURDIE

Mersi Mr Speaker. Bonn apre midi tou dimoun. Minis an se ki konsern bann zenn avek dezabilite ki anvi sorti anba dominasyon lafanmir, akoz i annan en kantite la kekfwa zot santi zot pe ganny abize.

Me parey *PS* in dir zot kapab fer preski tou zot keksoz zot menm e zot anvi kekfwa viv en pe zot lavi zot tousel, zot anvi santi zot endepandan. Ki sipor ki ava annan lo kote fon pou zot?

Apre Minis pou reponn ou lapel tou dimoun la anndan i annan en distrik, menm si ou napa en distrik me ou reste dan en distrik, ou'n deza fer kanpanyan dan bann distrik. Kekfwa mon kapab dir la parey mwan lo mon kote mon konnen kantite preski tou dimoun ki annan en dezabilite dan nou distrik, dan mon distrik e sa bann dimoun i annan en kantite zet pe ganny n kantite problem,

alors nou osi la nou ti kapab vin *onboard* donn en koudmen akoz nou deza annan nou lalis nou konn nou bann dimoun dan nou distrik. Mersi Mr Speaker.

MR SPEAKER

Mersi. Minis.

MINISTER MARIE-CELINE ZIALOR

Mersi bokou Mr Speaker, mersi bokou Onorab pou sa kontribisyon sirtou sa enn dernyen la mon krwar PS Roucou i ava pran not e i ava kapab vin ver zot son bann ex-koleg pou kapab ganny sa sipor.

Sirtou pou ganny en pe bann lenformasyon ki nou bezwen. Lo kote pou sa fon, definitivman mon krwar nou kapab konsidere letan nou napa kriter deza definir, me selman i kapab ganny konsidere pou kapab ed sa bann zenn ki anvi epanouisman.

Me selman napa zis en fason fer keksoz. Nou annan nou pa mal bann diferan e sirtou letan nou pe koz lo bann dimoun otreman kapab bann group spesifik mon'n vwar, ki i annan bokou led parey si ou pe fer zis pou bann fiy madanm ensidswit bann group *elderly* i annan en kantite bilateral, ki nou bann kot *Foreign Affairs* i annan en kantite loportinite.

E nou kapab si sa bann dimoun kapab fer en bon regroupman, e nou ekrir en proze e nou kapab nou anvoye nou kapab ganny en kantite sipor.

Mon pe mazin sirtou espesyalman akoz avan ler mon vini mon'n vwar en proze, dan lofis konsernen avek *La Reunion*, bann Korperasyon, ki montre bann korporasyon biznes pou bann zenn ki otreman kapab.

Akoz si ou konnen ou pa le anploy nou dezabilite akoz nou biznes e sa i tre posib e sa i en proze ki nou bezwen anmennen Sesel. Nou bezwen kapab fer sa e lezot osi bann proze ki parey mon ti pe dir taler *Paralympic* i en profesyon ki en atlet, en zenn atlet avek otreman kapab i kapab fer e fodre pa ki nou anpese.

Dan domenn lar, tou sa bann laveni e fodre ki nou sorti en pti git dan bwat e nou annan sa bann e nou annan avek divizyon sa divizyon ki *deal* avek otreman kapab, obor li i annan en Divizyon *Quality Of Life - Qualité De Vie* ki travay tre pre ansanm ki kapab anmenn bann psikolog, annan *consellers* ed bann paran kapab large.

Konpran paran i per, mon kapab konpran pa fasil kekfwa i annan bann labi, kapab larg lanmen sa bann zenn e les zot epanouir. Sa tousala i posib e toultan nou lans lapel nou annan pa mal dimoun osi ki pe vin devan.

E nou pe fer bann platform, kot nou bezwen al tap laport, nou al tap laport ansanm e nou vreman apresye nou *welcome* sa bann nide la. Mersi bokou Mr Speaker.

MR SPEAKER

Mersi Minis. Onorab Porice.

HON DOYACE PORICE

Mersi Mr Speaker. Bonn apre midi *PS* Roucou.

Minis eski ou kapab enform sa Lasanble, si ou Minister pe travay avek bann lezot Minister ou lezot Lazans pou benefis sa bann zanfan ki sorti dan sa sant vokasyonnel sirtou kot i konsern lanplwa? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Definitivman wi, e *PS* Roucou i nouvo, be selman enn bann nouvo fason fer avek bann *PS* ki nou pe fer, se ki sa bann kolaborasyon e ki zot rol i al en pti pe pli o ki zis zere, zot al fer sa bann kolaborasyon.

E mon a les *PS* Roucou eksplik en pti git son plan pou fer sa bann kolaborasyon avek bann larestan departman, e

lekel sa bann departman pou kapab annan en pli bon armonizasyon. Mersi Mr Speaker.

MR SPEAKER

Mersi Minis. Onorab Michel Roucou. Atann en pi moman Onorab. *PS* ou ti anvi azout keksoz lo sa ki Minis in dir?

PS CLIVE ROUCOU

Mersi Mr Speaker. Mr Speaker mon pou bezwen tourn en pti git deryer kot Onorab Letourdie in koz lo epanouisman nou bann dimoun avek abilite spesyal.

Ankor i enportan pou mwan met a latansyon Lasanble ki menm bann lenformasyon ki nou'n anmase kot nou, nou pe *stress* en kantite pour bann dimoun epanouir.

Me nou'n dan lenformasyon nou'n war ki i annan ki i annan kantite paran osi, pa anvi sa bann zanfan bouz devan. E keksoz spesyal ki zot in met devan se ki ot pou perdi zot benefis si sa bann zanfan i epanouir oubyen i al travay e zot, zot pou dan problemn prezan.

So they are more or less kontan sa bann dimoun, nou bann zanfan, nou bann frer ek ser i la zis aköz, zis pou zot pa

perdi zot benefis. Me avek sa *profiling* ki nou ti koz lo la avan, i a donn nou en nide i a fer nou war lo ki *avenue* ki nou pou pran.

E an relasyon avek s aki Onorab Doyace in demande. *In fact*, nou'n komans tre pros dan lakour menm, so i dan nou Departman kot mon seksyon *PS Palmyre*, *CEO Larue* nou pe travay tre pros pou nou donn sa sans nou bann dimoun pou vwar lo ki fason ki nou pou bouz devan.

E dan mon Departman li menm, i annan 3 Divizyon ankor en Divizyon *Disabled and Elderlies*, en Divizyon Resers, e lot Divizyon kot, nou lot Divizyon kot *Quality of Life Division*.

Tousala nou travay tre pros e an kolaborasyon vwar ki manner nou koman en departman nou kapab enpakte lo lavi nou bann fanmir e fer li amelyore pour ki nou kapab al devan. Mersi Mr Speaker.

MR SPEAKER

Mersi *PS*. Onorab Roucou.

HON MICHEL ROUCOU

Mersi Mr Speaker. Bonn apre midi Minis ankor enn fwa. Bonn apre midi *PS Roucou*, *welcome back*.

Minis si ou kapab dir nou lekel sa nouvo Direkter Zeneral ki ou'n koz lo la? Apre eski ou'n ganny en pti pe dan vizit ki ou'n fer ek bann kontrakter, ou'n ganny en pti pe konbyen i ti pou koute si ou ti fer reparasyon lo sa *building* li menm li? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Lo sa detay konsernan konbyen pou koute, sa mon les *PS Roucou* i a regarde i a reponn. Nou nouvo direkter Zeneral se Mrs Rosa Morin, li ki ansarz sa Divizyon.

Petet Mr Speaker zis pou azoute avan mon donn laparol avek *PS Roucou*. Lo sa kekyon ki Onorab Doyace fek demande bann kolaborasyon ki mon ti'n bliye ankor i annan sitan en, nou annan enn nou a pe al fer avek *Indonésie*, en gro, kot nou de *PS* nou'n al *meeting* avek *Foreign Affairs*.

E i pou annan en *wellness*, en sant kot nou pou annan spesyalize lo nivo enternasyonal nivo Lafrik nou a pe koze. E semenn, mwan prosen le 3, le 6 Out i pou annan en delegasyon ki pou pe vini e sa i pou *fully funded* kot

nou pou annan nou en bon *Wellness Centre* pou sa.

E sirtou pou fer ki bann otremman kapab, bann dimoun aze i kapab fer en kalite legzersis ek lekipman ki apropiye. E bann larestan servis i pou lafanmir li, en *Wellness Family Centre en hub for Africa*, ki nou pou al komans diskite pou nou kapab fer bann negosyasyon.

E *ASEAN* ki Korperasyon ki regard *L'Asie* e zot pe fer bann Korperasyon Lafrik. Zot in anvi fer en Korperasyon ek Sesel, e nou *comme d'habitude* nou'n sezi loportinite e nou a pe travay lo la pou nou kapab fer sa proze materyalize.

Sa i montre ou ki nivo Korperasyon ki nou a pe koz lo la, ki enkli tou sa bann formasyon, e nou konnen poudir nou mank kapasite pou nou okip - taler *PS Roucou* in koze poudir bann dimoun pa oule *let go* akoz zot pe, zot pe selman okip byen e pa'n neserman akoz zot pa anvi.

Be ou bezwen konnen ki mannyer ou fer li. E sa bann dimoun zot annan bann sant spesyalize *Indonésie*. E zot pou vin fer pou nou vin regard bann formasyon, zis pou nou donn en portre lo kwa ki nou a pe koze, nou pou konkretiz li mwan prosen i ava annan.

E ki nou ti ava apre envit enn de bann manm ki demontre lentere, pou regarde ki mannyer nou form parti sa bann proze. Mersi Mr Speaker.

MR SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour Minis.

MR SPEAKER

Pardon. Minis ou pe sinyal mwan ki *PS Roucou* ti pou azout keksoz?

MINISTER MARIE-CELINE ZIALOR

Wi Mr Speaker. Dezyenm bout kestyon pou *PS Roucou*.

MR SPEAKER

Onorab Loizeau atann en pti moman, nou a les *PS* terminen.

HON NORBERT LOIZEAU

Napa problemm.

PS CLIVE ROUCOU

Mersi Mr Speaker. Mr Speaker mon anvi fer Onorab Roucou konnen ki nou bann *meeting* in komanse avek *MHILT*, e i an progre. Me sa lenformasyon lo konbyen i pa ankor table. Me selman nou *meeting* i an progre avek zot. Mersi

MR SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour Minis ankor enn fwa, *PS*. Mr speaker mon kestyon i vin koumsa.

Kestyon orizinalman sorti kot Onorab Zialor ki'n manke pou demande taler. Onorab Zialor ti a kontan konnen, vi ki sant pou fermen pandan sa peryod letan, ki pou arive ek sa bann dimoun ki ti pe travay laba avek sa bann manrmay otreman kapab?

E osi Minis vi ki sa travay i en travay en pe pa tro fasil. Dernyen fwa lo bonzour Sesel mon ti war 2 madanm pe eksplik zot travay, ki degre pou ou antre ladan ou bezwen annan sa lanmour pou sa bann zanfan.

Ki zot pe fer koman Minister pou ankouraz bokou plis dimoun pou pran sa metye pou zot kapab vin ed sa bann marmay? Akoz mon konnen dapre konsiltasyon avek Onorab Zialor i annan en mankman dan sa travay. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Mon krwar *part* sa kestyon nou'n reponn taler konsernan sa bann etidyan ki laba, zot dan lakour. E nou pe fer regarde bann konsiltasyon bann ki paran pe ganny difikilte avek dan lakour pou nou kapab regard swa zot ganny en *carer*, swa nou fer negosyasyon *work from home*. E ...

MR SPEAKER

Eskiz mwan, mon krwar Minis si mon pa tronpe Onorab ti pe demann ou lo travayer non?

MINISTER MARIE-CELINE ZIALOR

In demann lo tou lede. Sa nou'n fini, lo travayer, lo kote travayer mon a les *PS Roucou* eksplike bann travayer ki mannyer zot pe ganny re deplwaye pou fer sa. Mersi Mr Speaker,

MR SPEAKER

Mersi. *PS* ou ava azoute.

PS CLIVE ROUCOU

Mersi Mr Speaker. Mr Speaker pou komans pou nou, parey Onorab pe demande ki mannyer sa travay i difisil kwa ki pe dan plan ki nou pe fer. *In fact*, avek nou *meeting* ki nou'n annan avek lasosyasyon aveg

bomaten nou'n rekonnèt ki par egzanp i annan zis 2 *teacher* ki montre *braille* Sesel.

Avek nou *meeting* ki nou pou annan avek ledikasyon, sa i bann keksoz ki nou pou met lo latab ki manner nou pou ankouraz plis dimoun pou antre dan sa profesyon kot nou bann zanfan ki avek en abilite spesyal i ete.

E sa i en legzanp spesifik e dan lot kote nou bann travayer ki la zot an fonksyon nou pe gete ki manner nou pou kapab ganny zot pou reste la *through* sa *daily running of* sa landrwa. Nou pa anvi ou konnen plis ou pa la kot lakaz, lakaz i avarye.

So nou annan sa bann dimoun ki nou kontinyen kit zot azour pou zot gete kwa ki pou annan spesifik pou fer ki nou kit zot *in check* dan en fason ou en lot mon kapab dir. Mersi Mr Speaker.

MR SPEAKER

Mersi. Ou annan en kestyon vitman aköz nou pe al terminen. *Ok* dernyen pwen Onorab Henrie.

HON GERVAIS HENRIE

Wi en kestyon vitman Mr Speaker. Aköz letan mon tann dir bann etidyan kot sant vokasyonnel i dan lakour e i

annan prezan *staff* ki pou arive, mon en pe trakase pou sa.

Vitman si ou ti kapab dir nou konbyen etidyan e konbyen *staff* nou pe koze? E ki posibilite i annan ki Minister i koz avek Minister Ledikasyon an vi ki lekol letan i retourn normal avek sityasyon *COVID*?

I annan en semenn zanfan i lekol ki i fer i annan bann laklas ki vid, e posibleman zot kapab *move* tanporerman dan en lekol. Eski sa i pa en keksoz zot kapab diskite ek Minister Ledikasyon? Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mon pa pou kapab reponn sa kestyon Onorab, aköz mon pa en teknisyen. Sa bann dimoun ki travay avek sa bann zanfan i ava regarde, eski sa i posibilite non. Nou ava al anmenn sa propozisyon, nou annan *meeting* avek Minister Ledikasyon.

Be selman parey mon ti pe dir taler zis pou fer pwen kler, i annan bann etidyan laba zot pe zis la koman *baby sitter*. Sa sant, non sa sant ki par lao 45an tou i annan, ki laba ki zis

akoz bann paran napa landrwa pou met zot.

Vwala ki sa, kot sistenm ki annan *default* ladan ou vwar? E sa ki nou anvi kas sa lasenn, sa bann krwayans sa *mindset* ladan.

E mon krwar dan en kote frenm sa sant li, i paret konmsi i en problem, be dan problem i annan loportinite pou nou kapab fer pli byen. E mon krwar nou merit sezi sa loportinite dan plas re anmenn- Ou konnen ou fer progre ler ou sorti dan ou *zone* konfor. Nou'n sorti dan nou *zone* konfor, la i pe fors nou pou grandi, e nou pou bezwen grandi.

E dan nou konversasyon nou pe koz primer lo ki rol ledikasyon, kwa ki nou pou fer ek ledikasyon e letan ledikasyon ou pou bezwen *graduate*.

Sa bann manrmay laba napa *graduation* zot pa *graduate* ditou zot, zot reste la pou lavi. Be sa i pa en sant pou reste pou lavi, nou pou bezwen kapab fer sa bann evolison, regarde ki mannyer.

Si i annan en bezwen parey mon pe dir nou konpran, nou konpran poudir nou'n abitye e bann paran ki bezwen al travay. Vwala aköz nou pe diskite ek *ASP* kekfw ganny en

carer tanporer, vwala aköz nou a pe diskite.

San ki mon ofans sa bann dimoun ki travay laba, sa sant in depas sa letan ki nou ete la avek son program letid ek tou keksoz. Mon pa krwar mwan ki sa bann etidyan ki laba sa bann dimoun, zot a pe ganny sa ki zot sipoze gannyen laba, zot pa pe gannyen. E mon pa krwar i annan okenn valer ki pour tir zot pou met zot laba.

Sa ki nou bezwen korize e nou bezwen fer sir ki nou aranz sa. Lo kote konbyen zanzan ek etidyan *PS Roucou* i ava reponn. Be selman vwala ki nou bezwen e nou pe profite fer formasyon ban *meeting* sa bann transformasyon avek sa bann travayer pandan sa bann letan kot i frenmen la pou nou regarde ki mannyer.

E vwala aköz nou a pe rod lasistans ek *Indonésie* tou, pou regarde ki bann diferan model ki annan en pe partou, kwa ki nou kapab fer, e ki mannyer Minister Ledikasyon i kapab - petet posib nou kapab diskite bann ki ankor laz etidyan ki mannyer nou ede.

Be sa bann ki li i pa bezwen vin la dan en sant vokasyonnel li, kekfw parey taler Onorab De Letourdie in dir i bezwen epanouisman al dan en lanplwa, dan en biznes en

kelkonk. Vwala ki bann konversasyon ki toultan ki Direkter Zeneral Madanm Morin pe toulezour, preski toulezour i pe anvoy mon mesaz pe dir nou bezwen fer keksoz, ki i dir mwan “pa akseptab ditou ki mannyer keksoz i ete,”

E vwala taler ki mon ti dir ki akoz ou a krwar sa bann dimoun in ganny bliye, met laba e pa get ditou. E ki mwan i vreman, i trakas mwan e mon *even* mon napa parol. Mon en kozer mwan, me ler i annan parol pou dir akoz ki mannyer sa in ganny arive koumsa dan sa fason. E bann paran in abitye ou konpran, pou pe tir zot dan zot konfor, zot pa kontan.

Mon konpran nou konpran. Nou pe rod en fason pou nou kapab regarde dir antretan ki mannyer nou ed zot atrap zot lanmen, be selman nou pou bezwen ger sa transformasyon ki nou bezwen fer. E mon a les *PS* koz lo la kantite nou bann statistik. Mersi.

MR SPEAKER

Wi *PS*, ou annan sa bann sif?

PS CLIVE ROUCOU

Mersi Mr Speaker. Mr Speaker mon anvi dir Onorab Henrie ki

nou annan 36 etidyan, epi 5 *staff*. Mersi.

MR SPEAKER

Mersi *PS*. Avek sa nou ava termin sa Sesyon Kestyon pou ozordi. Mon a dir mersi Minis pou tou sa letan ki in pase avek nou e mersi osi *PS* Roucou e mon swet zot tou lede bon kouraz dan zot bann proze.

Mersi bann Manm pou zot partisipasyon. Nou'n prolonz sa sesyon en pe me selman zot a ganny rekonpanse akoz nou pou termin la en pe pli boner ki labitid. Mersi e nou a zwenn demen bomaten 9er.

(ADJOURNMENT)